



**DE
ADMINISTRATI
ONE
SACRAMENTI...**

Michele Casati





P. Lisini ad simpliciter unum 1830

DE ADMINISTRATIONE
SACRAMENTI
POENITENTIAE

PRAECEPTIONES THEOLOGICO-PRACTICAE
IN FREQUENTI SACERDOTUM CONVENTU
TRADITAE

AB ILLUSTRISSIMO ET REVERENDISSIMO D. D.

MICHAELE CASATI


CONGREGAT. CLERICOR. REGULARIUM

DEI ET APOSTOLICAE SEDIS GRATIA EPISCOPO
MONTIS - REGALIS ET COMITE.

Accedit Exhortatio ad hujus ministerii opus assidue
naviterque obeundum.



R O M A E
EX TYPOGRAPHIO PALEARINIANO
MDCCLXXXIII.



PRAESIDIUM PERMISSU

iii

MICHAEL CASATI

CONGREGAT. CLERICOR. REGULARIUM

DEI ET APOSTOLICÆ SEDIS GRATIA EPISCOPUS
MONTIS-REGALIS ET COMES

Venerabilibus Sacerdotibus Ecclesiæ
Monregalensis.

SALUTEM.

*J*ampridem Nobis constitutum erat de Sa-
cramenti Poenitentia dispensatione ineunte
hoc anno ad vos scribere; Venerabiles Chri-
sti Ministri, & charitatem vestram ve-
hementer incendere, ut in hujus ministerii
opus, ex quo tam uberes in Ecclesiam uni-
versam prodeunt fructus, sedulo naviter-
que incumbatis, nempe ut quotquot ad ex-
cipiendas fidelium confessiones assumpti estis,
in hoc officii munere assidui sitis; qui vero
a a pote-

potestatem hanc spiritualis jurisdictionis nondum accepistis, ad eam fideliter fructuoseque gerendam idoneos vos quantocius exhibeatis. Nonnulli tamen cordatissimi viri, quorum apud Nos plurimum valet auctoritas, enixe instanterque a Nobis postularunt, ut certam quoque agendi normam simul exhiberemus, per quam spirituali confitentium bono efficacius prospiciant, eosque ad veram conversionem, viteque emendationem perducant; atque operæ pretium facturos Nos esse putarunt, si nonnullas hac de re evulgaremus dissertationes nostras in crebris, qui apud Nos haberi solent, Sacerdotum conventibus recitatas. Nos itaque, tametsi alia prostant opuscula piorum, doctorumque virorum, qui Sancti Caroli, & Sancti Francisci Salesii vestigiis insistentes de recta Sacramenti Pœnitentiæ administratione optima tradiderunt monita ac præcepta, obtemperandum tamen esse duximus, quum nimis grave atque arduum Nobis sit eorum, qui optime de Nobis, ac de universa Ecclesia nostra meriti sunt, iudicio ac voluntati obsistere. Habetis ergo doctrinam nostram de administratione Sacramenti Pœnitentiæ in octo capita digestam, cui adjunximus appendicem de visita-

ta-

tatione, & spiritali cura infirmorum; præconceptam animo exhortationem; tum etiam explicationem casuum, quorum in prima nostra Synodo Nobis reservata est absolutio, ut dirimantur quæstiones, quæ sæpe excitantur super eorum intellectu (1). Optamus autem, ut libellum hunc veluti nostri erga vos studii argumentum lubenti animo excipiat, & in vestris potissimum cœtibus ad expendenda practicæ Theologiæ præcepta institutis frequenter perlegatis. Valete.

Monte-Regali ex Palatio nostro Episcopali die duodecima Octobris 1781.

✱ MICHAEL EPISCOPUS.

IN.

(1) Casus reservati, qui Monregalensi hujus operis editioni accesserunt, in hac Romana omittuntur: eos enim Episcopus quisque in sua Diœcesi sibi reservat absolvendos.

I N D E X

Præfatio : *De administratione Sacramenti Pœnitentiæ .* pag. **I**

CAPUT I.

De dotibus , quæ requiruntur in ministro hujus Sacramenti .

Artic. I. De vita integritate , & morum sanctimonia . **4**

Artic. II. De Charitate , & Zelo . **7**

Artic. III. De Scientia . **II**

Artic. IV. De Prudentia . **15**

CAP. II.

De iis , quæ agenda sunt a Confessario , quotiescumque sui ministerii opus aggreditur .

Artic. I. De Oratione præmittenda . **17**

Artic. II. De excipiendis pœnitentibus , & exploranda eorum preparatione . **18**

Artic. III. De necessitate eliciendi a pœnitentibus integram mortalium peccatorum confessionem . **19**

CAP. III.

De interrogationibus adhibendis ad eruenda conjuentium peccata . **21**

Artic. I.

Artic. I. De interrogandis laicis pro va-
ria eorum conditione . 22

Artic. II. De inquirendis circa laico-
rum munera , atque officia . 27

Artic. III. De interrogandis viris Ec-
clesiasticis pro vario eorum ordine ,
& ministerio . 34

C A P. IV.

De commonendis confitentibus , & ad ve-
ram poenitentiam , vitæque emen-
dationem excitandis .

Artic. I. De commonendis peccatoribus
vitio aliquo corruptis . 48

Artic. II. De iis , qui tepiditate , &
languore spiritus laborant . 53

C A P. V.

De moderandis scrupulorum conscien-
tiis .

Artic. I. De scrupulis , & anxietatibus
conscientiæ in communi . 59

Artic. II. De scrupulis in particulari . 67

C A P. VI.

De Contritione .

Artic. I. De principio , & proprietati-
bus veræ contritionis . 74

Artic. II. De emendanda vitæ proposito
a vera contritione inseparabili . 80

CAP.

C A P. VII.

De Satisfactione.

Artic. I. *De operibus poenitentiae generalim.* 84

Artic. II. *De prudentia a Sacerdote adhibenda in praecipendis peculiari-
bus poenitentiae operibus.* 89

C A P. VIII.

De Absolutione.

Artic. I. *De recto usu potestatis clau-
vium.* 98

Artic. II. *Quibus deneganda, vel dif-
ferenda sit absolutio.* 107

A P P E N D I X

*De visitatione, & spiritali cura infir-
morum.* 134

Ad Sacerdotes cohortatio. 144



DE ADMINISTRATIONE
SACRAMENTI
POENITENTIAE.



Miram profecto, & naturæ nostræ
humilitati infinito intervallo su-
pereminentem potestatem exer-
cemus, Venerabiles Sacerdotes,
quum fidelibus post Baptismum
lapsis Sacramentum Poeniten-
tiæ administramus, quod merito dictum est
altera post naufragium tabula; & postremam
salutis perlugium. Dedit quidem Deus servo
suo Moyse, ut pro salute populi ex Ægypto
educendi tot ederet stupenda prodigia, qui-
bus visus est elementa mundi, & omnes na-
turæ leges subvertere. Dedit Josue invictissi-
mo Tribuum duci Solis, Lunæque cursum si-
stere, donec fugientes Amorrhæorum pha-
la ges penitus deleret. Dedit Eliæ, ut ejus
nutu dilapsus ex coelo ignis vel paratum ho-
locaustum absumeret, vel militum cohortes,
A a qui.

a quibus abducendus erat, illico devoraret. Dedit Elifæo, aliisque viris sanctitate eximiis, ut ægris salutem redderent, mortuis vitam, & plura alia id genus Divinæ potentiae virtute pararent miracula, quæ in veteris Testamenti paginis passim leguntur. Nusquam tamen legimus cuiquam ex ipsis datum fuisse, ut constrictas peccatorum vinculis animas solverent, & mortuas Deo ad vitam gratiæ, per quam Deo vivitur, revocarent. Hinc quidam Legis Doctores, qui in Jesu Christo Salvatore nostro nonnisi humanam naturam agnoscebant, quum ipsum audissent paraliticum sibi oblatum ita alloquentem: *Confide, fili; remittuntur tibi peccata tua*, immanis, atque horrendæ blasphemiae reum existimarunt, quod divinam potestatem nulli unquam hominum concessam sibi arrogaret: *Quis est hic, qui loquitur blasphemias?*

Quis potest peccata dimittere, nisi solus Deus?

(a) Jam vero divinam hanc potestatem discipulis suis contulit Dominus, quum, ineffabili humanæ reparationis mysterio absoluto, rediturus ad Patrem Spiritum Sanctum sui oris afflatu eorum cordibus infudit dicens: *Accipite Spiritum Sanctum, quorum remiseritis peccata remittantur eis, quorum retinueritis retenta sunt* (b).

Hæc autem potestas una cum dignitate atque officio Sacerdotii, quod in Ecclesia perpetuum est, in universos novi Foederis Sacerdotes perpetuo dimanat; unde unusquisque vestrum, quum Sacerdos consecratus est, illa ipsa Jesu Christi verba ab Episcopo sibi manus imponente audit: *Accipe Spiritum Sanctum, quorum remiseris peccata &c.* O grande officii munus! O præclarissimum, ac plane divinum mi-

ni.

(a) Luc. V. 21.

(b) Joan. XX. 23.

nisterium! Olim in veteri lege Sacerdotes aliquem a lepra mundatum esse renunciabant; nunc vero in Ecclesia non ea tantum potestas Sacerdotibus facta est, ut aliquem a peccatis esse absolutum declarent; *sed vere tanquam Dei ministri a peccatis absolunt* (a); & quod ipsi recto iudicio pronunciant in terris, ratum, ac firmum habetur in cælis. Pater omne iudicium dedit Filio; sed ipse Dei Filius omne iudicium Ecclesiæ suæ Sacerdotibus tradere dignatus est: Sacerdotibus, inquit Chrysostomus; *qui terram incolunt, atque in ea versantur, his commissum est, ut ea quæ in cælis sunt, dispensent; his datum est, ut potestatem habeant, quam Deus optimus neque Angelis, neque Archangelis datam esse voluit. quasi jam in cælum translati, & supra naturam humanam positi, atque nostris affectibus exempti, sic illi ad principatum istum perducti sunt* (b); unde & Reges, & summi Imperantes ad eorum pedes provoluti peccata sua humillime confitentur. Quanta vero vitæ integritate, & morum sanctimonia; quo caritatis fervore, qua doctrina, ac prudentia instructum esse oportet Christi Sacerdotem, cui partes demandatæ sunt divinam hanc potestatem exercendi? Sit igitur

(a) *Catech. Rom. de Sac. Pœn. §. XVI.*(b) *S. Jo. Chrysost. de Sacerd. lib. III. cap. V. circa initium.*

C A P U T I.

*De dotibus, quæ requiruntur in Ministro
hujus Sacramenti.*

A R T I C. I.

*De vitæ integritate, & morum
sanctimonia.*

UT tantum ministerium digne impleatur, & uberrimi ex eo fructus prodeant, primum quidem vitæ integritas in Sacerdote ad ipsum assumpto requiritur cum christianæ perfectionis studio, & animarum salutis zelo conjuncta; tum vero etiam scientia, ac prudentia, quibus instructum esse oportet medicum, ac ducem animarum.

Et vitæ quidem integritas tam necessaria est quam quod maxime. Quid enim, ut hinc exordiamur, quid si Sacerdos cum conscientia lethalis culpæ hujus Sacramenti gratiam poenitentibus largiretur? Si tam sancti ministerii opus immundus obiret? Si Dei inimicus, divinæque majestatis læsæ reus quum sit, divinæ misericordiae arbiter sedere, Dei nomine peccata dimittere, & peccatores ipsi reconciliare non formidaret? Profecto immane hoc sacrilegium haudquaquam irritum faceret Sacramentum, neque ejus virtutem minueret, aut prohiberet effectum, qui non ex sanctitate ministri, sed ex meritis Salvatoris nostri Jesu Christi unice penderet. Quam horrenda tamen damnatio immineret sacramentalis gratiæ ministro!

Ne-

Neque vero tantum mortiferi reatus immunitas in eo requiritur, sed studium quoque vitandi veniales noxas, quæ caritatis fervorem minuunt, vires animæ enervant, divinæ gratiæ emanationes impediunt, veluti nubes, quæ Solis æterni radios intercipiunt, ac denique nos in funestissimos lapsus impellunt. Ineptus animarum medicus est, qui hujusmodi spirituales languores, atque ægritudines in semetipso lubens perfert, nec curat convalescere. Fieri quidem poterit, ut corporum infirmitatibus curandis aptior sit medicus, qui iisdem obnoxius est, quam qui perfecta semper utitur valetudine: nam in se ipso persentiens mala, quibus æger conflictatur, majori erga ipsum commiserationis sensu tangitur, ac magis sollicitus est ipsi opitulari iis remediis, quorum vim, ac præstantiam in se ipso expertus est. Anne vero impenſa, solertique cura spiritualibus aliorum morbis mederi poterit, qui similes, aut forte etiam graviores ægritudines in semetipso negligit, vel potius nutrit, ac fovet, utpote sibi utiles, ac jucundas? Qui sibi nequam est, cui alii bonus erit (a)? Quis potest alios aut magis, aut melius diligere quam se ipsum? *Si te ipsum non nosti amare*, inquit Augustinus, *quomodo poteris proximum in veritate diligere* (b)? Hinc vero præcipue oritur tanta inutilitas confessionum, quas nulla sequitur emendatio: Hinc est quo tam multi post innumeras confessiones nihilo meliores effecti sibi ipsis perpetuo similes sunt, nempe ut antea elati, ambitiosi, quæriuli, morosi, iracundi; ut antea bonorum suorum tenaces, & erga pauperes parum misericordes; ut antea

A 3

in-

(a) Eccl. XIV. c.

(b) S. August. Homil. XXXVIII.

intemperantes, otiosi, desides; delati ut antea in ludos, spectacula, pompas, in seculi oblectamenta, inimici crucis Christi, nempe a christiana mortificatione alieni, atque in omni divino opere segnes, ac negligentes.

Quoniam igitur maxime decet Sacerdotem, qui animarum medicus constitutus est, ea virtutis integritate pollere, ut nulli vel veniali peccato pravo affectu adhæreat, quum idem ipse ductor sit animarum, quæ ad christianam perfectionem dirigendæ sunt, ejus studio flagret necesse est, easque noverit, atque inierit vias, quæ ad ipsam perducunt. Sic Raphael Angelus, qui se comitem, ac ducem exhibuit Tobix filio ad Gabelum ituro in Reges Civitate Medorum habitantem, ut se idoneum ducem ipse probaret, omnes ejus regionis vias optime se nosse, ac frequenter perambulasse testatus est: *Novi, & omnia itinera ejus frequenter ambulaui* (a).

Porro assiduæ ad Deum preces, sacrarum scripturarum, & aliorum librorum, qui inter spirituales, atque asceticos optimi habentur, quotidiana lectio, christianæ mortificationis jugis exercitatio, & omnia erga proximum charitatis, & misericordiæ opera viæ sunt, per quas itur ad perfectionem. Omnibus autem nervis nullo non tempore adnitendum est, ut progrediamur; si enim a nisu, & contentione virium tantisper cessemus, continuo a nostris cupiditatibus retrorsum trahimur, quemadmodum qui adverso flumine navigant, cum primum contra ejus vim remis contendere desinunt, a profluente fluminis abripiuntur. Ita igitur in christianæ perfectionis tramite

(a) Tob. V. 8.

mite alacriter procedens Sacerdos, animas sibi creditas tuto feliciterque deducit, docetque ut alter Raphael Tobiae custos, & ductor, daemonis aggressionibus obistere, insidias vitare, subdolas artes eludere, quas in animarum perniciem solet adhibere.

Sed suæ quoque securitati optime consulat jugi studio proficiendi in christiana perfectione; valida enim praesidia sibi circumponet adversus pericula, quibus obicitur sui ministerii causa, periclitatur salus medici, qui hominem contagioso morbo laborantem curandum suscipit; nam ejus lecto assidere, pestilentem ejus halitum, & corruptam totius corporis atmospheram excipere, ejus ulcera contrectare perinde est ac morbum contrahere, nisi aliquo validissimo antidoto ejus communicatio prohibeatur. Nonne ergo in maximum discrimen adducitur salus Sacerdotis, qui saepe foedas narrationes audire cogitur, ac mentem adjicere ad nefaria flagitia excutienda? Quid si etiam impudicæ mulieres, ut nonnumquam contingit, pravos in ejus animo affectus studiose excitarent, eumque ad turpia sollicitarent? Quanta ergo animi constantia, quanta virtute munus sit oportet, ne misere pereat, dum nititur a perditionis via alios revocare?

A R T I C. II.

De Charitate, & Zelo.

VItæ integritati, & christianæ perfectionis studio adjungendus est fervidus zelus, per quem Sacerdos non sibi tantum, sed aliis quoque bonus, atque utilis efficitur proximorum salutem

luti strenue adlaborando. Zelus iste est quædam actuosissima flamma, & quætiens impatiens ab eo caritatis igne erumpens, de quo locutus est Dominus, quum dixit: *Ignem veni mittere in terram, & quid volo, nisi ut accendatur* (a)? Hac caritatis flamma incensus Sacerdos laboriosum, de quo agimus, ministerium non refugit; pauperes, rudes, & ignaros poenitentes non reipuit; prolixas, & implexas eorum narrationes patienter audit; molestissimas muliercularum ineptias, & scrupulorum ambages sustinet; *charitas* scilicet *patiens est, omnia suffert, omnia sustinet*. Peccatores omnes vel scelestissimos eo commiserationis affectu suscipit, quo amantissimus Pater evangelicus prodigum filium suum squalentem, lacerum, seminudum ad se redeuntem amplexatus est. Peramanter ad se allicit, ac trahit pueros, quos Salvator noster a se arceri, aut divelli non patiebatur. Non deserit mutos, & surdos, hebetes, aut semifatuos, quos sollertiori cura oportet ad cognitionem Dei, divinorumque mysteriorum adducere, atque in viam salutis dirigere. *Charitas benigna est*. Nullius peccatoris conversionem, ac salutem desperatam habet, ideoque quos semel suscepit, nunquam deserit, & fuis saltem ad Deum precibus, lacrymis, ac gemitibus juvare nititur. *Charitas omnia sperat*. Non laudem affectat indefessi in vinea Domini operarii, non sibi blanditur, si videat illustres viros, ac nobiles matronas ad se accedentes, nec invidet aliis, quorum cathedræ splendida eorum corona ambiuntur. *Charitas non inflatur, non est ambitiosa*. Non ita sibi devinctas detinet pias mulieres, aut virgines Deo

12-

(a) Luca XII. 49.

facras, quarum spirituale regimen suscepit, ut non sinat, vel ægre ferat alium confessarium; & spiritualis vitæ magistrum aliquando eas adire, quo quidem in maximas angustias conjicerentur, atque in periculum sacrilegæ confessionis. *Charitas non æmulatur, non agit perperam*. Labore non frangitur, non tædio vincitur, nec animum despondet, si aliquando videatur sibi operam perdere: *Charitas nunquam excidit*. Non aucupatur divitum munera, vel potentum favorem, & gratiam, nec aliud quærit, quam lucra animarum: *Charitas non quærit quæ sua sunt* (a).

Quantuscumque tamen sit charitatis fervor, ac zelus pro salute animarum promovenda, cavendum semper est, ne in terrenam, & carnalem affectionem degeneret, quod quidem in spirituali sequioris sexus directione, ac regimine non raro pro humana fragilitate contingit. Ex iis foeminis, quæ, missis, aut neglectis seculi pompis, atque oblectamentis, spiritualis vitæ rationem profitentur, nonnullæ inveniuntur *habentes quidem speciem pietatis*, ut loquitur Apostolus, *virtutem autem ejus abnegantes semper discentes, & nunquam ad scientiam veritatis pervenientes* (b), quæ tam arcto foedere duci, ac rectori suo adhærent, ut ab eo divelli haudquaquam patiantur. Habent quotidie quod cum ipso conferant; in ærumnis, in angustis, in tribulationibus ac tentationibus non videntur spem suam ponere in Deo, qui moerentium consolator est, refugium pauperum, adjutor in opportunitatibus, in tribulatione, neque enim ad Deum in oratione, atque effusione cordis confugiunt, sed ad spi-

(a) *I. Cor. XIII. 4. & seq.* (b) *II. Tim. III. 5. 7.*

spiritualem moderatorem suum, ab eoque consilium, opem, consolationem implorant. Illum unice in oculis ferunt; illum summis laudibus extollunt, ceteros vero Dei ministros despicunt, & contemnunt. Malunt carere sacramentis Poenitentiae, & Eucharistiae, quam apud alium Sacerdotem exomologesim facere. Tanta erga spiritualem moderatorem suum propensio, tam inordinata affectio non absimilem in ipso affectionem facile excitabit, quumque mutuae istae affectiones se se invicem nutrant, ac foveant, an non magnopere timendum erit, ne spiritualis necessitudo in carnalem convertatur, & qui spiritu coeperunt, carne consummentur?

Caute igitur incedamus, Venerabiles Christi Ministri, & dum vivimus in hoc mortali corpore, & divinae gratiae thesaurum portamus in vasis fictilibus, timeamus familiaria cum mulieribus colloquia, earumque blanditias, quae laquei diaboli sunt, cane pejus & angue fugiamus. Heu quam multi memorantur lacrymabiles lapsus summorum virorum, qui hisce laqueis capti miserrime perierunt! Nonnisi breves, serios, & graves cum mulieribus sermones habeamus, nec nisi quantum officii ratio, & purus, ac genuinus animarum zelus postulat, cum ipsis agamus. Audiamus hac de re praeclarum Augustini monitum: *Sermo brevis & rigidus cum mulieribus est habendus, nec tamen quia sanctiores sunt, ideo minus timenda; quo enim sanctiores fuerint, eo magis alliciunt, & sub pretextu blandi sermonis immiscet se viscus impiissimae libidinis. Crede mihi; Episcopus sum, in Christo loquor, non mentior; cedros Libani, idest magnos Praelatos Ecclesiae sub hac specie cor-*
ruiſſe

11

ruisse reperi, de quorum casu non magis præsuebam, quam Hieronymi, & Ambrosii (a).

A R T I C. III.

De Scientia.

Sed animarum ductor, & moderator scientia quoque polleat necesse est, ne aliorum salutem consulere volens se ipsum, atque alios perimat, ut tremenda illa minantur Christi Domini verba: *Vae vobis duces cæci* (b). Cæcus autem, si cæco ducatum præstet, ambo in foveam cadunt (c). Quæ autem, & quanta in eo requiratur scientia, Sapientissimus, & immortalis memoriæ Pontifex Benedictus XIV. docet his verbis: *Opanda in quolibet confessorio esset scientia eminens, sed mediocris, & sufficiens omnino necessaria est, nec ultra sperare licet, quum morum Theologia tot tantasque complectatur quæstiones, quæ a Canonum, & apostolicarum Constitutionum notitia pender, adeo ut fieri vix possit, ut homo præsentia omnia habeat, valeatque, ut dicitur, stans pede in uno ad quodlibet respondere, quemadmodum præstare solent eminenti scientia præditi, qui opus minime habent ad librorum lectionem confugere, quod facere consuescunt ii, qui insufficienti duntaxat scientia polent, ut animadvertit Prædecessor noster Innoc. IV. ad caput: Cum in cunctis* (d). Neque vero in dubiis quæstionibus dirimendis quolibet libro, quem fors in manus tulerit, utendum est, nec cuiusque scriptoris opinioni abhærendum:

(a) S. Aug. apud S. Th. de modo confit. & purit. conf. artic. XXII. circa finem.

(b) Matth. XXIII. 16. (c) Matth. XV. 14.

(d) Bened. XIV. Litt. Apost. die 26. Jun. 1749.

dum; *Sed antequam Confessarius deliberet* (pergit idem Pontifex), *evolvat non unum, sed plures libros; inter istos consulat præstantiores, postea illam amplectatur sententiam, cui magis suffragari rationem, & auctoritatem favere cognoverit.*

Nos itaque mediocrem saltem, & sufficientem scientiam postulamus in Sacerdotibus, quos legitimum theologiarum institutionum cursum laudabiliter emensos, & examinis experimento probatos facultate donamus excipiendi fidelium confessiones, quam quidem aliquando nondum perfecta absolutaque doctrina imbutis concedimus spe adducti profectus, quem assidua optimorum librorum lectione, ac jugi meditatione, tum etiam crebris cum aliis doctis viris exercitationibus, & consultationibus in dies singulos sunt habituri. Et hoc quidem est, quod a vobis enixe poscimus, ac postulamus, Venerabiles Sacerdotes; nam si Judices hujus seculi, ut in causis forensibus rectum judicium ferant, probatissimos legum interpretes quotidie consulunt; si Medici ut morbis corporum apta remedia abhabeant, perpetuo revolvunt tractatus doctorum virorum, qui de rebus sive ad theoreticam, sive ad practicam medicinam spectantibus scripserunt; an non eorum diligentiam, ac solertiam non imitandam modo, verum etiam superandam sibi proponent Sacerdotes, qui spirituales judices, ac medici sunt constituti, ut causas cognoscant, ac dirimant, in quibus non de prædiis, aut aliis terrenis rebus agitur, sed de cœlesti regno, de æterna hæreditate capeffenda; ut curationem suscipiant, non corporum brevi moriturorum, sed immortalium animarum, eisque æternam

sa.

salutem, ac beatissimam in coelis vitam concilient? Attendant ergo lectioni, ut monet Apostolus (a), assidue perlegant divinas literas, sanctorum Patrum scripta, Pontificum, & Conciliorum decreta, & illustriorum Theologorum de doctrina morum commentaria; præcipue vero S. Thomæ Aquin., S. Bonaventuræ, S. Raymundi, S. Antonini, S. Bernardini Sen., Henrici Card. Hostiensis, Silvestri Prier., tum etiam recentiorum scriptorum, qui horum vestigia secuti purioris doctrinæ laude floruerunt, nec iis unquam adhæreant, per quos, ut loquitur Alex. VII. (b), *in rebus ad conscientiam pertinentibus modus opinandi irrepsit alienus omnino ab evangelica simplicitate, sanctorumque Patrum doctrina, quem si pro recta regula fideles in praxi sequerentur, ingens eruptura esset christianæ vitæ corruptela, & via salutis, quam suprema veritas Deus arctam esse definivit, in animarum perniciem dilatatur, seu verius pervertitur.*

Ex puris itaque fontibus hauriant doctrinam de divinæ legis mandatis, de sacrorum Canonum sanctionibus, de Sacramentorum institutione, virtute, rectaque administratione, de christiani hominis officiis non tantum communibus, verum etiam particularibus pro cuiusque status conditione ac munere, de vitiis, & peccatis, eorumque causis, consecrariis, & remediis, semperque memoria teneant generales regulas discernendi peccatum lethale a veniali; definiendi distinctionem, & numerum peccatorum; peristases, seu circumstantias, per quas peccati species mutatur, vel notabiliter

ag-

(a) I. Tim. IV. 13.

(b) Decr. promulg. die 24. Sept. 1665. in 28. prop.

aggravatur; casus Pontifici, vel Episcopo reservatos, censurasque ipsis adnexas; sponsalium vim, & matrimonii impedimenta. Noverint etiam justitiæ leges in contractibus servandas, & sciant unde oriatur restitutionis obligatio, tum etiam quænam sint peccandi occasiones magis obviæ in qualibet vitæ conditione, aut professione; quænam sint dispositiones omnino necessariae, ut poenitens rite paratus censeretur ad absolutionem recipiendam; quibus monitis a prava consuetudine retrahendi sint peccatores. Semperque præ oculis habeant Canones poenitentiales a S. Carolo diligenter collectos, ut sciant imponere poenitentiam cum peccati gravitate quadam proportionem congruentem. Conveniant etiam statis quibusque diebus in eos coetus, ubi, collatis consiliis, legum, rerumque sacrarum natura, vis, & ratio, ceteraque omnia, quibus officia continentur, diligenter expenduntur, & ad ea, quæ reipsa contingunt, vel contingere possunt, accommodantur. O quam uberem fructum ex his conventibus capiet universa Dioecesis, si, uti per synodales Constitutiones, & pastorales Literas nostras præscriptum est, singulis hebdomadis rite celebrentur, & propositæ quæstiones accurate expendantur, ac dirimantur! Sic enim doctrinæ semina, quæ lectione, & meditatione insita animis sunt, consultatione, & disceptatione evolvuntur, & quasi in ipsis radices agunt, & altius infiguntur. Sic etiam qui minus eruditi sunt, sine labore, atque animi contentione plurima perdiscunt, quorum alii scientiam diuturna lectione, & meditatione sibi compararunt, quemadmodum in societate negotiationis ex sociorum ære, atque industria unusquisque ditescit, & in societate convivii iis dapi-

bus,

bus, quæ a singulis adferuntur, unusquisque alitur, & saturatur.

Erunt fortasse, qui diuturnam praxim, seu exercitationem instar omnium esse putent in regimine animarum, atque ad hujus ministerii opus satis idonei sibi videantur, propterea quod diu multumque in eo versati fuerint, ideoque lectionem, lucubrationes, consultationes præmittunt, omnemque institutionem, & disciplinam missam, & neglectam faciunt veluti supervacaneam. Quis vero sibi in animum induerit medendis corporibus diuturnam exercitationem, & praxim sufficere a doctrina, & scientia sejunctam, vel in alia quavis arte nihil requiri præter cæcam, & arbitrariam praxim, quæ plerumque nihil est aliud, quam inveterata errandi consuetudo? An non ergo opus erit scientia, & doctrina in arte regendi animas, earumque morbis medendi, quæ a Magno Gregorio ars artium merito appellatur?

A R T I C. IV.

De Prudentia.

PRÆTER sufficientem scientiam eximia quoque prudentia opus est in tantæ rei administratione; prudentia, inquam, non quidem carnis, quæ mortem affert, dicente Apostolo: *Prudentia carnis mors est* (a), sed plane prudentia spiritus. Prudentia carnis Sacerdoti suadet, ut suis potius utilitatibus, quam animarum salutis prospiciat; ut blandis opinionibus, quæ cupiditatibus favent, amatores mundi, præsertim vero nobiles, divitesque viros, ac matronas ad se trahat; ut

(a) Rom. VIII. 6.

ut gratiam ineat apud eos, qui *nolunt audire legem Dei; qui dicunt videntibus: nolite videre, & aspicientibus: nolite aspicere nobis ea, quæ re-
cta sunt, loquimini nobis placentia, videte nobis errores* (a); ut depravatas Mundi consuetudines, recentesque morum corruptelas facile transfiliat; ne earum sectatores a se avertat, nec investigare curet, quam animi præparationem adferant ad Sacramentum Poenitentiae suscipiendum; ut dubia omnia prompte, impavide, & absque ulla consideratione, aut consultatione dirimendo, opinionem, & famam consultissimi Doctoris sibi conciliet.

Contra vero prudentia spiritus facit, ut sacer minister omnia circumspiciat, & quod optimum factu est amplectatur; ut bene præparato animo ad audiendas fidelium confessiones accedat; ut se ipsum a contagione peccati immunem, atque integrum servare curet, eas adhibendo cautiones, quæ a S. Carolo, S. Francisco Salesio, & a Nobis quoque in prima nostra Synodo præscriptæ sunt; ut diligenter exploret, an poenitens rite comparatus sit, & dispositus ad gratiam Sacramenti recipiendam; ut aptis interrogationibus integram peccatorum confessionem ab eo eliciat, eumque excitet ad veram contritionem; ut juxta Evangelii, & Ss. Patrum, qui ejus interpretes sunt, doctrinam sententias ferat; ut optimis monitis, & præceptis in viam christianæ justitiæ poenitentes dirigat; ut variis animarum morbis apta adhibeat remedia; nec hominum favorem, aut plausus quærat, sed in omnibus Dei gloriam, & animarum salutem unice respiciat. Quas quidem spiritualis prudentiæ partes sequentibus articulis expendendas suscipimus.

CA.

(a) *Isai. XXX. 9. 10.*

CAPUT II.

*De iis, quæ agenda sunt à Confessario,
quotiescumque sui ministerii opus
aggreditur.*

ARTIC. I.

De Oratione præmittenda.

GRande opus aggredimur, quum ad audien-
das fidelium confessiones accedimus; agitur
enim de peccatoribus cum Deo reconciliandis, de
animabus a potestate dæmonis eripiendis, atque a
funestissima peccati morte ad vitam gratiæ revo-
candis. Christus Dominus, cui *omnia dedit Pater*
in manus (a), quique plenissima potestate, quam
a Patre acceperat, in carne nostra mortali divina
operabatur, antequam Lazarum a mortuis susci-
taret, ingemuit, flevit, Patrem oravit, ut di-
scamus quid nobis agendum sit, quum tanti
mysterii dispensationem suscipimus. Itaque
antequam confessionalem sedem adeamus, ad
aram provoluti effundamus coram Deo cor-
da nostra, eumque enixe exoremus, ut sapien-
tiæ suæ luce mentem nostram collustreret, ne
per ignorantiam, vel incogitantiam a recto judi-
cio deflectat, & gratiæ suæ auxiliis cor nostrum
communiat, ne alienis sordibus commaculetur,
quo spectant preces, quas S. Carolus juxta an-
tiquam Ecclesiæ disciplinam recitandas confes-
sariis proponit, & Nos quoque in calce primæ
Synodi nostræ exhibuimus.

B

AR.

(a) Joann. XIII. 3.

ARTIC. II.

*De excipiendis pœnitentibus, & exploranda
eorum præparatione.*

PAterna deinde charitate unumquemque excipiamus veluti nobis ab ipso Christo Salvatore nostro commendatum illis verbis: *Curam illius habe: & ...ego cum rediero; reddam tibi* (a), nec laboris, molestiæque impatientia quæquam a nobis arceamus. Si vero nobis incognitus sit poenitens; de eoque dubitari possit, an rite instructus sit, & comparatus ad Sacramenti gratiam recipiendam, quod quidem non modo in rudibus, & agrestibus hominibus, verum etiam in politioribus non raro contingit, idque ex eorum confessione facile colligitur, exploremus, an teneat rudimenta fidei, ac præsertim divina mysteria, quorum fides explicita necessaria est ad salutem: an diligens conscientiæ suæ examen inierit, ejusque latebras omnes, & recessus lustraverit; an fervida prece divinam opem imploraverit; an vere, & ex animo doleat, quod peccaverit, dolore plane intimo, supernaturali, summo, atque efficaci, nempe conjuncto cum certo, ac firmo animi proposito vitandi peccata, & quæ ad id necessaria sunt fideliter præstandi; an actus fidei, spei, & charitatis, tum etiam contritionis elicere norit, eorumque actuum motrices rationes, & causas probe percipiat, quandoquidem fieri nequit, ut voluntas in actum erumpat, quin ejus rationes, & causæ ipsi exhibeantur. Quos autem ingnaros mysteriorum fidei invenerimus, vel ad Sacramenti gratiam recipiendam haud satis comparatos, vel

(a) *Luc. X. 35.*

vel criminibus, & censuris irretitos, a quibus per facultatem Nobis traditam absolvi nequeant, ne deferamus, ne quasi desperatæ salutis homines dimittamus, sed omni spe, atque industria juvare conemur, ut se se dignos exhibeant absolutionis beneficio. Benigne, patienterque confitentes audiamus, nec ullum fastidii, offensionis, aut indignationis signum edamus, ne suspicionem aliquam circumstantibus injiciamus, vel metum, ac verecundiam confitenti, cui omnino oportet animos addere, ut omnia, ac singula peccata sua quantumvis turpissima liberrime confiteatur. Sed neque ejus confessionem crebris interrogationibus interurbemus, nisi id necessitas postulet.

A R T I C. III.

De necessitate eliciendi a pœnitentibus integram mortalium peccatorum confessionem.

EX institutione, & natura Sacramenti Pœnitentiæ universa Ecclesia semper intellexit integram peccatorum mortalium confessionem omnibus post Baptismum lapsis jure divino necessariam existere. Ita Concilium Tridentinum Sess. XIV. cap. V. de confessione. Sed in tanta confitentium multitudine paucos invenire est, qui integram, ac perfectam exomologesim faciant, nisi prudens, ac solers sacramentalis Pœnitentiæ minister eorum conscientias excutiat, & putrem quodammodo ex earum vulneribus saniem exprimat. Complures enim peccata opere ipso completa, & post ultimam confessionem perpetrata aperiunt, sed nihil loquuntur de innumeris peccatis cordis, quæ ipsa peccata operis vel præcedunt,

vel pone sequuntur; nihil de inveterata peccati consuetudine; nihil de frequenti post confessiones lapsu in eadem peccata; nihil de funestissimis peccandi occasionibus, quas vitare, vel a se amoliri non curant; nihil de præcipuis suorum peccatorum causis, cujusmodi esse solent ignavum otium, familiaris cum improbis consuetudo, aleæ, epulæ, choreæ, ludi, spectacula, atque alia id genus, quibus dediti sunt, sensuum oblectamenta; nihil de damno aliis illato, sive iniquis contractibus, sive mercede operariis denegata, sive æris alieni solutione plus nimio prorogata; nihil de violato præcepto sanctificationis festorum, vel correctionis fraternæ; nihil de prætermissa familiæ cura, vel christiana filiorum educatione; nihil denique de neglectu quotidianæ orationis, christianæ mortificationis, elemosynæ, aliorumque officiorum, quæ vel communia sunt, vel sui status, ac muneris peculiaria. Ist hæc porro, atque alia plura vitia, ac peccata in confessione non exprimunt, sive quod christianas institutiones assidue, uti par est, ac diligenter excipere non curaverint, sive quod terrenis curis, & cupiditatibus implicati, de iis, quæ ad animarum suarum salutem pertinent, nunquam, aut raro admodum cogitent. Et isti quidem innumeris se se innectunt peccatis, quæ nullam habere possunt excusationem, quandoquidem ex culpabili ignorantia, vel incogitantia proficiscuntur, & tanto insanabilius peccant, ut ait Augustinus (a), quanto minus agnoscunt se peccare; neque enim ququam suorum criminum veniam impetrare potest sine poenitentia cum sincera emendandæ vitæ voluntate conjuncta.

Qui

(a) *Conf. lib. V. cap. X.*

Qui vero fieri potest , ut veræ poenitentiae lacrymis sua deploret peccata , qui nullam eorum habet conscientiam ; ut vitia sua emendet , qui eorum turpitudinem minime agnoscit ? Isti igitur a via salutis longe absunt , neque ad ipsam revocari possunt , nisi opportunis interrogationibus latentia eorum peccata eruamus per poenitentiam delenda . Quæ quidem omnia cum brevi temporis spatio fieri nequeant , liquet profecto , quam male se gerant confessarii , qui plurimos poenitentes , quorum mores , vitæque rationem ignorant , celerrime expediunt .

C A P U T III.

*De interrogationibus adhibendis ad eruenda
confitentium peccata .*

UT ad integram peccatorum suorum exomologesim poenitentes juventur , in iis potissimum confessionibus , quæ totum antea actæ vitæ spatium , vel sat magnam ejus partem complectuntur , operæ pretium est Dei , atque Ecclesiæ præcepta , quibus communia christiani hominis officia continentur , ordine percurrere , & quid adversus singula actum , dictum , cogitatum , aut prætermisum fuerit , diligenter inquirere . Sed accuratum quoque examen instituendum est circa peculiariora officia , quæ homini pro sui status , conditionis , ac muneris ratione incumbunt ; cujus quidem examinis , quod a confitentibus sæpe negligitur , specimen aliquod sequentibus articulis exhibemus .

AR-

*De interrogandis Laicis pro varia eorum
conditione .*

Confitentium nosse oportet statum , conditionem , ætatem , ac viræ genus , ut integra peccatorum mortalium confessio , quæ juxta Tridentini Concilii doctrinam Divino jure præcepta est (a) , ab ipsis eliciatur . Nobiles nimirum , & quotquot civicis , vel militaribus honoribus clarescunt , rogandi sunt , ut considerent , an forte aliis præluere neglexerint pietate , religione , & sacrorum reverentia ; an libros apud se habeant , vel aliis legendos tradant , in quibus de rebus agitur bonis moribus , vel christianæ Religioni adversantibus ; an molli vita , luxu , pompa , supercilio , & aliorum contemptu christianæ pietatis , & modestiæ leges violaverint ; an dominicis , & festis diebus in ornatu corporis , in conviviis , ludis , deambulationibus , vanis colloquiis , choreis , spectaculis tempus Deo sacrum absumpserint , an diu multumque distulerint mercedem operariis , vel æs alienum creditoribus persolvere non sine eorum detrimento , ac damno ; an sceleratos homines suo patrocinio audaciores fecerint ad perpetranda flagitia , quum ab ipsis potius pupillorum , & viduarum tutela suscipienda esset ; an singulare certamen reparandi , ut ajunt , vel tuendi honoris causa susceptum aliquando probaverint , vel paratum gesserint animum ad illud ineundum .

Divites percunctari oportet , an malis artibus opes congregando in Diaboli laqueos inciderint , an immoderato affectu ipsis adæreant ; an erga pau-

(a) *Seff. XIV. Can. VII.*

pauperes parum misericordes sint, & malint thesauros suos in terra, ubi innumeris patent insidiis quam in coelo, ubi in tuto sunt, effusa in pauperes misericordia, recondere.

Pauperes, an, quandiu valent, strenue operentur, suisque laboribus victum sibi, suæque familiæ comparare studeant, vel potius eos imitentur, qui otio, atque ignaviæ dediti res alienas furantur, aut, quum nummorum marsupium habeant, stipem emendicando invalidis, ac vere egentibus eleemosynas injuste præripiant; an de iis tantum solliciti, quæ ad victum pertinent, catecheses excipere, Dei verbum audire, divinis mysteriis adstare, orationi vacare, ad Poenitentiam, & Eucharistiæ Sacramenta accedere negligent; an suæ conditionis incommoda impatienter ferant, ac de divina Providentia conquerrantur, quasi ab ipsa neglecti fuerint; ac derelicti, quando dilectissimus Dei Patris Filius pauperissimam in mortali carne vitam duxit, pauperes tantum homines sibi adjunxit, eosque esse voluit consiliorum suorum participes, suæ Ecclesiæ Principes, sui que regni consortes.

Conjuges, an mutua benevolentiam, ac fidei officia impleant, semotis suspicionibus, ac dissidiis; an corpora sua possideant in sanctificatione, & honore, omnique ope, atque operâ se invicem juvent; an vir se gerat ut caput mulieris, non ut dominus, eamque regat blandis cohortationibus, ac consiliis; mulier vero morem gerat viro, ejusque voluntati pareat in Domino; omnes præterea diaboli pompas, & immoderatum cultum, ornatumque aversetur, nec patiatur sibi, aut filiabus suis manum admove hodiernos concinnatores, quorum ministerium, rejecta foeminarum opera, in comendis, exordinandisque capillis a mu-

mulieribus passim adhibetur, juxta invectam non sine ingenti hujus ævi probro detestabilem corruptelam.

Negotiatores, & mercatores ditescere cupiunt; qui autem *volunt divites fieri, incidunt in tentationem*, ut loquitur Apostolus, *& in laqueum diaboli, & desideria multa inutilia, & nociva, quæ mergunt homines in interitum, & perditionem* (a). Quum autem innumeræ sint doli, & fraudis species, quæ adhiberi solent plurimique sint iniqui contractus, vel usuræ labe infecti, ac sæpe etiam ita involuti, atque implicati, ut eorum vitia non ita facile in oculos incurrant; accurate evolvendi sunt, ac perpendendi, ut liqueat, in quo violatæ fuerint commutativæ justitiæ leges.

Peculiare autem examen instituere oportet cum mercatoribus, ac dispiciendum, si forte incautos, & imperitos deceperint vendendo vitiatas merces pro integris, & probatis; obvias, & communes pro peregrinis, viles pro pretiosis absque justa pretii diminutione; si cum aliis mercatoribus in monopolium conspiraverint, ut aliquod mercium genus certo pretio, quod justo majus esset venderent, vel justo minori emerent, si non æquis ponderibus, ac mensuris usi fuerint; si res furto ablatas scienter emerint; si quidquam carius vendiderint illud ipsum redempturi viliori pretio; si filiorum familias prodigalitati, & libidinibus inservierint, merces ipsis vendendo magno pretio post mortem patris ab ipsis solvendo; si ex simplicitate, & imperitia emptorum injustum fecerint quæstum, vel de qualitate, aut justo pretio rei venalis sciscitantibus mentiti fuerint, aut pejeraverint. Curandum

au-

(a) *Tim. VI. 9.*

autem quam maxime est, ut isti omnes animarum suarum saluti consulant iuxta damnorum reparatione. *Quid enim prodest homini si mundum universum lucretur, animæ vero suæ detrimentum patiatur* (a)?

A peccandi periculo præ cæteris abesse videntur artifices, coloni, & quotquot operam suam aliis locant pacta mercede; hi enim suis operibus assidue intenti otiositatem fugiunt, quæ omnis malitiæ mater est, ac magistra; & plurima ignorant vitiorum irritamenta, cujusmodi sunt mollis vita luxu, & deliciis diffluens, ludi, choreæ, scenica spectacula, omnesque diaboli pompæ, quæ pravos in animo affectus excitant, & mores corrumpunt. Et hi quidem, si Dominicos, & festos dies religiose colant, inculpatam ducere solent vitam, & omnia christiani hominis officia fideliter implent. Verum si a divinis obsequiis se se abduci sinant, & ad popinas, ac tabernas pertrahi, quæ vitiorum omnium palestræ sunt, omniumque scelerum officinæ, universæ legis divinæ, & ecclesiasticæ violatores citissime evadunt. Quapropter qui diebus Deo sacris eas adire solent, & diu in ipsis versari, super singulis divinæ, & ecclesiasticæ legis præceptis accurate inquirendi sunt in sacramentali judicio.

Præcipue autem ab artificibus quærendum est, an forte per dolum, aut negligentiam commiserint, ut opus suum minus utile evaserit, vel etiam periculofum, & noxium; velut si cæmentarius, seu faber murarius domum extruxerit male materiata, vel minus apte connexam, & colligatam, quæ brevi ruitura sit; an de re sibi credita quidpiam furati fuerint; veluti si futor partem aliquam panni, si molitor partem aliquam

C

tri.

(a) *Matth. XVI. 26.*

tritici præter statutam mercedem sibi retinuerit, vel bonum triticum in deterius commutaverit; a colonis, an sedulam in agrorum cultura operam impenderint, an prædiorum Domino fructus ipsi debitos contribuerint; ab operariis denique, & mercenariis, an in operibus, quorum causa diurna mercede conducti sunt, prout æquitas postulat, & tempus, & vires, & diligentiam impenderit.

Pueri, & puellæ peramanter suscipiantur, eaque benignitate, quam ipse Salvator noster erga tenellam ætatem ostendere consuevit. Cohortandi autem sunt blandis sermonibus, ut non labiis tantum, sed intimo quoque cordis affectu Deum exorent; ut cælestem Christi doctrinam avidè excipiant, & in corde suo custodiant; ut parentibus obtemperent, & eorum jussa, veluti ipsius Dei mandata promptè, alacriterque faciant; ut sodales, quos vitio aliquo corruptos agnoverint, veluti visibiles Dæmones effugiant, omnibus cacodæmonum legionibus in ipsorum perniciem conspirantibus magis timendos.

In explorandis autem eorum conscientiis caute admodum incedendum est, ne forte ipsorum animis ingeratur notitia vitiorum, quorum felicissima adhuc gaudent ignorantia. Juerit ergo primum inquirere, an forte quidpiam libenter viderint, audierint, cogitaverint, quod christianæ modestiæ adversetur; an cum aliis pueris liberius jocati fuerint, aut minus decenter; an fecerint quidquam, quod non auderent in conspectu majorum suorum facere, tum paulatim ad ulteriora progrediendum est, si opus sit facto, quandoquidem cito se exerit in pueris concupiscentia: *sensus enim, & cogitatio humani cordis in malum prona sunt ab adolescentia sua* (a). Jue-

(a) Gen. VIII. 21.

rit autem eos adducere, ut crebro confiteantur: juverit quoque absolutionem aliquando ipsis impertiri, quum scilicet censeretur sufficiens haberi materiem remotam Sacramenti, tum vero etiam proximam, quæ sita est in sincera peccatorum detestatione. Juverit denique maximam adhibere curam, ut ad Sacramenta Confirmationis, & Eucharistiæ sancte, fructuoseque suscipienda rite se se disponant; hinc enim æterna fidelium salus potissimum pender.

Nec sane deserendi, aut negligendi sunt hebetes, semifatui, surdi, ac muti, sed divinorum mysteriorum notitia quoad ejus fieri potest imbuendi, quod Parochorum præcipue munus, atque officium est, solertiorique industria curandum, ut idonei evadant ad confessionem verbis, aut signis, & nutibus faciendam, & Poenitentiae Sacramentum suscipiendum; nam, & in ipsis viget concupiscentia, & sæpe etiam tantum rationis inest, ut facile possint lethali aliquo peccato se se inquinare.

A R T I C. II.

*De inquirendis circa Laicorum munera,
atque officia.*

Longum profecto esset universa officiorum munera percurrere; sed lubet præcipua quædam recensere, ut quisque videat, qua potissimum ratione plena, & integra exomologesis ab iis erui possit, qui in excutienda conscientia sua, ejusque latebris perlustrandis parum diligentes inveniuntur.

Magistratus porro, ac Judices, ut hinc exordiamur, pluribus se se peccatis onerant, & gravia

alia inferunt damna , si promissa non impleant in ipsa officii susceptione jurisjurandi sacramento firmata ; si per ignaviam , & negligentiam judicia protrahant ; si litigantium jura minus accurate perpendant ; si , mendicata eruendæ veritatis causa , inutilia , & superflua suscipiant itinera , vel moras alicubi plus justo protrahant alicujus civitatis , aut privatorum hominum sumptibus ; si partium studio , favore , aut gratia , vel precibus , aut muneribus a justitiæ tramite se se abduci sinant ; si ambiguas ferant sententias , quæ novas lites parare solent ; si scelera , & flagitia impune grassari patiantur , vel dies festos operibus , & vecturis palam profanari , tum vero etiam in ganeis , & popinis improbos homines vacare ludis , comeffationibus , & ebrietatibus , quo tempore divina officia celebrantur . Super his igitur accurata instituenda est inquisitio .

Non absimili examine excipiendi sunt quotquot causarum patrocinium , & procuracionem suscipiunt , vel publici Notarii munus exercent ; nam , & isti in maximo versantur periculo lædendi justitiam non sine gravi aliorum noxa . Sciscitari ergo oportet , nunquid eas egerint causas , quarum manifesta erat iniquitas , vel subdolis artibus adnisi fuerint iudicibus fucum facere ; nunquid authores fuerint , ut partes , quæ jam erant conciliandæ , pertinacius dissiderent , vel ut convenirent inter se , quum ei parti , cui patrocinabantur , jus nullum esse cognoscerent ; nunquid cavillationibus subtiliter excogitatis , vel callidis tergiversationibus causas in longum produci curaverint , ut ipsi diutius lucrarentur , vel ob ignaviam , & incuriam suam in culpa sint , quod cli-
entes

entes causam perdiderint; num de illicitis contractibus. fraudulentis, aut usurariis chirographa confecerint, atque oblinaverint; num in ipsis formulam aliquam data opera prætermiserint, qua deficiente irrita haberentur, vel per dolum, & fraudem aliqua inseruerint verba, sive incongrua, sive ambigua, quæ contractum infirmare valeant, vel litibus ansam præbere. De his igitur diligens incundum est examen, & videndum, quæ sit præstanda pro illatis damnis reparatio.

Medicos quoque, & Chirurgos plura circumstant peccandi pericula, facile enim, dum munus obeunt medendi corporibus, lethali jaculo animam suam confodiunt, sive quod ex industria, vel per ignaviam morbos alant, quos cito possent depellere, vel plures, quam par est, aut pretiosiores medicinas præscribant; ut Pharmacopolæ gratificentur; sive quod incerta, ac dubia experiri velint remedia, cum adhibere possint certa; vel in consultationibus opinioni suæ tenaciter adhæreant, tametsi aliorum sententiam meliorem esse intelligant, & malint systema suum tueri, quam ægro consulere; sive denique quod nimis leviter consignatas literas tradant postulantibus dispensationem a lege quadragesimalis jejunii, vel curare negligant, ut ægrotantes peccatorum suorum exomologesim mature faciant juxta constitutionem S. Pii V. P. M. (a), vel monere non audeant ut periculose decumbentes spiritualibus Sacramentorum subsidiis opportune muniantur.

Nec certe magis infontes sunt Pharmacopolæ, si medicamina suppeditent vetustate corrupta, aut vitata, vel inutilia, aut noxia, vel alia a præscriptis; si mortifera venena incaute, &

C 3

te-

(a) S. Pius V. *Const.* supra gregem 8. *Marc.* . 1566.

temere vendant, vel ea, quæ vim habere censentur impediendi foeminarum conceptus, vel abortus provocandi. De his ergo quærendum est sacramentali conscientiarum iudicio, ac dispiciendum, an forte quidpiam actum fuerit, quod suscepti officii integritati, ac fidei adversetur.

Administratores hospitalium, aliorumque piorum locorum, quæ alendis, subveniendisque pauperibus instituta sunt, impune possunt ea diripere, atque expilare, quum vix inveniatur, qui velit pauperum gratia improborum hominum odia, atque inimicitias sibi conflare eos in iudicium pertrahendo. Hinc plurimi sunt, qui huiusmodi locorum procurationem, & avide affectant, & libentissime suscipiunt, & iniquissime gerunt, sive eorum census in proprios usus convertendo, sive prædia sine legitimis licitationibus parvo locando amicis, & conjunctis, qui fructus absumunt, & fundos ipsos depopulantur, sive pecuniam iis mutuando, qui solvendo non sunt; nec adduci possunt, ut suæ administrationis computa, & rationes exhibeant; qui denique erogandas pauperibus eleemosynas minus fideliter, circumspicteque effundunt. Et isti quidem heu quam horrenda mala sibi consciscunt. Nam si male habebunt in die iudicii, qui de bonis suis pauperibus non subveniunt, quid tandem erit de iis, qui bona ipsa pauperibus attributa devorant, vel dispergunt? Quamquam, & in hoc seculo aliquam tanti piaculi poenam subeunt; nam eorum substantiam scrutatur foenerator, eorum bona alieni diripiunt, eorum filii mendicant, & ejiciuntur de habitationibus suis, ut quotidie usvenire conspiciamus.

His accensendi sunt, qui quum sacrarum ædium curam, & procurationem gerant, collatas a fide-

fidelibus eleemosynas, ut sacra suppellectili decenter instruantur, ut earum facta recta ferventur, ut divina mysteria in ipsis rite celebrentur, velut sacrilegi Heliodori distrahant, & in profanos usus impendunt, & quod maxime dolendum est, ac deplorandum, istiusmodi prædones ad sacramentum Poenitentiae saltem paschali tempore accedentes non profutura absolutione donari solent, & eucharisticae Communionis, non sine ingenti christiani populi offensione, participes fieri, propterea quod de prava piorum locorum, vel sacrarum ædium administratione nihil in confessione loquuntur, vel fallaci reparandi damna promissione in animarum suarum perniciem Sacerdotem decipiunt. Super his ergo iniqui isti administratores opportunis interrogationibus urgendi sunt, & a Sacramentis arcendi, donec quam possunt satisfactionem, & compensationem præstare coeperint, atque ita veræ poenitentiae haud dubia argumenta exhibuerint.

Inquirendum etiam, an qui hospitalibus præsumunt, infirmos & pauperes omni spiritali & temporali ope qua decet charitate & solertia juvari curent; an expositos infantes enutriendos, atque educandos suscipiant, ferenda enim non est eorum impietas, qui, ut piorum locorum rationibus prospiciant, miseros istos infantes alio deferri curant, quo sæpe fit, ut omni adjumento destituti miserrime intereant.

Multo plura, & graviora sunt Parentum, eorumque omnium, qui familias regunt, officia, & ex eorum neglectu mirum, quam ingentia mala in christianam rempublicam exundant. Inquirendum ergo, an contentur liberos in timore Domini educare, curentque eos christia-

næ religionis rudimentis imbui, orationi af-
fuefcere, actus fidei, fpei, & charitatis frequen-
ter elicere, ea implere, quæ in quotidiana chri-
ftiani hominis exercitatione præfcripta funt, fa-
cris myfteriis religiofe interefle, cumque per
ætatem licuerit, ad exomologefim, ad Confirma-
tionis, & Euchariftiæ facramenta accedere. An
folliciti fint ad chriſtianæ pietatis officia moni-
tis, atque exemplis eos adducere, a periculofis
fodalitatibus eos avertere, & pullulantia in eo-
rum animis vitia evellere. An eos pro conditio-
ne ſua decenter alant, atque ita inſtituant,
ut honeſtum aliquod vitæ genus ſuſcipere vae-
ant; an quenpiam ex liberis ob domeſticas ratio-
nes compulerint eccleſiaſticum; vel regularem
ſtatum amplecti. An noctu ſecum in thalamo
retinuerint puerilis ætatis filios, quod eorum
innocentiæ eſſe poteſt quammaxime noxium,
vel lactentes ſine cunarum, vel alterius repaguli
cautione, quod certe non vacat ſuffocationis pe-
riculo. An paſſi fuerint pueros, & puellas in
eodem cubiculo, vel quod turpius eſſet, in eo-
dem lecto diſcumbere. An toleraverint uxorem,
aut filias denudatis humeris, ac pectore in-
cedere.

Quam maxime autem hortandi ſunt chriſtia-
ni parentes, ut bonum Tobiam imitentur, qui
filium ſuum ab infantia timere Deum docuit
(a), nimirum ut a primo ipſo rationis crepu-
ſculo filios ſuos doceant rerum omnium con-
ditorem, & rectorem Deum ubique nobis præ-
ſentem credere, *in ipſo enim vivimus, & move-
mur, & ſumus* (b); immentæ propterea ejus Ma-
jeſtati ſummam ubique reverentiam adhibere,
nihil agere, loqui aut cogitare, quod ipſi diſ-
pli-

(a) Tob. 1. 10. (b) Act. XVII. 18.

pliceat; omnia in ejus honorem, & gloriam dirigere; divina mandata accurate implere; Dei autem voluntatem in ipsa parentum voluntate agnoscere; ut curent filios suos avertere a mendaciis, ab aliorum contemptu, irrisione, atque offensione, pueriles autem noxas, quas sincere confessi fuerint facile condonare, ac remittere, & in operibus charitatis, & misericordiæ eos adhibeant. Festinabit profecto innata concupiscentia pravos in eorum cordibus affectus excitare. Festinabit corruptus mundus vitiorum omnium exempla, atque irritamenta ipsis exhibere. Festinabit diabolus ignitis tentationum telis eos impetere. Nitantur ergo parentes christianæ pietatis exercitatione liberos suos a teneris unguiculis informare, eorumque animos sincero Dei timore, atque amore adversus tam validos hostes communire; ne cito cogantur ob depravatos eorum mores uberes lacrymas fundere inutiliter.

Ad reliquam familiam quod spectat, sciſcitantur, an curent domesticos inter se pacem fervare, dies festos religioſe colere, ad Poenitentia, & Eucharistia sacramenta frequenter accedere, popinas, aleas, commestationes, choreas, ganeonum consortia, ac pravas quascumque familiaritates, & consuetudines vitare. An humaniter ac benigne cum ipsis agant, pactam mercedem persolvant, & ægrotantibus, aut senio confectis opem ferant, quandoquidem *qui suorum, & maxime domesticorum curam non habet, fidem negavit, & est infideli deterior* (a).

AR.

(a) 1. Tim. V. 8.

*De interrogandis viris ecclesiasticis pro
vario eorum ordine, & ministerio.*

QUum Ecclesiæ ministris, qui christiano populo præsunt, durissimum in extremo die maneat iudicium, accuratissimum quoque a confessorio de iis, quæ ad ipsorum munus, atque officium pertinet, instituendum est examen.

I. Ac primo quidem *de divina vocatione*. Nulli hominum fas est sine divina vocatione Sanctuarium Domini per Sacros Ordines temere ingredi; scriptum est enim: *Quos elegit Dominus, appropinquabunt ei* (a); *ne quisquam sumit sibi honorem sed qui vocatur a Deo, tanquam Aaron* (b). Sed maxima sane Ecclesiæ calamitas hæc est, quod multi ad Sacros Ordines accedunt, vel ut parentum voluntati pareant, qui terrenas tantum familiæ rationes, atque utilitates respiciunt, vel ut pacatam, & otiosam vitam agant; quasi non essent laboriosissima, & anxie sollicitudinis plena ecclesiastica ministeria; vel ut opes possideant sub Christo paupere, quas, sub divite Mundo sperare non possent, vel ut dignitates aucupentur in Ecclesia, qui abjecti, & contemptibiles essent in seculo. Et isti quidem si ad majores Ordines, atque ad Sacerdotium evehantur, fiunt christiano populo in laqueum, & in scandalum; quandoque enim plus valent ad Ecclesiæ destructionem, quam optimi Sacerdotes ad ædificationem.

Hos igitur prudens conscientiarum moderator a proposito detertere nitatur, & antequam ejus probeat consilium, qui Tonsura ini-

tia-

(a) Num. XVI. 5.

(b) Hebr. V. 4.

tiari, & ecclesiasticis ministeriis mancipari desiderat, diligenter consideret, an divinæ vocationis notæ in ipso eluceant; nimirum vitæ integritas, & morum sanctimonia, mite, ac docile ingenium; frequens ad Poenitentiae, & Eucharistiæ Sacramenta accessus, assiduitas orationis, accurata sedulitas in catechesibus, in sacris cæremoniis, in divinis mysteriis atque officiis, quæ in Ecclesia celebrantur; diligens humanarum, divinarumque literarum studium eo fine susceptum, ut sacerdotalia munia digne, fructuoseque implere valeat; firma denique, & sincera voluntas se totum impendendi in iis ministeriis, quæ Dei cultum, & animarum salutem respiciant; quibus quidem notis, atque indiciis qui caret, a sacris Ordinibus omnino arcendus est.

Si quis autem inveniatur, qui non vocatione divina, sed temere, aut humano ambitu ad superiores Ordines, vel ad Sacerdotium ipsum conscenderit, monendus erit, ut poenitentiam agat, nervisque omnibus nitatur Ordinis sui officia fideliter implere, & adversa omnia fortiter superare, implorata fervidis precibus divina ope, ut fecisse legimus Apostolos in navicula fluctuantes, qui quum esset contrarius ventus, erant laborantes in remigando (a), & exorta procella dormientem Dominum excitarunt illis vocibus: *Domine, salva nos, perimus* (b).

II. *De clericalis vitæ ratione.* Ut clericali ordini constet autoritas, & debitus ipsi honor ab universo populo habeatur; tum etiam ut quotquot in sortem Domini vocati sunt, & sacris ministeriis addicti, externi cultus habitusque

(a) *Marc. VI. 48.*

(b) *Matth. VIII. 25.*

que gravitate, ac modestia compositionem animi præferant, saluberrimis Conciliorum, & Summorum Pontificum decretis constitutum est, ut clerici omnes clericalem tonsuram, seu coronam gestent, & habitum ecclesiasticum, nigram scilicet vestem, & talarem, seu usque ad talos productam in omnibus ecclesiasticis ministeriis omnino abhabeant (a). Hujusmodi autem leges gravium poenarum sanctionibus communitas sine piaculo violari non posse manifestum est.

Quapropter qui per intolerabilem temeritatem, religionisque contemptum sine clericali corona incendunt, vel comam, sive nativam, sive adscititiam in humeros diffluentem, vel calamistro crispatam, unguentis delibutam, & pulvere conspersam gerunt, qui laicali cultu, & vestitu incedunt; qui ad sacra munia in Ecclesia obeunda talarem vestem non deferunt, si ecclesiasticis legibus parere nolint, sine sacramentali absolutione dimittendi sunt, & ab ecclesiasticis ministeriis prohibendi.

Quotquot ad sacros Ordines assumuntur, in vineam Domini vocantur, ut in ea strenue operentur. Non ergo ad ignavum otium vocantur, non ad voluptates, aut terrenas curas, sed ad laborem in ecclesiasticis ministeriis, officiiisque impendendum, ut quum portaverint pondus diei, & æstus, pactam mercedem ab optimo Patrefamilias accipere mereantur. Quamobrem turpiter officio desunt, qui tempus inu-

(a) *Conc. quinisextum cap. Nullus. Conc. Lateran. III. Œcum. sub Alex. III. Conc. Vienn. Œcum. sub Clem. V. Clementina tit. de vita, & honestate Cleric. Concil. Triad. sess. xiv. de reform. can. vi. item sess. xxv. decr. de reform. cap. 1. Sixtus V. Const. Cum Sacrosancta.*

inutiliter terunt, qui dum divina mysteria ab aliis in Ecclesia celebrantur, dum divinæ laudes canuntur, dum catecheses habentur, dum Dei verbum populo annuntiatur, dum in ecclesiasticorum virorum coetibus theologico-morales quæstiones expenduntur, vel in platea deambulant, vel in otiosorum hominum coetibus versantur.

Gravioris autem piaculi rei sunt, poenisque per sacros Canones sancitis obnoxii, qui non verentur venationi, aleæ, lusibus, choreis, scenicis spectaculis indulgere, vel dare operam quæstuosis negociis, & eorum causa frequenter adire mercatus, & nundinas, & crebris litibus judicem fatigare. Accedit quod istiusmodi Sacerdotes Superioris Ecclesiastici monita ac præcepta contemnere solent, eisque obsequentes irridere, discordias, & simulates excitare, graves molestias afferre loci Parocho, & populi odium in ipsum conflare. Porro hi omnes a via salutis longe absunt; nec comparati censendi sunt ad Sacramenti gratiam recipiendam, quando in ejusmodi lacrymabili consuetudine versantur.

III. *De Horis Canonicis.* Quisquis ex Ecclesiæ præcepto, sive ob Ordinem sacrum, in quo constitutus est, sive ob ecclesiasticum, quo donatus est, beneficium, sive ob religiosam professionem divinas laudes, ac preces per Horas Canonicas distributas persolvit, velut Ecclesiæ legatus pro tota ipsa Ecclesia, imo vera, inquit Chrysostomus, *pro universo terrarum orbe intercedit, deprecatorque est apud Deum, ut omnium hominum, non viventium modo, sed etiam mortuorum peccatis propitiis fiat* (a). Quapropter
quò

(a) S. Jo. Chrys. lib. vi. de Sacer. cap. iv.

quo die quisquam divinum Officium, vel notabilem ejus partem absque justa causa prætermittit, gravis peccati reus efficitur; quod si ecclesiasticum beneficium possideat, restitutioni fructuum obnoxius est ex decreto Concilii Lateran. V. sub Leone X., quod confirmatum, atque innovatum est a S. Pio V. Constit. edita die XII. Octobris an. 1571., cujus initium est: *Ex præscripto Lateranensis Concilii*. Restitutio autem facienda est *pro rata omissionis recitationis Officii, & temporis*, ut loquitur Concilium; & *fructus beneficii, tanquam injuste percepti, erogandi sunt in fabricam ipsius beneficii, & pauperum elemosynas*.

Sed videndum præterea, qua mentis attentione, & cordis devotione divinæ laudes persolvantur. Si enim deliberata mentis evagatione, & absque ullo pio cordis effectu id fiat, recitatio divinarum laudum non vera oratio dicenda erit, sed potius hypocrisis, ut docet S. Antoninus his verbis: *Clerici quoque, & Religiosi, cum dicunt divinum Officium, ... si voluntarie mente distrabuntur, hypocrisis est, quia ex ipso actu ostendunt se divinis vacare, quum mentem habeant ad inutilia, & vana, unde Dominus Jesus ait Matth. V. Hypocritæ, bene prophetavit de vobis Isaias dicens: populus hic labiis me honorat; cor autem eorum longe est a me. (a).* Et Sanctus Thomas in ejusmodi recitatione divinarum Horarum ecclesiastici præcepti violationem agnoscit; ait enim: *Dicendum quod attentio actualis, sive per essentiam, sive per virtutem requiritur ad orationem aliquo modo, vel ad evitandam transgressionem in illa, quæ est de præcepto, vel ad meritum in illa, quæ non est*
no-

de præcepto (a). Quapropter qui ita Horas Canonicas persolvunt, restitutioni per Lateranense Concilium præscriptæ obnoxii sunt.

Considerandum quoque est, an forte ita festinanter, ac præcipitanter persolvantur divinæ laudes, ut mutilentur verba, vel integra deglutiantur, ut sæpe faciunt viri ecclesiastici, qui diurnum hoc divini Officii pensum ægre, ac moleste ferunt, nec aliud magis curant, quam ut ab eo se se citissime expediant.

Notandum denique Canonicos, aliosque chori servitio addictos muneri suo deesse, & temporales fructus, seu distributiones sibi vindicare non posse, si aliis canentibus sileant, vel suppressa voce divinas laudes submurmurent; si absque justa causa extra tempus vacationibus concessum a choro absint; si ad chorum accedant divinis officiis dudum inchoatis, vel ad eo discedant, antequam fuerint absoluta.

IV. *De celebratione Missæ*. Tremendum hoc ministerium, quo nihil sanctius, atque augustius excogitari potest, turpissime profanatur a Sacerdote, qui minus sancte religioſeque illud obeat, præcipue vero si sacrosanctam hostiam cum certa, aut dubia lethalis peccati conscientia offerre audeat; si ad altare sine clericali tonsura, & oblonga veste, quam talarem vocant, vel indecòro habitu, cultuque corporis accedat, si nullum, aut nimis breve tempus ante, & post Missam orationi tribuat; si ita festinanter Missam celebret, ut vix uno quadrante horæ tantum opus absolvat; si præcipiri lingua quæ legenda sunt percurrat ac devoret, præsertim in canone, vel quæ agenda sunt præpropere agat, quæ quidem omnia irreligiosi animi sunt, &

(a) *S. Th. in iv. dist. xv. qu. iv. art. 11. quæstiunc. iv.*

& omnis pietatis sensus expertis, & gravis offensionis causam populo exhibent.

Infidelis quoque, atque indignus esset altaris minister, qui susceptis celebrandarum Missarum oneribus non integre satisfaceret, vel qui ab altero Sacerdote Missas celebrari curaret, partem aliquam acceptæ stipis sibi retinendo, quo quidem turpis lucri detestabili crimine sibi conscisceret sanctam poenam suspensionis sanctæ Sedi reservatæ (a).

V. *De administratione Sacramenti Pœnitentiæ*. Sanctissimo hoc ministerio nefarie abuteretur Sacerdos qui in ipsa sacramentali confessione, vel ejus occasione, aut simulata ipsius specie ad turpia, atque inhonesta quoquo modo quempiam sollicitaret, ac provocaret, atque ita pro curatione vulnus, pro pane lapidem, pro pisce serpentem, pro medicina venenum porrigeret, ut loquitur Benedictus XIV. in sua Constitutione edita 1. Junii an. 1741., cujus initium est: *Sacramentum Pœnitentiæ*.

Officio quoque suo non sine gravi culpa deesset hujus Sacramenti minister, si poenitentes quos novit ab alio sollicitatos, non moneret de obligatione denunciandi sollicitationis authorem, & sacerdotalementem absolutionem ipsis impertiret, antequam reum indicaverint ecclesiastico judici, vel saltem se, cum primum poterunt, delaturos spondeant, ac promittant, ut statuit idem Pontifex laudata Constitutione.

Perperam quoque se gereret Sacerdos, si, quæ caret auctoritate uti auderet, sacramentalem absolutionem ei impertiendo, qui per se, vel per alios infontem Sacerdotem accusasset, nam idem Sanctissimus Pontifex memorata Constitutione sibi

(a) *Bened. XIV. Const. Quanta cura 30. Jun. 1741.*

sibi, & Successoribus suis potestatem hanc reservavit, adeo ut nullus Sacerdos quavis auctoritate ac dignitate munitus ea uti valeat, nisi erga poenitentem in fine vitæ, & in mortis articulo constitutum.

Per eandem Constitutionem sancitum est, ut *ne quis extra casum extremæ necessitatis, nimirum in ipso mortis articulo, & deficiente tunc quocumque alio Sacerdote, qui confessorii munus obire possit, confessionem sacramentalem personæ complicitis in peccato turpi, atque inhonesto contra sextum decalogi præceptum commissæ excipere audeat & si quis confessorius secus facere ausus fuerit, majoris excommunicationis poenam, a qua non nisi Summi Pontificis auctoritate absolvi possit, ipso facto incurrat.*

Aliis quoque ejusdem sapientissimi Pontificis Constitutionibus gravissimarum poenarum sanctione munitis districte prohibetur, ne quis confessorius temere, & sine justa causa (qualis certe censenda non esset, ut ait idem Pontifex, *procurenda alterius correctio*) patrati criminis socium, seu participem sibi per nomen a confitente manifestari curet, vel quoquomodo indicari; tum etiam ne quis audeat damnatam hanc praxim tueri ac defendere, quæ alterius famam lædit, gravem injuriam sacramento Poenitentiae infert, & ab ejus participatione atque usu fideles avertere valet. Quæ quidem omnia in mentem revocanda sunt, ne a memoria excident.

Gravibus etiam peccatis se se oneraret Sacerdos, qui ad audiendas fidelium confessiones accederet cum conscientia peccati lethalis, quin ipsum per poenitentiam expiare curaverit; tum etiam qui doctrina theologico-practica leviter instructus non nitatur assiduo studio, & frequenti

D

ex-

exercitatione in ecclesiasticorum virorum coetibus in ea proficere qui arduos, & implicatos casus in audiendis confessionibus occurrentes temere dirimeret sine matura consideratione, & consultatione; qui author esset, ut restitutio pro damno illato, vel re accepta Ecclesiae potius, aut pauperibus fiat, quam iis, qui rei suae detrimentum patiuntur; qui noxia prodigalitate absolutionem largiuntur ignaris mysteriorum Fidei, aut sufficientia veræ poenitentiae indicia non exhibentibus; qui per incuriam, vel culpabilem incogitantiam ultra præfinitur traditæ sibi facultatis tempus, vel in casibus Sanctæ Sedi, aut Episcopo reservatis absolutionem consentientibus impenderet; qui denique poenitentes ad integram peccatorum suorum confessionem juvare negligeret, vel ad contritionem aptis motivis excitare, vel in viam salutis opportunis monitis, & cohortationibus dirigere.

VI. *De pastoralî ministerio.* Gravissimum sane onus vel ipsis angelicis humeris formidandum suscipiunt Parochi, eorumque Vicarii, omni sive Ecclesiae Prælati, quibus animarum cura demandata est; oportet enim ut non sibi vivant, sed Christo, & ejus gregi sibi credito, pro quo ipse Christus mortuus est (a); nimirum ut *exemplum sint fidelium in verbo, in conversatione, in charitate, in fide, in castitate*, ut monet ipse Apostolus (b); ut gregem suum mercenariorum more non deserant, sed apud ipsum continenter maneamus juxta saluberrimum Concilii Tridentini decretum (c),
nec

(a) 11. Cor. V. 12.

(b) 1. Tim. IV. 12.

(c) Conc. Trid. sess. XXIII. de Ref. cap. 1. item sess. VI. cap. II.

nec nisi urgente de causa ab ecclesiasticis Superioribus cognita, & probata a statione sua discedant, quumque id fieri contigerit, idoneo Sacerdoti Ecclesiam suam commendatam relinquunt; ut per semetipsos, quoad ejus fieri potest, populum doceant, divini verbi dispensationi, & Sacramentorum administrationi sedulo incumbant, nec vicaria aliorum Sacerdotum opera utantur, nisi ut universi Populi necessitatibus, quibus ipsi impares sunt, satisfacere valeant; ut diebus Dominicis, aliisque festis, quibus fideles sacris mysteriis interesse jubentur, Missæ Sacrificium offerant pro Populo, nulla eleemosyna pro ejus celebratione accepta; ut vigilias fideliter custodiant super Christi gregem, ne lupo oves invadat, ac devoret, & si qui sint scelesti homines, qui christianos mores corrumpant, vel perversa dogmata, & perniciosos libros disseminant, eos emendare studeant, & contumaces Superioribus denuncient, ne in animarum perniciem impune grassentur; ut odia, dissidia, simultates, inimicitias, siquæ in populo suboriantur, impensissimo studio lenire, ac sedare studeant; ut ægrotantes frequenter invisant, solentur, ac juvent; ingravescente autem morbo, Ecclesiæ Sacramentis eos communiant, & ad extremum usque spiritum ad christianæ pietatis actus excitare nitantur; ut orphanorum, & viduarum paternam curam gerant, & pauperum necessitatibus impensissime subveniant, & caveant quammaxime, ne ex redditibus Ecclesiæ propinquos augeant (a), nec putent se pastoralis officio satisfacere, si ex conflata pecunia beneficium aliquod ecclesiasticum, seu fa-

D 2

cer-

(a) *Conc. Trid. Sess. XXV. Cap. I.*

cerdotium instituunt, reservato agnatis, & propinquis, eorumque successoribus ejus patronatu, & nominationis jure; nam qui id faciunt, consulere volunt consanguineis, non Ecclesiæ, cujus vera calamitas dici possunt hujusmodi beneficia.

- Ad pastorale ministerium propius accedit spirituale regimen sacrarum Virginum, quæ, ut sæculi inquinamenta declinarent, intra septa monasterii, velut columbæ in arcam, se se receperunt, & jure optimo cum S. Cypriano appellari possunt illustrior portio Gregis Christi. Præcipuum autem Sacerdotis ad ejusmodi officium assumpti munus est solertissimam adhibere curam, ut solemnia vota, quibus fidem suam cælesti Sponso obstrinxerunt, fideliter impleant, susceptaque instituta diligenter servent; quotiescumque opus facto esse existimaverit, non vereatur in sacramentali confessione eas monere, ut considerent, num forte paupertatis votum violaverint, sive res, aut pecuniam apud se retinendo, Abbatissa, seu Præfecta inscia, vel invita, sive quidpiam ex rebus vel propriis, vel communis utilibus destinatis suo arbitrio erogando; num pravo aliquo, vel periculoso affectu quempiam profectæ fuerint, cum eoque familiariter egerint sive per verba, sive per epistolas; num Superiorum monita ac præcepta contempserint, vel filialis observantiæ, ac reverentiæ, quæ ipsis adhibenda est, officio defuerint; num extra clausuræ limites pedem efferre ausæ sint; vel in causa fuerint, quod ab externis hominibus violarentur clausuræ leges per Tridentinum Concilium (a), & per Summos Pontifices Boni-

nifi-

(a) *Conc. Trid. Sess. XXV. c. V. de Regul. & Monal.*

nificium VII (a), Pium V. (b), & Gregorium XIII. (c) promulgatæ, & gravissimæ poenæ sanctione communitæ, excommunicationis scilicet latæ sententiæ, quem quidem scopolum facile offendunt janitrices, quæ monasterii fores minus accurate custodiunt, maxime vero Abbatissæ, si septa monasterii quempiam ingredi permittant absque licentia ab Ordinario facta, vel illos ipsos, qui de eius licentia ingrediuntur, per monasterium vagari finant, vel in ipso cibum sumere, quæ quidem etiam per Synodales Constitutiones vetita sunt (d). Nec sane prætermittendum est examen super diligentia, & studio regularis disciplinæ, quæ crebris institutorum violationibus passim dissolvitur, accedente potissimum Abbatissæ tolerantia, quæ sæpenumero non vacat lethali culpa, tum etiam super charitatis, & benevolentia officii erga sorores, & pace, atque concordia, semotis dissidiis, & simultatibus, diligenter servanda. Inquirendum denique, an puellarum intra septa monasterii commorantium solertissima, ut decet, cura habeatur, an a seculi pompa, & elegantiori cultu atque ornatu avertantur, & optimis christianæ vitæ institutis informantur.

Hactenus de variis officiorum generibus, ac de peccatis, & vitiis, in quæ pro varia status, conditionisque ratione passim labuntur homines ob ipsorum officiorum neglectum, aut contemptum. Videant nunc confessarii, quæ.

(a) Bonif. VII. cap. periculoso de statu Regni. in 6.

(b) S. Pius V. Constit. quæ incipit circa pastoralis officii 29. maji. 1566. & alia Decori, & honestati 1. febr. 1569.

(c) Greg. XIII. Constit. Deo sacris 29. dec. 1572.

(d) Synodus Montisreg. habita an. 1763. cap. XXII.

quænam potissimum interrogationes adhibendæ sint, ut cujusque status, & conditionis poenitentes sua agnoscant peccata, eaque ex animo detestentur, & constanter vitare statuunt, & in novitate vitæ salutem suam operari. Equidem raro contingit, ut de re aliqua eos interrogare oporteat, qui conscientiæ suæ latebras (quod facile ex ipsa confessione dignosci potest) accurate perscrutantur, vel quorum mores, & anteaactæ vitæ ratio ex præcedentibus confessionibus innotescunt. Verum rudes homines, ignari, ac plumbei, tum etiam qui seculi curis, aut oblectamentis in diversa distracti de æternæ salutis negotio parum solliciti sunt vel diuturna peccandi consuetudine retusam, & consopitam conscientiam gerunt, multis urgendi sunt interrogationibus, ut omnia peccata sua agnoscant, confiteantur, deplorent, & pravos mores emendare firmiter statuunt.

Idem charitatis officium præstandum est poenitentibus, qui in discussione conscientiæ suæ juvari postulant, maxime in confessionibus generalibus, tum vero etiam graviter decumbentibus, & in mortis periculo constitutis, qui vi morbi oppressi, ac prostrati nequeunt per se omnes anteaactæ vitæ annos recogitare in amaritudine animæ suæ, & omnia, quæ perpetrarunt peccata in mentem revocare.

Si autem quispiam occurrat, qui non audeat turpe aliquod crimen in confessione aperire, blandis eum verbis, & paterno affectu hortetur Sacerdos, ut illud confiteri non vereatur apud hominem miserrimum, qui, dum vivit, in maximo versatur periculo graviora perpetrandi scelera, si Deus tantisper ab ipso re-

recedat; tum etiam ipsi denunciēt nullius peccati veniam obtineri posse, si vel unum tantum in confessione celatum fuerit, imo vero ceteris peccatis adjungi horrendum scelus sacrilegii; omnia autem peccata, quæ non fuerint per Pœnitentiæ Sacramentum rite sancteque susceptum deleta, non uni tantum homini, sed universis Angelis, atque hominibus manifestanda fore in extremo judicio.

Si autem pœnitens adhuc hæreat, & turpe aliquod crimen evomere non audeat præ erubescencia, eum interrogare juverit, ex gr. an foedissimum aliquod scelus perpetraverit; an forte in ipsum centies, aut millies lapsus fuerit; sic enim facile adducetur, ut minora, aut pauciora Confessario aperiat. *Diligens inquisitor, subtilis investigator sapienter, & quasi astute interroget a pœnitente, quod forsitan ignoret, vel præ verecundia velit occultare (a).*



CA-

(a) S. Aug. vel alius author tractatus de vera & falsa pœnitentia.

CAPUT IV.

*De commonendis confitentibus, & ad
veram poenitentiam, vitæque
emendationem excitandis.*

ARTIC. I.

*De commonendis peccatoribus vitio aliquo
corruptis.*

Perspectis spiritualibus confitentium morbis, superest ut eorum curationem suscipiamus, & opportuna remedia ipsis adhibeamus; ineptissimus enim, & amens censeretur medicus, qui cum accurate consideraverit gravem cujuspiam morbum, ejusque naturam, causas, effectus, & symptomata investigare curaverit, nihil de curatione cogitet, & quin ullum ægro præscribat pharmacum, ullumque adhibeat remedium ipsi valediceret.

Itaque siquos reperiemus vitiis deditos, & peccandi consuetudine irretitos, eorum considerationi proponemus funestissimæ mortis periculum, quod ipsis imminet, tremendum Dei judicium, æternæ maledictionis fulgur, acerbissima, & nunquam finitura supplicia, eosque enixe obsecremus, ut *non tardent converti ad Dominum, nec differant de die in diem: subito enim veniet ira illius, & in tempore vindictæ disperdet eos* (a); ut divitias divinæ bonitatis, & patientiæ nolint diutius contemnere, nec per duritiam suam, & impoenitens cor thesau-

(a) *Ecl. V. 3. 9.*

rizent sibi iram in die iræ (a) ; ut viam salutis statim ineant , in eaque constanter progrediantur , dum lucem habent , jam enim nox ingruit , in qua nemo potest operari (b) .

Gravius autem corripiemus peccatores , qui post iteratas confessiones in ea ipsa peccata , quæ confessi sunt , facile relabuntur , & perpetuo ita , & reditu a confessione ad peccatum , a peccato ad confessionem , datam Deo fidem violant , & sibi viam sternunt ad finalem impoenitentiam , quandoquidem crebri in peccata relapsus horrorem peccati minuunt , concupiscentiæ vires augent , voluntatem infirmant , atque enervant , & faciunt , ut validiora divinæ gratiæ auxilia merito ipsis subtrahantur , quibus destituti miserrime ruunt in interitum sempiternum . Quoniam vero censendum est , confessiones , quas nulla subsequuta est emendatio , nullusque peculiaris nifus ad evitandum peccatum , sacrilegas fuisse , aut saltem irritas , atque inanes , curandum omnino , ut a poenitente repetantur confessiones ab eo tempore , quo coepit alicujus vitii morbo laborare .

Quoniam vero ex ignorance divinæ legis , eorumque officiorum , quæ universo christiano populo communia sunt , vel pro sui status muneriſque ratione cuique incumbunt , innumera prodeunt peccata , & incredibilis existit animarum perniciēs ; quos in hac lacrymabili ignorantia versari noverimus , erudire conabimur , serioque monebimus , ut assidue publicas catecheses excipiant , sibiſque etiam consciscant peculiarem aliquem magistrum , a quo accurate doceantur .

Qui in proxima peccandi occasione volun-

E

12.

(a) Rom. II. 4. 5.

(b) Jo. I. 9. 4.

tarie versantur, monendi sunt, ut eam illico amoliantur, ac fugiant, tanquam a facie colubri (a), tametsi id, quod peccandi occasionem præbet, dextera manu, aut pede, aut oculo carius sit, atque utilius, quum juxta saluberrimum Salvatoris nostri monitum melius sit debilem, vel claudum, vel luscum introire in regnum Dei, quam duas manus, duos oculos, vel duos pedes habentem mitti in gehennam ignis sempiterni (b). Non raro contingit, ut occasio peccandi non voluntaria sit, sed necessaria sive physica, sive morali necessitate. Tum vero qui in ejusmodi occasionibus constituti inveniuntur, magnopere hortandi sunt, ut adversus peccandi pericula se se communiant spiritualibus præfidiis, per quæ proxima peccandi occasio evadat remota. Hæc autem præfidia sunt salutaris poenitentiae opera, de quibus infra capite VII.

Peccatores, qui suam ad Deum conversionem moliuntur, internam experiri solent luctam inter carnem, & spiritum. *Caro enim concupiscit adversus spiritum, spiritus autem adversus carnem* (c); nimirum spiritus in Deum tendit, eique adhærere optat per divinæ legis custodiam; caro vero tenaciter adhæret vanitatibus mundi, & sensuum voluptatibus, & christianam viam reformidat, ac refugit ut morte ipsa amariorem. Hos porro internos tumultus passus est Augustinus, quum de incunda salutis via secum deliberaret, & in utramque partem fluctuabat, ac moras nectebat Christi jugum perhorrescens. Quum vero, abrupta per divinam gratiam ferrea illa catena, quam ipse sibi diuturna peccandi consuetudine fabri-

ca-

(a) *Eccles. XXI. 2.*(b) *Marci IX. 42. 44. 46.*(c) *Gal. V. 17.*

catus fuerat, in libertate filiorum Dei respirare coepit, statim sensit quam magna sit multitudo ejus dulcedinis, quam abscondit Deus timentibus se (a), quam miseræ, ærumnosæ, & amaritudinum plenæ seculi vanitates, sensuumque voluptates, ac libidines, quas tanto ardore antea prosequabatur: *Quum subderem cervicem levi jugo tuo, & humeros levi sarcinæ tuæ, Christe Jesu adjutor meus, & redemptor meus, quam suave mihi subito factum est carere suavitatibus nugarum! & quas ammittere metus fuerat, jam dimittere gaudium erat* (b). Non absimili voluptate, & gaudio afficiuntur quotquot ad Deum, a quo per peccatum longe discesserant, per poenitentiam revertuntur, & in ipsis poenitentiae lacrymis puram illam, & sinceram voluptatem percipiunt, de qua loquitur Augustinus memorato lib. IX. c. 6., ubi ait: *Eligebatur veritas in cor meum, & ex ea aestuabat affectus pietatis, & currebant lacrymæ, & bene mihi erat cum illis.*

Erigendi ergo sunt meticulosi isti peccatores spe illius jucunditatis, qua perfundentur eorum animi, si non amplius suis cupiditatibus, sed Deo unice servire incipiant, ejus mandata fideliter custodiendo. Bonum enim conscientiae testimonium ab ipsis ethnicis Philosophis tantopere commendatum veluti jucundissimum convivium, quo probi homines recreantur, æternæque mercedis spes, quæ divinis promissionibus nititur, in omnibus hujus vitæ ærumnis eos mirifice solantur, ut cum Apostolo veraciter dicere possint: *repletus sum consolatione, superabundo gaudio in omni tribulatione nostra* (c),

E 2

vel

(a) Ps. XXX. 20. (b) S. Aug. Conf. lib. IX. c. 1.

(c) II. Cor. VII. 4.

vel cum Regio Psalte: *Quam magna multitudo dulcedinis tuæ, Domine, quam abscondisti timentibus te* (a). Charitas Christi in eorum cordibus diffusa facit, ut omnia divina mandata levia sint, ac suavia, & veluti alas subministrant, per quas animus valeat ad Deum assurgere.

Deum esse summum hominis bonum, in eoque sitam esse veram, perfectam, ac perennem hominis felicitatem & fides docet, & ratio ipsa commonstrat; qui autem Deo per hanc vitam adhærent, specimen aliquod perferunt ejus felicitatis, quam expectant in cælis, ubi arctissimo, & indissolubili fœdere ipsi erunt conjuncti. Hinc est, quod miram animi tranquillitatem, atque hilaritatem constantissime præferunt, neque externa se oblectamenta, & solatia quærunt, quum intus in corde habeant perennis consolationis fontem. Non sic impii, non sic, sed acerbissimis conscientię moribus nullo non tempore excruciantur, & vehementi futurorum metu concutuntur. Secum habitare nequeunt, & extra se exire coguntur, ut quicquam arripiant, quo animum fluctuantem fulciant, ne in interitum moerorem prolabatur. Veruntamen omnia terrena bona, omnia hujus seculi oblectamenta inania, & fluxa non valent sustinere animum ad majora natum, qui nonnisi in Deo tranquillitatem & quietem invenire potest. Hinc veluti naufragi ad alia, atque alia aquarum volumina indefinenter conatu extendunt brachia, ne demergantur. Sed deficient in morte, atque evanescent vana hæc, & misera fulcimenta, ipsi vero in profundum tormentorum barathrum descendant quasi lapides (b). His igitur, aliisque id genus rationibus,

&

(a) *Psul. XXX. 20.*

(b) *Ex. d. XV. 5.*

& cohortationibus adducendi sunt peccatores, ut omni timore pulso, christianæ vitæ viam alacriter ineant, & strenue progrediantur.

A R T I C. II.

*De iis, qui tepiditate, & languore
spiritus laborant.*

EX iis, qui ad poenitentiae Sacramentum frequenter accedunt, plurimi inveniuntur infirmi spiritu, languidi, desides, ac repidi, qui in minores noxas quotidie labuntur plena voluntatis deliberatione; sibi autem placent, sibi que plaudunt, propterea quod mortifera peccata averfantur, & vitare nituntur. Non furantur, sed suis bonis tenaciter adhærent, & erogandæ eleemosynæ præceptum pro sui status ratione ægre implent. Graves iniurias nemini inferunt, sed facile alios irrident, aut vellicant, eorumque mores carpunt. Non negligunt omnino jejunia ab Ecclesia præcepta: sed in ipsis jejuniis delicias quærent. Dominicis, & festis diebus nullum servile opus faciunt, & sacrosancto Missæ sacrificio interfunt, sed parum assidui sunt in aliis christianæ pietatis, & religionis officiis, quæ ad festorum dierum sanctificationem pertinent. Pudicitiam abjicere nolunt, sed sensus suos non satis caute custodiunt, nec violandæ per internos saltem actus castitatis pericula vitare satis student. Multas fortasse preces quotidie fundunt, sed summis labiis plerumque Deum honorant, cor autem eorum longe est ab eo, deficiente nimirum mentis attentione, & pio cordis affectu. Sacramenta frequenter suscipiunt, sed sine devotionis fer-

vore, & parum fructuose, nullum enim faciunt in via virtutis progressum. Humiles sunt quandiu laudibus ornantur, & honoribus afficiuntur; mites, & mansueti, quandiu a nemine læduntur; patientes, quandiu nihil molestum occurrit, & omnia votis cedunt; suavi & jucundo vitæ genere delectantur, christianam autem mortificationem reformidant; coronari vellent sine certamine, & sine ingenti vi, & conatu sempiternum illud regnum adipisci, de quo scriptum est: *Regnum cælorum vim patitur, & violenti rapiunt illud* (a). Hinc fit, ut falsam sibi efforment conscientiam, eas facile amplectendo opiniones, quæ cupiditatibus favent, cum evangelica vero doctrina haud satis cohærent, eamque ineant viam, *quæ videtur homini recta, novissima autem ejus deducunt ad mortem* (b).

Miserrima hæc animi habitudo, & constitutio languor quidam est spiritus, & similia habet cum corporis languore symptomata; qui enim spirituali hoc morbo laborant, meliora averfari, ac nauseare solent, pias scilicet exercitationes, quæ saluberrima animæ nutrimenta sunt, seculi autem illecebras, & sensuum oblectamenta expetere, quemadmodum Israelitæ in deserto cælestis mannæ pertæsi cæpis, & carnibus Ægypti inhiabant. Nullum in via Domini movere valent gressum sine ingenti nisu, & conatu, & qualibet viæ asperitate, aut difficultate perterriti ab incepto desistunt, ac recedunt. Levis divinæ legis sarcina gravissima ipsis videtur, studentque perpetuo aliquid momenti, ac ponderis ipsi detrachere. Sibimetipsis graves sunt, & tædio, ac moerore conficiunt.

(a) Matth. XI. 12. (b) Prov. XIV. 12.

ciuntur, siquidem & cælestibus carent consolationibus, quibus se indignos exhibent, & terrenis voluptatibus non audent libere frui, obistente conscientia, vel sui status ratione, ac decori studio id prohibente; & quod longe tristissimum, ac funestissimum est, de emendatione vitæ parum cogitant, nec commoventur tremenda illa Dei comminatione: *quia tepidus es, & nec frigidus, nec calidus, incipiam te vomere ex ore meo* (a).

Porro qui huiusmodi morbo conflictantur, monendi sunt gravissimi, in quo versantur, periculi, ac magnopere hortandi, ut in iis, quæ colere utcumque solent, christianæ pietatis, & religionis officiis rectum sibi finem proponant, nimirum placendi Deo, in iisque adhibeant omnem animi attentionem, & pium cordis affectum, sic enim non modo sine labore, ac tædio, sed suavissima jucunditate, ac voluptate ea implebunt, adjuti scilicet divinæ gratiæ præsiidiis, & spe illecti æternæ retributionis, quandoquidem qui secus faciunt dura omnia, ac difficilia experiuntur, & majori labore, ac sumptu nihil omnino lucrantur.

Tum vero etiam adducendi sunt, ut vacent quotidie orationi, & rerum æternarum meditationi, & huic officio, quod tanti momenti est, certum tempus constituent, nec putent sibi propterea defuturum esse tempus in iis negotiis, quæ ad suum statum, ac munus pertinent, necessario impendendum; nam quotidiana oratio, ac meditatio plus temporis pro aliis honestis curis suppeditat, removendo scilicet animum ab inanibus colloquiis, a nugis, & ludis, & noxiis mundi solatiis, atque oblectamen-

E 4

(a) *Apoc. III. 16.*

mentis, in quibus tempus inutiliter, ac miserrime conteritur.

Suadendi quoque sunt ac persuadendi, ut reliquas amplectantur pias exercitationes, quas superius præscribendas esse diximus iis, qui in vitiorum sordibus jacent, præcipue vero, ut frequenter perlegant acta Sanctorum ex indubiis documentis fideliter excerpta, in quibus praxis doctrinæ evangelicæ nobis exhibetur: mirum scilicet quantam vim habeant sanctorum exempla ad imitationis studium in corde excitandum, & quam multi ex eorum lectione, aut narratione christianæ perfectionis desiderio incensi ad sublimis sanctitatis apicem convolverint.

Adhibendæ quoque sunt validissimæ rationes, quæ nos compellunt, ut fideliter, constanter, fervidoque cordis affectu Deo serviamus; nam per singula vitæ nostræ momenta innumeris beneficiis a Deo cumulamur; per momenta singula propius accedimus ad tremendum illum diem, in quo vel de omni verbo otioso, quod locuti fuerimus, rationem reddituri sumus (a), & apud quem Judicem! apud Judicem justum, qui nos judicabit de lege nobis promulgata, de lege certa, firma, atque invariabili, quæ nec exceptionem patitur, nec derogationem, aut abrogationem, nec diuturni temporis prescriptionem; apud Judicem inexorabilem, qui nec precibus flectetur, nec lacrymis commovebitur; apud Judicem severum, qui violatores suæ legis damnabit poenis intensione atrocissimis, duratione æternis, & nullo temporis momento mitigandis. Fortasse nobis labitur extrema diei hora; an non ergo

ne-

(a) *Matth. XII. 36.*

necesse est, ut salutis nostræ opus celeriter, fortiterque urgeamus? Quod si longiusculum aliquod temporis spatium nobis supersit, an forte erit cur nobis facti poeniteat, si tantum opus statim agrediamur? An non laborum diuturnitati, ac ponderi respondebit æternæ mercedis magnitudo? Præterea Christus Salvator noster singula mortalis suæ vitæ momenta pro nobis impendit, & quam magnos labores per tulit, quot ignominias passus est, quam sæva tormenta, quam acerbam, atque indignam mortem, ut salvi essemus? Non ne ergo oportet, ut quum tandiu nobis, & terrenis rebus vixerimus, quod reliquum est temporis, Deo & rebus cælestibus vivamus?

Quanta porro diligentia, assiduitate, atque constantia officia sua obeunt, qui Principibus in eorum aula serviunt, vel pro ipsis militant in castris! Quam duros labores tolerant, quam multis periculis vitam suam obijciunt! Quid autem quærunt, quo ambiunt pervenire? Eo nempe, ut Principis gratiam, & terrenos honores assequantur. Sed in his quid non fragile, plenumque periculis, & per quot pericula pervenitur ad grandius periculum æternæ damnationis? Nos vero si adhæreamus Deo, si fideliter ipsi serviamus, jam ejus amicitia, & gratiæ compotes sumus, quam nec hominum invidia, nec rerum humanarum vicissitudines nobis eripere possunt, in eaque habemus certum pignus illius felicitatis, & gloriæ, qua in cælesti regno cum ipso perfruemur. Hac porro cogitatione perculsi sunt duo illi Valentiniani Imperatoris aulici, dum codicem legerant sibi fortuito oblatum, in quo descripta erat admirabilis vita magni Antonii solitudinum in-

incolæ, & Eremitarum parentis, & desiderio æterni præmii incensi, relicta Imperatoris aula, contemptisque mundi opibus, onoribus, ac deliciis, eremi solitudinem his omnibus anteponendam putarunt, ubi in jejuniis, & orationibus reliquum vitæ tempus transigerent; cujus quidem facti narrationem cum a Potitiano amico suo audiret Augustinus, dum adhuc de sua ad Deum conversione deliberaret, magis sibi displicuit, nec distulit vocantem Deum sequi, eique se totum devovere. Juverit ergo istiusmodi considerationes proponere iis, qui in via christianæ virtutis languidi, ac tepidi sunt, ut ad spiritualem fervorem excitentur.



C A P U T V.

De moderandis Scrupulorum conscientiis .

A R T I C . I.

*De scrupulis , & anxietatibus conscientiæ
in communi .*

Scrupulus, de quo hic agimus, est irrationabilis, & imprudens dubitatio, seu hæsitatio circa ea, quæ ad mores pertinent, cum anxietate, ac tristitia conjuncta, quæ animum excruciat, quem admodum lapillus in calceum illapsus pedem lædit, ac dolorem creat. Qui hac ægritudine laborant, recto sunt corde, justitiam enim diligunt, iniquitatem vero averfantur, ac reformidant. Sed eorum mens densissimis tenebris circumfusa non valet in voluntatis actibus aliam ab alia moralem speciem discernere.

Equidem proxima humanarum actionum regula est conscientia, quæ singulos actus cum superna regula, nempe cum divina lege comparat, judicatque, utrum cum illa congruant, an ipsi adversentur. Verum scrupulorum conscientia vanis timoribus, & angoribus perturbata incerta, & fallax regula est, cui fidere nequeunt, oportetque propterea, ut sapientes animarum ductores consulant, eorumque judicio acquiescant. Sed hoc externum judicium, si cum intimo propriæ conscientiæ judicio pugnet, valde suspectum ipsis est, timentque propterea, ne salutem animæ suæ in discrimen adducant, dum alterius authoritati obsequuntur, & dum dociles esse volunt, verentur, ne se plus justo dociles exhibeant.

Uni-

Unicus sane per hanc vitam veræ pacis, & consolationis fons est christiana pietas, sed sapientissimo supernæ Providentiæ consilio aliquando contingit, ut ex iis ipsis, qui pietatem colunt, nonnulli sint qui hujusmodi animi angore conflictantur; ut per humilitatem, & patientiam æternæ pacis, & consolationis præmium assequantur, tum etiam, ut habeant spirituales medici, in quo charitatem suam ac patientiam mirifice exerçant.

Plurimis ex causis oriri potest hæc animi ægritudo, præcipue vero I. ex modica ingenii acie in discernendis ideis claris ab obscuris, distinctis a confusis. II. Ex corporis constitutione, atque habitudine, maxime vero ex temperamento melanchonico, quod ob arctissimum commercii foedus inter animum, & corpus constitutum, facit ut animus in suspensionem, metum, ac moerorem sit pronus, & nihil fere, nisi triste, ac molestum revolvat. III. Ex vivida, ac vehementi imaginatione, quæ repente sensus omnes occupat, & voluntatem tam valide aggreditur, ut videatur ejus libertatem opprimere, & voluntatem vel invitam in actum pertrahere. IV. Ex ignorance humanæ infirmitatis, perpetuæque pugnæ inter carnem, & spiritum, quæ a labe originalis peccati proficiscitur. V. Ex imperfecta cognitione officiorum, quæ a christiano homine implenda sunt pro sui status ratione. VI. Ex affinitate imaginationis cum commotione animi, seu affectu, & ipsius affectus cum voluntatis consensione; hæc enim tria tam arcte inter se conjuncta sunt, ut non ita facile dirimi, ac secerni possint. VII. Ex colloquio, & consultatione cum iis, qui scrupulis conflictantur,
vel

vel circa ea, quæ ad mores pertinent, minus recto pollent iudicio. VIII. Ex nequitia diaboli, qui proborum paci, & tranquillitati invidet, vel eos a virtutis tramite molestissimis angoribus abducere nititur, vel ab ipso alios absterrere veluti nimis arduo ac salebroso. In curandis autem scrupulis, qui morbi animi sunt, non secus ac in curatione morborum, quibus corpora conflictantur, permagni interest peculiare eorum causas perspectas habere, ut aptiora subinde remedia præscribantur.

Commiseranda quam maxime est huiusmodi infirmitas quovis corporis morbo longe molestior; idcirco qui ea laborant, humaniter, ac benigne suscipiendi sunt, patienterque audiendi, tametsi eorum narrationes prolixæ admodum sint, obscuræ, implicatæ, ac confusæ; quandoquidem necesse est, ut eorum sermo confusio-
ni mentis, & animi perturbationi respondeat. Accurata autem adhibenda est consideratio, per quam obscura collustrentur, ac perspicua fiant, involuta dirimantur, disjuncta componantur, confusa ordinentur, adeo ut intelligi possit, quid sit illud, quod animum angit, in quo sita sit dubitatio, quæ sit ejus causa, & utrum hæc alicujus momenti sit, an vero inanis, ac inutilis.

Inter plurima peccata imaginatione conficta, quæ a scrupulosis effundi solent in confessione, nonnulla sæpe occurrunt vera, licet plerumque non gravia ab aliquo voluntatis vitio profecta, quæ porro non sunt scrupulis annumeranda, vel cum ipsis confundenda. Quin etiam in ipsis scrupulis aliquid sæpe invenitur culpabile, quod vel scrupulos gignit, vel cum ipsis componitur. Hæc autem non negligenda sane, aut præ-

prætermittenda sunt, sed solertissima cura adhibenda est, ut emendentur, nefas enim est in iis, quæ ad christianæ vitæ officia pertinent, quempiam fallere, aut in errorem inducere. Sola veritas perturbatas conscientias sedare vallet, veramque tranquillitatem, & pacem ipsis conciliare, nec potest quisquam spiritali moderatori suo fidem adjungere, quem erga se nimium indulgentem senserit, vel ejus judicio acquiescere, quod in aliquibus minus rectum deprehenderit.

Juverit etiam scrupulosi hominis indolem, ingenium, mores, inclinationes explorare, tum etiam totius antea vitæ rationem perspectam habere, ut rectum feratur judicium circa ea, quæ ejus conscientiam excruciant; fieri enim potest, ut ex aliquo animi vitio originem ducant, vel ex peccatis adolescentiæ, vel ex prava aliqua consuetudine, quæ licet resecta fuerit, aliquando reviviscit, ac veluti ex veteri radice pullulat. Nihil autem statuendum, ac decernendum est, nisi omnibus accurate perspectis, atque perpensis, ne forte nova aliqua emergente ratione variare oporteat sententiam; qui enim scrupulosa conscientia sunt, suspectum habent judicium, quod minime constans sit atque invariabile. Denique judicium, quodcumque illud sit, consilium, aut præceptum, non ancipiti sermone, aut obscuro, sed aperto, ac perspicuo, non hæsitanter, aut dubitanter; sed firmiter, atque asseveranter pronunciandum est; ut fortius animum afficiat, ab eoque omnem dubitationem, ac metum expellat.

Quoniam autem istiusmodi homines fati prudentes sibi videntur, ut proprio fidere possint judicio, curandum quam maxime est, ut
pe

per humilitatem, simplicitatem, ac docilitatem ad parvulorum conditionem redeant, juxta illud divini Præceptoris munitum: *Nisi efficiamini sicut parvuli, non intrabitis in regnum cælorum* (a); nimirum ut sibi persuasum habeant intimum animi sui sensum, circa ea potissimum, quæ scrupulis ansam præbent, incertam, pravam, ac prorsus ineptam esse suarum actionum regulam, ideoque in eo statu se constitutos esse, ut omnino indigeant externa regula, consilio scilicet ac nutu alicujus ductoris, ac pædagogi, a quo veluti parvuli per viam salutis tuto dirigantur; hanc autem esse Dei voluntatem satis expressam, & manifestatam, ut ejus, quem nacti fuerint, pii, ac sapientis moderatoris dictis credant, judicio acquiescant, monitis obtemperent absque ulla proprii sensus consultatione.

Solent isti reponere spirituales moderatores, tametsi doctus, & pius Sacerdos habeatur, falli posse, & alios in errorem inducere, ejusque propterea judicium incertam regulam esse, eo vel maxime quod, cum ne ipsi quidem arcana conscientia suæ satis perspecta habeant, nec valeant clare nitideque exponere, non potest Sacerdos quidpiam certo decernere, ac statuere. Sed ineptum omnino est hujusmodi effugium. Equidem Sacerdos animarum ductor, homo cum sit, falli potest; sed suspicandum non est eum falli. Perspicit ille conscientiarum ambages, quæ scrupulosis abditæ sunt, imperviæ, atque obscuræ, ideoque non temere aut inconsulto, sed bene-cognita causa judicat, alioquin gravi piaculo conscientiam suam oneraret, atque æternam damnationem sibi conscisceret. Quod si forte in aliquo

(a) *Matth. XVIII. 3.*

erraret, ac falleretur, immunis certe a peccato esset, qui se ejus judicio subjiceret, ejusque mandata faceret, nec animæ suæ salutem in periculum adduceret; & hæc porro est sapientum omnium sententia, quam ipsis S. Bernardi verbis juvat hic exponere: *Quidquid vice Dei præcipit homo, quod non sit tamen certum displicere Deo, haud secus omnino accipiendum est, quam si præcipiat Deus.*

Quid enim interest, utrum per se, an per suos ministros, sive homines, sive Angelos, hominibus innotescat suum placitum Deus? Sed homines, inquis, facile falli in Dei voluntate de rebus dubiis percipienda, & in præcipienda fallere possunt. Sed enim quid hoc refert tua, qui conscius non es: præsertim quum teneas de scripturis, quia labia Sacerdotis custodiunt scientiam, & legem ex ore ejus requirunt: quia Angelus Domini exercituum est (a)? ... A quo denique divina potius consilia requirentur, quam ab illo, cui credita est dispensatio mysteriorum Dei? Ipsum proinde, quem pro Deo habemus, tanquam Deum in his, quæ aperte non sunt contra Deum, audire debemus (b).

Inter remedia molestissimi hujus morbi, qui maximam animi ægritudinem, & tristitiam creat, primum locum obtinet oratio: ait enim Jacobus Apostolus: *Tristatur aliquis vestrum? oret (c).* Confugiendum omnino est ad eum, qui *Pater misericordiarum est, & Deus totius consolationis, qui consolatur nos in omni tribulatione nostra (d).* In his animi procellis suscitandus est Dominus, cui & venti & mare obediunt, & cujus imperio, quum jam Apostolorum navicula operiretur fluctibus, facta est tranquillitas magna

(a) Malach. XI. 7.

(b) S. Bern. lib. de præcept. & dispens. cap. IX. 21.

(c) Jac. V. 13.

(d) II. Cor. 1. 3. 4.

gna (a). Quoniam autem qui scrupulis excruciantur, prolixæ orationi plerumque insistere nequeunt, hortandi sunt, ut brevi, sed vivida, ac frequenti oratione frequentissime ad Deum assurgant, ejusque opem implorent.

Monendi quoque, ut nunquam otiose constant, sed in externis operibus statui suo convenientibus sese jugiter exerceant, maxime vero in operibus charitatis, & misericordiæ erga fratres suos; per hæc enim divinam misericordiam erga eos flectimus, per hæc charitatis fervor in nobis augetur, ac perficitur; *perfecta autem charitas foras mittit timorem* (b). Maximi etiam adjumenti sunt ad sedandas animi perturbationes literarum studia, & crebræ lucubrationes; his enim mirifice recreatur animus, dum a tristium rerum consideratione avocatur.

Laudanda præterea est familiaris conversatio cum piis hominibus, qui in innocentia, & simplicitate cordis ambulant, & Domino ferviunt in lætitia; nam eorum exempla & sermones incendunt animos christianæ virtutis amore, omnem horridi squaloris speciem ab ea removendo, & in alios effundunt partem aliquam illius consolationis, qua ipsi repleti sunt, & ejus gaudii, quo superabundant ob spem futuræ mercedis in æterna vita recipiendæ. Cavendum tamen, ne is, qui scrupulis angitur, de his, eorumque causis sermonem instituat, præterquam cum eo, quem nactus fuerit conscientiae suæ moderatorem.

Illud etiam quam maxime curandum est ut scrupulosi intelligant, quam multa ex eorum ægitudine oriri possint spiritualia damna ac pericula. Quam enim cogitationem omnem

F

in

(a) *Matth. VIII. 26.* (b) *I. Jo. IV. 18.*

in se ipsos convertant, & malint secum habitare veluti in tristi, ac tenebricoso carcere, quam se ad res supernas erigere, & christianæ pietatis officia sedulo, alacriterque persolvere, tempus omne inutiliter conterunt, vana persequuntur, solida vero negligunt, sibi ipsis, aliisque inutiles omnino evadunt, & in virtutis tramite nihil admodum progrediuntur, quin potius dum vanis timoribus, atque angoribus se ipsos excruciant, vim omnem spiritus ita enervant, atque exhauriunt, ut nihil boni pro Dei gloria nihil pro sua, vel aliorum salute suscipere valeant, aut perficere.

Accedit quod quum inter agendum innumeras peccatorum larvas, & chimæras sibi effingant, cum falsa, errante, aut perplexa peccati conscientia plerumque agunt, quo fit, ut ob vanum peccandi timorem in vera peccata miserrime labantur; quod spes christianæ virtutis sidus, & columen in ipsis languescit, quandoquidem divinæ justitiæ timore vehementer percussi, de immensa Dei bonitate, ac clementia vix, ac ne vix quidem cogitant; quod denique omnia christianæ pietatis officia molesta, atque odiosa ipsis evadunt; quoniam nihil inde spiritualis consolationis percipiunt, imo vero eorum causa perpetuis obnoxii sunt anxietatibus, quamobrem non raro contingit ut suave Christi jugum, veluti nimis grave, atque intolerandum defatigati, ac perturbati abjiciant, & se totos dedant mundi illecebris, & sensuum voluptatibus, ut suas in his consolationes quærant.

De Scrupulis in particulari.

QUoniam tam multa sunt christiani hominis officia, quæ sine æternæ damnationis periculo negligi nequeunt, plurima quoque sunt scrupulorum genera, quibus torqueri solent meticulosæ conscientiæ. Impossibile est singula persequi; juerit vero quædam expendere, quæ confessoriorum patientiam, & charitatem frequentius exercent. *Unusquisque tentatur a concupiscentia sua abstractus, & illectus* (a). Sed qui scrupulis laborant, frequentissimis, ac pertinacissimis anguntur tentationibus, quas ipsi sæpe excitant, nutriunt, ac foveant; plerumque enim tentationes sibi creant, dum rebus, quæ eorum sensibus obijciuntur, aliquid mali, aut periculi suo ipso timore affingunt, & turpem aliquam sibi repræsentant imaginem, quæ mentem percellit, animumque submovet, ac perturbat. Cum primum autem interni tumultus sedantur, præteritas cogitationes ad examen revocant, omnesque animi affectus inde obortos percensent, & accuratissime inquirunt, utrum voluntas ipsis obsecundaverit, vel obstiterit; quod quidem examen, per quod in eandem tentationem se se conjiciunt, novo indiget examine, & hoc rursus alio, atque ita usque in infinitum abeunt examina periculi plena, quibus mens densioribus semper tenebris obvoluta nunquam poterit inter commotiones animi, & liberos voluntatis actus discernere, & certum ali-quod judicium statuere. Hos igitur serio monere oportet, ut sensus quidem suos caute custodiant,

F 2

ca-

(a) *Jacob. I. 14.*

eaque fugiant, quæ a probis, rectæque conscientiæ hominibus vitari solent, utpote ex genere suo periculosa, aut noxia, ceteris vero libere & confidenter utantur rebus, easque tuto edant actiones, quæ per se innocuæ sunt, licitæ, aut necessariæ, & nihil habent ejus periculi, quod in ipsis temere fingit imaginatio. Si autem aliqua suboriarur tentatio, eam citissime eludant cogitationem alio convertendo, & divinam opem enixe implorando; caveant vero quam maxime, ne quum tentatio cessaverit, inepto, importuno, & periculoso examine ipsam instaurent.

Nonnulli sunt, quibus quotidiana divinarum laudum recitatio ecclesiastica lege ipsis præscripta perpetua scrupulorum occasio est; timent enim, ne mens voluntario evagetur, ac distrahatur, dum hocce publicæ orationis officium implent, cumque hujusmodi timor eorum animos occupat, majores evagationes creat, nec finit, ut ea attentione orent, quam solent in privatis orationibus suo arbitrio susceptis adhibere. Eadem sæpe legunt, ac relegunt, eadem recitant, ac repetunt, ut minus attentæ recitationis vitium emendent, sed crescente animi contentione ac perturbatione consequens est, ut minuaturs attentio, ac penitus deficiat, eoque tandem res deducitur, ut huic muneri explendo dies non sufficiat, & prohibendi omnino sint, ne divinas laudes persolvant, quandoquidem ex hoc religionis officio, quod animos cælesti consolatione perfundere, & devotionis fervore incendere apertissimum est, nihil nisi intolerabiles angores, & cruciatus percipiunt.

Commiserandi profecto hi sunt, & omni adjumento, & solatio sublevandi. Oportet igitur eos peramanter suscipere, & magnopere hortari, ut
omnes

omnes quidem evagationum causas remove-
 studeant, quum volunt quotidianum hoc officii
 munus persolvere: ut animum ad orationem
 præparent: ut attentionem, ac devotionem a
 Deo enixe petant sub initium cujuscunque horæ
 canonicæ. Quoniam vero ea est mentis nostræ
 mobilitas, atque inconstantia, ut sæpe, nobis
 etiam insciis atque invitis, huc illucque discur-
 rat; quotiescunque animadverterint eam teme-
 re peregrinari, & in aliqua extranea cogitatione
 versari, nitantur statim ipsam colligere, atque in
 sensum verborum intendere, vel certe in Deum
 dirigere, nihil admodum inquirendo, quæ &
 qualis, vel unde oborta fuerit aliena, atque ab-
 surda cogitatio. Illud autem districte, firmiter-
 que præcipiendum est, ut in recitatione officii
 progrediantur, nec quicquam repetant, tametsi
 noverint evagationem mentis voluntariam fuisse,
 vel e culpabili negligentia profectam, sed de hoc
 doleant, statuuntque diligentius, atque attentius
 divinum opus perficere. Quod si facere renuant,
 atque inobsequentes sint, a divini mysterii cele-
 bratione, aut participatione omnino arceantur,
 donec obtemperare discant, & se magis dociles
 præbere.

Grandius fane, ac molestius negotium quibus-
 dam Sacerdotibus facessit intentio, quoties sacro-
 sanctum Missæ sacrificium offerendum susci-
 piunt; verentur enim, ne voluntate, atque in-
 tentione careant tantum mysterium peragendi,
 & hanc intentionem ab imis visceribus exprime-
 re nituntur, antequam ad altare accedant, tum
 etiam dum sacris operantur, maxime vero dum
 Spiritus Sancti virtutem invocant, per quam
 mystica symbola mutantur, dumque tremenda
 Salvatoris nostri verba proferunt, quæ miraculo-
 rum

rum omnium maximum perficiunt, indecentissime se se contorquent, & singula verba vehementi contentione proferunt, ac sæpe etiam repetunt, veriti ne minus articulate, & distincte illa protulerint. Verum quid fingi potest magis absurdum, atque insanum, quam anxia illa, & scrupulosa horum Sacerdotum sollicitudo circa intentionem faciendi sacrum? Cur enim se ipsos probant, & conscientiam suam excutiant, ne tam sublime ministerium indigne suscipiant? Cur se ad illud obeundum aliqua oratione præparant? Cur in sacris vestibus assumendis statutas preces adhibent? Cur in ipsa Missa ea, quæ legenda sunt, distincte perlegunt, & cæremonias omnes ab Ecclesia præscriptas servant? Quorsum hæc omnia, nisi quod facere volunt, quod ex Christi Domini instituto facit Ecclesia?

Præterea quæ causa est dubitandi, utrum quis revera velit facere, quod sciens, & prudens facit, atque accuratissima diligentia? Denique anxius ille, quo anguntur, metus ne desit intentio, seu voluntas, an non certissimum argumentum est impensissimæ ac vehementissimæ intentionis? Certe non adeo solliciti essent de intentione operandi sacro, nisi id vellent efficacissime. Quid vero attinet tanto conatu divinæ consecrationis verba eniti, & tam sæpe iterare, quæ semel recte proutulisse sat est? Ineptiæ istæ quam maxime dedecent tanti sacrificii dignitatem, sanctitatemque; Sacerdotale ministerium apud Populum in contemptum adducunt; adstantibus tædium ac fastidium creant, nec minus ipsis, quam Sacerdoti operanti attentionem adimunt, & pios animi affectus impediunt. Arguendi ergo sunt istiusmodi Sacerdotes, ac serio monendi, ut hæc

hæc deliramenta procul abigant ; ut curent quidem quam maxime jugi atque attenta mentis consideratione , pioque cordis affectu sacrosanctam Hostiam, quæ pretium nostræ salutis est , immolare , nunquam tamen anxio , & sollicito animo sint circa intentionem , seu voluntatem eam offerendi , quum hæc deesse non possit homini consulto agenti ; ac tandem compellendi , ut qua decet gravitate , & majestate tam augustum mysterium celebrent , vel ab ejus celebratione desistant .

Qui a laxiori vivendi genere ad christianæ pietatis studium afflante divina gratia se se convertunt , tametsi plures antea confessiones emiserint , ad generalem peccatorum suorum exomologesim adducendi sunt ; timendum scilicet , ne in præteritis confessionibus ob ignorantiam , vel negligentiam plura peccata mortalia prætermiserint , tum etiam ne minime sincera fuerit eorum poenitentia , quam nulla subsecuta est vitæ emendatio . Dum vero in semita justitiæ progrediuntur , cum eorum mentes vividiori luce collustrentur , ac divinæ legis mandata , & christiani hominis officia melius percipiant , plures alias vident præteritæ vitæ noxas , quas cupiunt alia generali confessione diluere , quod quidem semel adhuc fieri prudens animarum medicus annuere poterit . Verum si alias ejusmodi confessiones effundere velint , audiendi non sunt , sed serio monendi , ut omnia quidem antea actæ vitæ peccata generatim detestentur , ac defleant , non tamen ea singulatim percensere studeant , neque enim a memoria nostra , sed a sincero animi dolore ob infinita Christi Salvatoris nostri merita pendet justificatio .

Alii vero , non de præteritis confessionibus ,
fed

sed de iis, quas identidem faciunt, anxio nimis, ac sollicito animo sunt, semper enim timent, ne satis accurate, ac distincte peccata sua aperuerint, cumque ad finem confessionis pervenerint, a calce ad carceres redeunt, ut singula fusius exponant, quod dum facere volunt, confessionem suam magis implicant, atque involvunt; nullam Sacerdotis monitis ac consiliis attentionem adhibent, nam eo loquente cogitant, an quidpiam addendum supersit, ejusque sermonem novis sæpe ineptiis intercipiunt, ac denique postquam, accepta sacerdotali absolutione, abierunt, ad sedem confessionalem redeunt, & novum aliquod dubium adferunt recens in animo excitatum.

Hæc sane ferenda non sunt; doceantur ergo istiusmodi confitentes congruum quidem tempus impendendum esse in discussione conscientiae; postea vero torquendam non esse memoriam, tantam esse humani animi infirmitatem, ac miseriam, ut *in multis offendamus omnes* (a); sed inter quotidianas justorum offensiones (nam de his agitur) plurimas esse, quæ eos latent, & soli Deo innotescunt, quarum tamen veniam per Dei misericordiam, & clementiam obtinemus, dum de omnibus peccatis nostris sincere dolemus, & quæ nobis nota sunt, atque in memoriam redeunt, humiliter confitemur. Suum cuique officio tempus constituendum esse, ut omnia opera nostra secundum ordinem fiant, ut monet Apostulus (b); illud autem tota mentis attentione peragendum esse, quod agitur; unde in ipsis Paganorum sacris, dum victimæ idolis immolabantur, clamabat præco: *Hoc age: Hoc age*. Prohibeantur autem, ne ad examen redeant, dum per contritionem ad sacramenti gratiam recipiendam

(a) *Jac. III. 2.*(b) *I. Cor. XIV. 40.*

dam præparatur animus; dum saluberrima Sacerdotis monita, & consilia excipienda sunt, dum oportet gratias Deo agere, & pios illos in corde affectus excitare, quibus ad sacratissimam Christi mensam accedendum est. Si autem post acceptam absolutionem ad sacrum tribunal redeant, repellantur, & nisi quidpiam aliud obstet, cælestem panem sumere jubeantur.

Alii quoque sunt, qui vehementer timent, ne sine veraci dolore, ac sincera emendationis voluntate ad sacramentum Pœnitentiæ accedant, quandoquidem easdem noxas, leves quidem, sed voluntarias, vel certe ex culpabili negligentia profectas semper adferunt, & post plurimas confessiones nihilo meliores effecti sunt, nec in christianæ religionis officiis ferventiores. Porro si horum offensiones eædem semper sunt, & pondere, ac numero fere æquales; si ad eas vitandas majorem diligentiam non adhibent, validioresque conatus non edunt; si in oratione, aliisque bonis operibus magis assidui non sunt, justa est timendi causa, nec contemnenda, aut improbanda est eorum trepidatio. Verum si eorum lapsus non ita frequentes sunt, non ita continui, sed aliquo temporis intervallo disjuncti; si ingentem moerorem ac tristitiam ipsis adferunt; si suam ipsi miseriam agnoscunt, ac deplorant; si magis caute declinant labendi pericula; si divinam opem oratione, misericordia erga pauperes, aliisque piis operibus tibi conciliare nituntur, bene admodum de ipsis sperandum est; sæpe enim vult Deus per hujusmodi infirmitates in christianæ humilitatis virtute servos suos constabilire, ut tuto in loco ponat gratiæ suæ dona, quibus eos vult statuto tempore cumulare.

G

Hos

Hos igitur bono animo esse jubeat prudens confessorius, eosque peramanter soletur, atque hortetur, ut fortiter pugnent, atque alacriter in via veritatis, & justitiæ progrediantur.

C A P U T VI.

De Contritione.

A R T I C. I.

De principio, & proprietatibus veræ Contritionis.

Prima, & præcipua Poenitentiae pars in sincera patratorum criminum detestatione sita est, quæ ad intimi doloris vim significandam cordis Contritio a Theologis appellatur; ea enim est, quæ ad firmum, atque efficax vitandi peccata, vitamque emendandi propositum poenitentes adducit, atque ad humilem, & sinceram peccatorum suorum confessionem.

Duplex est ex Tridentini doctrina contritionis species, alia scilicet charitate perfecta, quæ hominem Deo reconciliat, priusquam sacramentum Poenitentiae suscipiat, modo cum ejus voto conjuncta sit; alia vero imperfecta, quæ attritio dicitur, quoniam vel ex turpitudinis peccati consideratione, vel ex gehennæ, & poenarum metu concipitur; & hæc quidem, si voluntatem peccandi excludat cum spe veniæ quamvis sine sacramento Poenitentiae per se ad justificationem perducere peccatorem nequeat, tamen eum ad Dei gratiam in sacramento Poenitentiae impetrandam disponit (a).

Con-

(a) *Conc. Trid. Sess. XIV. de Pœnit. cap. IV.*

Contritio, quæ ad justificationis gratiam per Sacramentum Pœnitentiæ assequendum requiritur, non in suspiriis, gemitibus, aliisque externis actibus, sed in intimo cordis dolore sita est; nam ut peccata omnia ex corde prodeunt, ita quoque peccatorum odium, detestatio, atque execratio ex corde proficiscatur necesse est.

Supernaturalis præterea sit oportet contritio, nempe ut per gratiam Spiritus Sancti in cordibus nostris excitetur, ejusque morrices causæ sint veritates a Deo revelatæ, que per fidem creduntur. Sed vera contritio, & conversio cordis ad Deum mirificum opus est Divinæ omnipotentiae, & multo grandius, quam mortuum revocare ad vitam, vel novum cælum novamque terram creare; quapropter fervidis precibus cum christianæ pietatis & misericordiæ studio, atque exercitatione conjunctis omnipotens Dei gratia imploranda est, ut tantum opus in cordibus nostris perficiat. Veritates autem fidei, quæ in æternis damnatorum suppliciis divinæ justitiæ severitatem, vel in nostræ reparationis mysteriis, in justorum premiis, atque admirabili supernaturalis providentiæ oeconomia divinæ bonitatis, & clementiæ thesauros nobis exhibent, attenta meditatione perpendendæ sunt, ut animum valide afficiant, ac præparent ad Dei timorem, atque amorem per divinam gratiam concipiendum. Anne vero fieri potest, ut qui in sævitiis, & libidinibus diu volutarunt, suæ conversionis negotium absolvant, & vere contrito corde ad sacramentum Pœnitentiæ accedant, cum in oratione, discussione conscientiæ suæ, in divinarum rerum meditatione breve temporis spatium impenderint, & aliquam legerint, vel in memoriam revocaverint

formulam, per quam contriti cordis sensus exprimi solent?

Neceſſe quoque eſt, ut contritionis dolor ſit ſummus. Nam quemadmodum Deus O. M. ſummo amore diligendus eſt, ita adverſus peccatum, quod ſummo bono ex diametro opponitur, ſummum odium concipiendum eſt, utpote malorum omnium maximum ſummopere abominandum ac deteſtandum. Idcirco eodem loquendi genere charitatis, & contritionis magnitudo in ſacris literis ſignificatur; de charitate enim dictum eſt: *Diliges Dominum Deum tuum ex toto corde tuo* (a); de contritione vero clamat Dominus per prophetam: *Convertimini ad me in toto corde veſtro* (b). Quis vero ſibi in animum inducat ſummo peccatorum ſuorum dolore eos angere, qui tranquillo, & pacato animo ſcelera ſua enarrant veluti fabulas, vel geſta omnino adiaphora; qui culpam ſuam extenuare nituntur, vel in alios rejiciunt, aliorumque improbitatem cauſantur; qui ſalubres poenitentias refugiunt, & reſpuunt? Proſecto qui ſummo ſuorum ſcelerum dolore percuſus eſt, non ſine ingenti animi commotione illa commemorat, de ſe ipſo tantum queritur, indignatione quadam atque iracundia in ſe ipſum exardescit, & voluntatis ſuæ pravitatem unice cauſatur, atque ita comparatus eſt animo, ut divinæ Majeſtati ſuis criminibus læſæ vehementer cupiat pro viribus ſatisfacere.

Verus præterea, & ſincerus eſſe nequit contritionis dolor, niſi ſit univerſalis; neque vero ſufficit odiſſe peccata, quæ abſtracta & univerſali quadam idea menti exhibentur; peccatum ſcilicet in genere ſpectatum humanas cupi-

(a) *Dent. VI. 5.* (b) *Joel. II. 12.*

piditates pellicere, ac delinire non valet, quum nihil per se habeat, nisi foeditatem ac turpitudinem; sed omnino oportet, ut poenitens omnia, quæ perpetravit, mortifera peccata doleat, ac detestetur; omnia, inquam: nam, ut docet Catechismus Romanus (a), *neceſſe eſt peccata omnia, quæ admiſimus, odiſſe, ac dolere; ne ſi quædam tantum doleamus, ficta, & ſimulata, neque ſalutaris poenitentia a nobis ſuſcipiatur. Nam ut a Sancto Jacobo Apoſtolo dictum eſt (b): Quicumque totam legem ſervaverit, offendaſt autem in uno, factus eſt omnium reus.*

Quoniam autem per Tridentinum Concilium definitum eſt ad gratiam in ſacramento Poenitentiae recipiendam hominem diſponi per contritionem imperfectam, ſeu attritionem ex turpitudinis peccati conſideratione, & gehennæ, ac poenarum metu conceptam, ſi hæc quidem voluntatem peccandi excludat, diſputant Theologi, utrum ad amolendam peccandi voluntatem ſufficiat ſervilis poenarum metus, an vero etiam requiratur initium aliquod amoris Dei cum timore conjunctum. Porro quum in hac controverſia nihil hætenus ab Eccleſia definitum ſit, Alexander vero VII. vetuerit, ne alterutra ſententia alicujus theologicæ cenſuræ, alteriusque injuriæ, aut contumeliæ nota inuratur, donec Sanctæ Sedis judicio liſ dirimatur, nihil in hac re ſtatuerè volumus.

Verum, quum ubi agitur de vi, atque efficacitate ſacramenti, inter diſſidentes opiniones, quæ tutior eſt, ſemper eligenda ſit, ut colligitur ex cenſura propoſitionis primæ inter ſexaginta quinque ab Innocentio XI. proſcriptas die 2 martii 1679.; quum etiam rationi quam

G 3

ma.

(a) *Cat. Rom. de poenit. §. 31.* (b) *Jac. II, 10.*

maxime consentaneum sit, ut qui Deo reconciliari cupiens totam ejus legem servare statuit; primum, & maximum ipsius legis mandatum implere nitatur, & liberalem illum timorem probis, & ingenuis filiis dignum concipiat, quo nihil magis timeat, quam ne Dei majestatem lædat ejus legem violando; universos idcirco Poenitentiae sacramenti ministros hortamur, atque obsecramus in Domino, ut antequam poenitentibus absolutionem impertiant, primum quidem in spem veniæ a divina Misericordia per merita Christi obtinendæ eorum animum erigant; tum, ut docet Rituale Romanum jussu Pauli V. editum, *ad dolorem & contritionem efficacibus verbis adducere conentur*, non ob eam tantum causam, quod peccando thesaurizarunt sibi iram in die iræ, verum etiam quod Dei majestatem, & divitias bonitatis ejus, & patientiæ, & longanimitatis contempserunt, hac ferme ratione eos cohortando: *Scito, & vide, quia malum & amarum est reliquisse te Dominum Deum tuum* (a); nimirum a divina gratia, atque amicitia excidisti; spiritum adoptionis filiorum Dei sempiternæque gloriæ hæreditatem amisisti; tremendam insuper divini Judicis maledictionem & damnationem, & nunquam finitura supplicia tibi conscivisti. Ubi vero nunc esses, & quam desperata esset fors tua, nisi te misericors Deus servasset ad poenitentiam? Præterea *Deum, qui te genuit, dereliquisti, & oblitus Domini Creatoris tui* (b), nec Creatoris modo, verum etiam Redemptoris, quoniam te a servitute diaboli, atque ab æterna morte per acerbissimam Jesu Christi passionem, & mortem

in

(a) Jerem. II. 19.

(b) Deuter. XXXII. 18.

in filiorum suorum libertatem te vindicavit, quo fit ut tui juris amplius non sis, sed ejus, qui pretio sui sanguinis te redemit, unde ait Apostolus: *Non estis vestri, empti enim estis pretio magno* (a). Quam multis denique beneficiis pro infinita sua benignitate, & clementia te cumulavit Deus! Tu vero ipsa ejus beneficia, vitam scilicet, & vitæ commoda, corporis vires, animi facultates, & dotes, omnia denique ejus dona per summam impietatem ausus es in ipsum contorquere. *Scito ergo, & vide, quam malum & amarum sit reliquisse te Dominum Deum tuum.*

His, aliisque cohortationibus urgendi sunt poenitentes ad sinceram, & vehementem peccatorum suorum detestationem cum propter æterna, quæ sibi ipsis intulerunt damna, tum maxime propter divinæ Majestatis contemptum, & execrandam injuriam ipsi Deo irrogatam, atque ita Deum tanquam omnis justitiæ fontem diligere incipiant (b). Anne vero censeretur nimis gravem atque arduam a poenitentibus postulari, si moneantur, ut contritionem eliciant, quæ a filiali quoque metu proficiscatur? Sane quum & ipse dolor de peccatis ex timore servili, si voluntatem peccandi excludat, cum spe veniæ donum Dei sit, & Spiritus Sancti impulsus, ut loquitur Tridentina Synodus (c), præstantius quoque donum roganti largietur Deus, qui dives est in misericordia, & dat omnibus affluenter, & non impropere (d); imo vero, remota jam a poenitentis corde voluntate peccandi, propensiori benignitate tribuet filialis timoris gratiam, cui jam dedit averfari peccatum.

G 4

AR-

(a) *I. Cor. VI. 19. 20.*(b) *Conc. Trid. Sess. VI. cap. VI.*(c) *Sess. XIV. cap. 14.* (d) *Jac. I. 5.*

ARTIC. II.

*De emendanda vitæ proposito a vera contritione
inseparabili.*

V Era contritio iners non est, sed operosa; nam qui dolore summo peccata sua deplorat, ac detestatur, studio flagrat abrumpendi peccatorum vincula, & firmo voluntatis proposito omnia mortifera peccata, tum ea potissimum, quorum se reum agnoscit, perpetuo vitare statuit. Quisquis igitur cor gerit contritum, si quas fovit inimicitias, eas statim ponit, & inimicos suos in gratiam recipit; si quem læserit, injuriam reparat; si damnum cuiquam inulit, illud sarcire studet; si offensionis & scandali occasionem præbuit, emendatione vitæ optimis virtutum exemplis, salutaribus consiliis, & cohortationibus huic malo mederi nititur; si in proxima, aut propinqua peccandi occasione versatur, eam illico removet, vel ab ipsa recedit, & omnia procul abigit vitiorum irritamenta; qui autem hæc præstare negligit, nec vere poenitens est, nec absolutione donari potest.

Firmum porro, ac solidum requiritur voluntatis propositum: neque enim sufficit vaga, ambigua, & nutans voluntas non peccandi in posterum, qualem gerere solent, qui ob animi sui infirmitatem, & inconstantiam, ob corruptos mores, ob inveteratam peccandi consuetudinem, & vehementem in quædam peccata inclinationem, & propensionem, diu ab ipsis abstinere se posse diffidunt, quin etiam sibi persuasum habent se fore in eadem peccata relapsuros; & hi quidem absolvendi non sunt, sed monendi,
ut

ut ad preces, ad lacrymas, ad poenitentiae, ac misericordiae opera confugiant, & in divinae gratiae adiutorio spem suam ponant, qua corroborati, & confirmati illas Apostoli voces aliquando usurpare possint: *Quis nos separabit a charitate Christi? Tribulatio? An angustia? An fames? An nuditas? An periculum? An persecutio? An gladius? Certus sum enim, quia neque mors, neque vita, . . . neque instantia, neque futura, neque fortitudo, neque altitudo, neque profundum, neque creatura alia poterit nos separare a charitate Dei (a).*

Vanum autem, & ludicrum esset propositum, nisi ea complecteretur omnia, quae ad illud opere implendum omnino requiruntur. Multis laboribus agros exercent coloni, qui volunt ex ipsis fruges percipere; velis, ac remis contendunt nautae, qui volunt ad optatum portum pervenire; fortiter dimicant milites, qui victoriae palmam assequi volunt. Ita plane qui vitam suam emendare, ad divinae legis mandata mores suos componere, & peccata omnia, saltem mortifera, constanter effugere sincere ac firmiter statuit, oportet omnino, ut simul deliberet ea omnia praestare, quae ad hunc finem assequendum sunt necessaria, tametsi admodum ardua ac difficilia videri possint, maxime si agatur de enervanda, atque amolienda prava aliqua consuetudine, quae altera quaedam natura primae jam per peccatum vitiatae insita, aut adnata merito appellatur.

Mira prorsus est in humanum animum pravae consuetudinis vis ac potestas; nam I. quidem qui alicui vitio indulgere assueti sunt, nullo non tempore mente revolvunt cogitationes ad illud

(a) Rom. VIII. 35. 38. 39.

illud ipsum vitium provocantes; sic avari de luero faciundo cogitant; raptores de fraudibus, furtis, ac latrociniiis; helluones de comessationibus, & compotationibus; impudici de rebus immundis, ac turpibus, quarum imagines diu noctuque, & in somniis quoque eorum mentibus illudunt, unde in sacris literis de hominum genere libidinibus corrupto, quod per diluvium delere Dominus cogitaverat, hæc legimus: *Videns Deus quod multa malitia hominum esset in terra, & cuncta cogitatio cordis intenta esset ad malum omni tempore* (a); ubi præcipue notanda est vis eorum verborum: *omnis cogitatio intenta ad malum omni tempore*. II. Una cum hisce rerum imaginibus, ob naturalem idearum nexum, a quo potissimum pendet reminiscentia, ad mentem redeunt perceptæ olim ex pravis actibus voluptates, quæ animum vehementer ad similes actus alliciunt, & pertrahunt. III. Quum ex consuetudine agitur, tenere, & præcipitanter agitur; nam quemadmodum in rebus theoreticis quod verum & certum alias demonstratum est, pro vero, & certo semper assumitur sine novo examine, ita quoque in practicis, quod probare, & facere consuevimus, sine consideratione & probamus, & facimus: latent enim in ipsa consuetudine agendi rationes. IV. Quum primum quis in aliquod crimen labitur, aliquo horrore afficitur, qui residuus dici potest sensus primævæ illius rectitudinis, in qua homo a Deo conditus est, postea vero sævissimis conscientiæ morsibus cruciatur; sed dum peccare pergit, istiusmodi animi permotiones sensim extinguuntur, adeo ut tandem in crimina imperturbato animo ruat, & tranquille in ipsis quiescat. V. Quandiu viget peccandi

(1) Gen. 6. 5.

consuetudo, mirum in modum augentur vires concupiscentiæ, simulque justo Dei iudicio minuuntur divinæ gratiæ auxilia, quo fit, ut qui diuturna peccandi consuetudine devincti sunt, difficillime per veram poenitentiam ad Deum convertantur.

Porro hæc omnia simul juncta componunt lacrymabilem illam catenam, qua voluntatem suam a diabolo constrictam teneri querebatur S. Augustinus: *Velle meum tenebat inimicus, Et inde mihi catenam fecerat, Et constrinxerat me. Quippe ex voluntate perversa facta est libido: Et dum servitur libidini, facta est consuetudo: Et dum consuetudini non resistitur, facta est necessitas. Quibus quasi ansulis quibusdam sibimet innexis (unde catenam appellavi) tenebat me obstrictum dura servitus (a).* Itaque ad fatalem istam catenam abrumpendam firmæ & efficaci opus est voluntate magnos conatus eliciendi, naviterque incumbendi illis medicinalis poenitentiae operibus, de quibus agimus sequenti capite.



CA.

(a) S. Aug. Conf. lib. VIII. cap. V. 1.

C A P U T VII.

De Satisfactione.

A R T I C. I.

De operibus pœnitentiæ generatim.

Opera pœnitentiæ a Christi Ministro imponenda, & a pœnitente humiliter, alacriterque fuscipienda tertiam sacramenti Pœnitentiæ partem constituunt, quæ *satisfactio* appellatur. Porro de satisfactione hæc statuit Concilium Tridentinum: *Habeant autem præ oculis, ut satisfactio, quam imponunt, non sit tantum ad novæ vitæ custodiam, & infirmitatis medicamentum, sed etiam ad præteritorum peccatorum vindictam, & castigationem* (a). Injungenda igitur sunt pœnitentiæ opera, quæ & salutaria sint, & poenalia; salutaria quidem ad peccatorem sanandum, poenalia ad puniendum; adeo ut dum curantur animi morbi, ejusque sanitati prospicitur, peccatorum quoque expiationis ratio habeatur. Utrumque autem præstare valent illa pœnitentiæ opera, quæ pravos animi affectus sedant, & cupiditates coercent, simulque incommodum, laborem, ac molestiam creant humanæ infirmitati, cujusmodi sunt, quæ hic proponimus quibusvis pœnitentibus sive præcipienda, sive suadenda, ac magnopere commendanda.

I. Ut per dies singulos aliquod temporis spatium mane præsertim ac vespere orationi tribuant; orationi, inquam, non labiorum tantum, sed & mentis, & cordis, nempe divinarum, æternarumque rerum meditationi cum piis cordis

(a) *Conc. Trid. Sess. XIV, c. VIII.*

dis affectibus, gemitibusque conjunctæ; sic enim a terrenis, & fluxis rebus ad cælestia animum erigent; sic adversus mundi illecebras, adversus pravas cupiditates, adversus diaboli insidias armati incedent *lorica fidei*, ut loquitur Apostolus, & *galea salutis*, & *gladio spiritus* (a).

II. Ut diu noctuque ad Deum assurgant crebris aspirationibus ab intimo corde profectis, quas jaculatorias passim vocant, seu cum Augustino *servidas preces raptim jaculatas* (b). Familiarissima erat apud priscos fideles Davidica illa oratio: *Deus in adjutorium meum intende, Domine ad adjuvandum me festina* (c). His vocibus resonabant carceres, in quibus Christi Martyres vincti detinebantur; his quoque vastæ solitudines, quas innumeri Christi servi poenitentiae causa incolebant. His etiam quotidie utitur Ecclesia, ut initio cujusque horæ canonicæ divinam opem sibi concilier. Innumeras alias preces breves quidem, sed vividissimas, nobis suppeditant Davidici psalmi, præcipue vero Psalmus L., in quo Regius Psalter peccata sua deplorat, & veniam obnixe flagitat. His addi possunt voces illæ hominis leprosi fiduciæ plenæ: *Domine, si vis, potes me mundare* (d); vel cæci: *Domine, ut videam* (e); vel discipulorum in mari periclitantium: *Domine, salva nos, perimus* (f). Præ omnibus autem crebro usurpare juverit preces, quæ habentur in mirifica orandi formula ab ipso Domino nostro Jesu Christo nobis tradita.

III. Ut sensus suos caute custodiant, fugiantque mundi pompas, & vitiorum irritamenta,

Chri-

(a) I. Thes. V. 8. Ephes. VI. 17. (b) S. August. ad Probam Ep. CXXI. (c) Ps. LXIX. 2.

(d) Matth. VIII. 2. (e) Luc. XVIII. 41.

(f) Matth. VIII. 25.

Christi autem crucem amplectantur, christianæ scilicet mortificationis exercitationem, qua neglecta nemo poterit a vitiis emergere, & pravas abrumpere consuetudines. Non omnibus datum est, ut magnis cruciatibus, & afflictationibus corpus suum crucifigant cum vitiis, & concupiscentiis, sed omnes adducendi sunt, ut adversa omnia, omnesque hujus vitæ ærumnas in expiationem peccatorum suorum patienter perferant; ut parce, temperanter, ac sobrie vivant, & ab innoxiiis quoque ac licitis sensuum oblectamentis se se contineant; propriæ suæ voluntatis inclinationibus frequentissime obstant; hoc enim poenitentiae genus est saluberrimæ, Deoque acceptissimæ.

IV. Ut tentationes diaboli a se arceant constanti fuga otiositatis, quæ multæ malitiæ magistra est (a). Si autem aliqua insurgat tentatio, maxime vero si ea sit de rebus turpibus, immundis, atque obscœnis, ne minimum quidem cum ea disputent, aut contendant, neque in affectus inquirent, qui in corde prodeunt, sed statim mentem alio convertant, & bonam aliquam cogitationem in ea excitent. Initio enim quælibet tentatio parva scintilla est, quæ facile restinguitur, sed illico in magnum succrescit incendium, quod omnia devorat, antequam compescatur.

V. Ut bis quotidie, vel saltem ad vespertinæ examen conscientiae ineant, & quidquid adversus Dei voluntatem ac legem actum, dictum, cogitatum, vel prætermissum fuisse agnoverint, sincere detestentur, ac doleant, & ex animo emendationem firmiter statuunt. Quotidiana hæc conscientiae discussio ab omnibus spiritualis

vi-

(a) *Eccli. XXXIII. 29.*

vitæ magistris magnopere commendatur, quin etiam ab ethnicis ipsis Philosophis Pythagora, Seneca, Plutarcho, Epicteto, & aliis proponitur velut mirifice utilis ad cohibendas cupiditates, quæ in animo dominantur, ad evellenda pullulantia vitia, antequam inolescant, ad componendos mores, ad vitam recte sapienterque instituendam.

VI. Ut nunquam prætermittant christianam exercitationem, vulgo *Esercizio del Cristiano*; hæc enim praxis utilissima est maximeque necessaria, ut divinæ gratiæ auxilia nobis concilientur, omnesque actiones nostræ ad Deum dirigantur.

VII. Ut in sanctificatione dierum festorum pietatem imitentur priscorum fidelium, qui in orationibus, & divinis laudibus, in celebratione divinorum mysteriorum, quorum participes efficiebantur per communionem eucharisticam, in excipiendis christianis institutionibus, in audiendo Dei verbo, aliisque religionis, & misericordiæ operibus totum pene dominicum, aut festum diem infumebant, sicque tam validis divinæ gratiæ præsiidiis communiebantur, ut reliquos etiam dies sancte percurrerent, semperque parati essent in acerbissimis tormentis Christum confiteri.

VIII. Ut profestis quoque diebus interesse nitantur sacrosancto Missæ Sacrificio, pioque animi affectu Jesu Christi passionem, & mortem meditentur, secum reputent, quæ sit hujus Sacrificii victima, a quibus, pro quibus, quas ob causas Deo immoletur. O quam multis cumulantur cælestibus donis religiose adstantes huic sacrificio, ex quo, veluti ex uberrimo fonte, prodeunt divinæ benedictiones!

Ut

IX. Ut in operibus misericordiæ sint assidui, suisque commodis, voluntatibus, & vanitatibus semper aliquid subtrahant, ut pauperibus subveniant; ut crebro accedant ad sacramentum Poenitentiae, tum etiam ad sacram Synaxin, si ita visum fuerit spirituali moderatori; si vero in aliquod grave peccatum pro humana infirmitate lapsi fuerint, illud illico detestentur, & per confessionem cum intimo cordis dolore conjunctam quantocyus delere nitantur.

X. Ut divinas Scripturas, si id præstare valent, assidue, attenteque perlegant; per ipsas scilicet de nostræ salutis negotio Deus nobiscum agit veluti per epistolas, quas ex ea civitate accipimus, unde peregrinamur *; nec pigeat asceticos libros quotidie pervolvere a piis doctisque hominibus editos, quorum lectio veritatis lumine mentem collustrat, & christianæ virtutis studio animum incendit; tum vero etiam acta Sanctorum ex sinceris, & certis ecclesiasticæ historiæ monumentis excerpta, quæ evangelicæ doctrinæ praxim nobis commonstrant *.

XI. Ut assidui sint piis exercitationibus, quæ per plures continuos dies passim habentur in Ecclesiis Parochialibus; quandoque etiam seorsim a turba, ac terrenarum rerum strepitu æternæ salutis negotio unice dent operam in aliqua ex iis domibus, quæ in Dioecesi nostra patent ad spirituales virorum secessus.

AR-

* *Sacrarum Scripturarum cum Veteris, tum Novi Testamenti libri cum accuratissima Italica versione, & eruditissimis notis a clarissimo, & doctissimo viro Antonio M. Martini Archiep. Florentino arcto amicitia fœdere Nobis conjunctissimo Aug. Taurinorum recens editi sunt.*

* *Duplex eorum collectio edita est Roma ab eruditissimo viro Carolo Massino Congr. S. Philippi Neri Sacerdote: Raccolta di Vite de' Santi. 26. vol. 12. Roma 1767. 1781. presso i Pagliarini.*

*De prudentia a Sacerdote adhibenda in
præcipiendis peculiaribus pœnitentiæ
operibus.*

Dominus, ac Redemptor noster per salutaria novæ legis præcepta singulis quibusque corrupti hominis vitiis, *velut cœlestis medicus, obviantia adhibuit medicamenta*, ut loquitur Magnus Gregorius (a), *quum lubricis continentiam, tenacibus largitatem, iracundis mansuetudinem, elatis præceperit humilitatem*. Similiter Christi minister, qui spiritualis medici officium gerit, studiose, diligenterque curabit cuique animarum morbo, præter communia, quæ superiori capite proposuimus, spiritualia remedia, peculiæres quasdam medicinas aptare, quæ ejus curationi opportuniiores censentur, ac validiores.

Itaque iracundis ex. gr. præcipiat, ut in quovis negotio suscipiendo adversus ea omnia, quæ occurrere possunt, grævia ac molesta, animum suum præparent, ut quandiu ira effervescit, nihil agant, nihil loquantur, nihil statuant; ut inquietos homines, audaces, inobsequentes, perversos patienter ferant, leniterque, atque humaniter cum ipsis agant, ac secum reputent se quoque aliis aliquando graves, atque incommodos esse, adeoque mutua inter homines opus esse patientia, quo spectat illud Apostoli monitum: *Alter alterius onera portate* (b).

Superbis, ut serio considerent, quam Deo, & hominibus odibilis sit superbia; quam stulte intumescant, quandoquidem gratuita Dei dona
H sunt

(a) S. Greg. M. Hom. XXXII. in Evang.

(b) Gal. VI. 2.

sunt, de quibus gloriantur, de suo autem nihil habent, nisi mendacium, & peccatum; christianam idcirco modestiam atque humilitatem vultu, gestu, incessu, & corporis cultu, atque ornatu præferant, neminem despiciant, & debitum honorem cuique exhibeant, & prudentum judicio facile acquiescant.

Odia, vel inimicitias foventibus, ut pro iis, quos averfantur, vel sibi infensos putant, frequenter orent, & peculiaria benevolentiae argumenta ipsis exhibeant, & data occasione benefaciant. Invidis autem, ut gratias Deo ex animo persolvant ob ea, quibus alios cumulat beneficia, & ampliora bona ipsis adprecentur.

Detractoribus, ut præstita reparatione detrimenti, quod alienæ famæ intulerunt, quotidie instaurent propositum neminem carpendi, sed de omnibus honorifice loquendi.

Avaris, ut hujus vitæ brevitatem, fluxam terrenarum rerum naturam, & cælestium bonorum perennitatem aliquo temporis spatio meditentur, piisque operibus, atque effusa in pauperes misericordia nunquam perituros thesauros sibi in cælis recondant.

Raptoribus, ut præter debitam restitutionem, seu damni compensationem eleemosynas pauperibus erogent.

Voluptuosis, & impudicis, ut sensus coerceant, & jejuniis, vigiliis, assiduis laboribus, corporis afflictationibus concupiscentias carnis enervent; ut novissima mente revolvant, & apud pium, & doctum confessorium peccata sua frequenter confiteantur.

Ebriosis, ut vinum diluant, nec nisi parce, ac sobrie eo utantur, ganeones autem cavendo vitent, & popinas declinent.

Iner-

Inertibus & otiosis, ut operosum aliquod vitæ genus amplectantur; orationi, piorum librorum lectioni, sanctissimæ Eucharistiæ adorationi aliquod temporis spatium quotidie tribuant, aliisque piis operibus sedulo incumbant, ne cum inutilibus servis projiciantur in tenebras exteriores.

Violatoribus festorum dierum, si lucri causa servilia opera obierint, ut eorum pretium pauperibus distribuunt: si vero ludis, choreis, crapulis, vel inertibus, ac desidioso otio tempus Deo sacrum contriverint, per aliquos dies festos omnibus, quæ in Paroecia celebrantur, divinis officiis pie, ac devote intersint, vel etiam per aliquos profestos dies sacrosancto Missæ Sacrificio adstare non prætermittant.

Evellendis ex animo vitiis plurimum juvat aliquot oppositarum virtutum actus certo numero quotidie eliciendos præscribere: iracundo scilicet tot actus lenitatis, & patientiæ; superbo humilitatis; avaro largitatis; ei qui ventri servit, temperantiæ, atque abstinentiæ. Ut autem hoc remedium efficacius fiat, jubendus erit poenitens, ut in vespertino examine pervideat, an hanc officii partem impleverit; si vero in aliquo se defecisse noverit, doleat, & statuatur postero die accuratorem diligentiam in hac re adhibere.

Inter consentitum vitia aliquod semper est præcipuum, ac dominans, ex quo cætera, veluti arboris rami, ex stipite prodeunt. Frustra autem cæduntur rami, nisi truncus ipse ab imis radicibus eruat. Diligenter ergo inquirendum est in hoc vitium, quod quidem haud difficulter internosci poterit, si peccatorum occasiones, ac peristates attente considerentur: tum vero

etiam si interrogetur poenitens, cur, quem ad finem, cujus rei causa in quædam peccatorum genera frequentius lapsus fuerit. Detecta autem prava cupiditate, quæ magis viget in animo, in ipsam dirigenda sunt salutaria, & congrua remedia, ut adjuvante divina gratia penitus evellatur, aut certe supprimatur & compescatur.

Perutile etiam erit ad pravas consuetudines emendandas aliquas imponere poenitentias, quas conditionatas vocant ex. gr. jurare assuetis, aut mentiri, aut turpia loqui, aut aliis irridere, vel obrectare, ut quoties in ejusmodi noxas lapsi fuerint, os terræ admoveant, Deum de genu adorent, certas preces persolvant, & veniam implorent; iis, qui vino, epulis, aut ludis indulgent, ut postero die jejunent, vino temperent, aliquot nummos pauperibus erogent.

In operibus satisfactionis imponendis justitiam, prudentiam, pietatemque adhibebit Sacerdos, & pro gravitate, ac numero peccatorum, pro poenitentium statu, conditione, ætate, ac sexu salutare, & convenientes poenas infligat, ne connivendo, & indulgentius cum poenitentibus agendo pro gravissimis delictis poenas levissimas injungat, seque alienorum criminum participem efficiat (a). Canones idcirco poenitentiales consulat, & videat, quemadmodum pro modo culpæ imponenda est satisfactio (b). Quamquam enim eorum vigor pro hodierna Ecclesiæ disciplina valde remissus, atque imminutus est, lucem tamen maximam adferunt sacris Judicibus eorum sanctiones, juvabitque etiam poenitentibus graviorum scelerum sibi consciis eas commemorare, ut mitiores

res

(a) *Conc. Trid. Sess. XIV. de poenit. c. VIII.*

(b) *S. Car. Instr. Conf.*

res poenas alacriter suscipiant, fideliterque impleant, & aliis quoque christianæ pietatis operibus ultro, ac sponte divinæ justitiæ satisfacere nistantur.

Putant nonnulli Jubilæi tempore, vel quoties in promptu est occasio plenarias indulgentias lucrandi, minutissimas decerni posse poenitentias gravissimorum criminum reis, qui parati sunt accurate præstare quidquid per Apostolicas literas præscriptum est ad indulgentiam assequendam. Sed ista agendi ratio & Tridentini Concilii decretis, & menti Summorum Pontificum omnino adversatur. Nam Concilium universim præcipit, ut *Sacerdotes Domini pro qualitate criminum, & poenitentium facultate salutare, & congruentes poenitentias injungant* (a), nec certe excipit tempus, quo Jubilæum promulgatum est, vel alia exhibetur opportunitas plenariam indulgentiam assequendi.

Docet præterea ipsum Concilium salutare, & congruas satisfactiones quammaxime utiles ac necessarias esse poenitentibus: *Procul dubio enim magnopere a peccato revocant, & quasi freno quodam coercent, cautioresque, & vigilantes in futurum poenitentes efficiunt: medentur quoque peccatorum reliquiis, & vitiosos habitus malevivendo comparatos contrariis virtutum actionibus tollunt Accedit ad hæc quod dum satisfaciendo patimur pro peccatis, Christo Jesu, qui pro peccatis nostris satisfecit, conformes efficimur, certissimam quoque inde arham habentes, quod compatimur, & conglorificabimur* (b). Jam vero si hisce poenitentiae operibus indulgentiarum gratia poenitentes eximerentur, validioribus ad vi-

tæ

(a) Conc. Trid. Sess. XIV. c. VIII.

(b) Conc. Trid. *ibid.*

tæ emendationem præfidiis, atque adjumentis carerent; neque enim pauci illi, & leves pietatis ac religionis actus, quos edere solent fideles, ut indulgentiarum participes fiant, vim habent amolendi animi vitia, revocandi a peccatis, coercendi cupiditates, pravæ consuetudinis laqueos dissolvendi, & Christi Domini pro nobis satisfaciensis imaginem in nobis effingendi, quæ arrha, & pignus sit æternæ glorificationis.

Tridentini doctrinae cohæret Summorum Pontificum in largiendis indulgentiis consilium, ac voluntas; nam in suis Literis Apostolicis testantur Divinum hocce, amplissimumque donum concedi *vere pœnitentibus*, quibus verbis intelligi datur, inquit Cardinalis Cajetanus, *indulgentias non consequi pœnitentes negligentes, sed pœnitentes sollicitos, qui soli sunt vere pœnitentes* (a). Idcirco etiam in ipso ritu imperiendi populo Apostolicam Benedictionem, & plenariam indulgentiam, hanc precationis formulam adhiberi volunt: *Indulgentiam, absolutionem Spatium veræ, & fructuosæ pœnitentiæ, cor semper pœnitens, emendationem vitæ, & perseverantiam in bonis operibus tribuat vobis omnipotens, & misericors Dominus*. Hinc vero colligi potest, ut ait Cardinalis Baronius, *Sedis Apostolicæ Indulgentias illis communicari, qui, quantum suppetunt vires, bene operari non prætermittunt, non autem ignavis, otiosis, ac negligentia torpescantibus* (b).

Denique Ven. Cardinalis Bellarminus, postquam veram Ecclesiæ disciplinam circa Indulgen-

(a) Card. Cajet. Tract. X. de suscipientibus Indulg. quest. 1.

(b) Ad An. 1073. num. 71.

gentias exposuit, hæc habet: *Et ideo prudentes Christiani sic accipiunt Pontificias indulgentias, ut simul etiam studeant dignos poenitentiae fructus facere, ac pro suis peccatis Domino satisfacere* (a). Liqueet ergo Indulgentiarum causa deferendam non esse Ecclesiae disciplinam circa salutes, & convenientes satisfactiones poenitentibus imponendas.

Cæterum meminisse oportet sacrum Poenitentiae tribunal non esse acerbæ, atque immitis severitatis forum, sed charitatis, benignitatis, & misericordiae, adeoque excipiendos, atque instruendos esse poenitentes in spiritu lenitatis, ut monet Apostolus: *Si præoccupatus fuerit homo in aliquo delicto, vos qui spirituales estis, hujusmodi instruite in spiritu lenitatis* (b); nos autem ejus esse ministros, de quo scriptum est: *Superexaltat autem misericordia judicium* (c); tum illud etiam: *miserationes ejus super omnia opera ejus* (d).

Sane qui corporibus medentur, invitis quoque, & reluctantibus ferrum, atque ignem admovent, vulnera dilatant, tumores secant, sinuosa ulcera aperiunt, saniem exprimunt, putrescentes carnes inurunt, neque ægri clamoribus, gemitibus, & ululatibus commoventur, ut ejus saluti consulant; sed animarum medicus curare nequit nolentem, quapropter ejus officii est, spirituali morbo laborantem magnopere hortari, ut curari velit, tum blandis sermonibus adducere, ut aptis uti velit remediis ad salutem assequendam. Imitandus est bonus ille Samaritanus, qui hominem videns secus

(a) Card. Bellarm. lib. 1. de Indulg. cap. XII. §. Ad tertium. (b) Gal. VI. 1.

(c) Jac. II. 13. (d) Psal. CXLIV. 9.

cus viam jacentem vulneribus confossum, ac semivivum, misericordia motus, vinum, & oleum in ejus vulnera infudit; nimirum correctionis austeritas mitiganda; & temperanda est oleo commiserationis, & benignitatis. *Animarum rector*, inquit Gregorius Magnus, *infundit vulneribus vinum, & oleum, ut scilicet per vinum mordeantur vulnera, & per oleum foveantur Miscenda ergo est lenitas cum severitate, & faciendum quoddam ex utroque temperamentum, ut neque multa asperitate exulcerentur subditi, neque nimia benignitate solvantur* (a). Immo vero præstat plus olei, quam vini, plus lenitatis, quam severitatis miscere; nam *etsi erramus modicam poenitentiam imponentes, non ne melius est propter misericordiam rationem reddere, quam propter crudelitatem? Ubi enim Paterfamilias largus est, dispensator non debet esse tenax. Si Deus benignus est, ut quid Sacerdos ejus austerus* (b)?

Mitius etiam agendum est cum poenitentibus, qui ante confessionem divinæ justitiæ satisfacere adnisi sunt, vel vehementioris contritionis indubia argumenta exhibent, vel magnis calamitatibus, atque ærumnis premuntur, vel corporis infirmitatibus, animique angoribus excruciantur, modo hæc mala patienter perferant in expiationem peccatorum suorum. Certum autem tempus cuique poenitentiae operi constituendum est, ne perpetuum onus poenitenti imponatur, nec multa operum genera præscribenda sunt, ne ejus memoria nimium gravetur.

Ex

(a) S. Greg. M. in Pastor. P. II. c. iv.

(b) Hom. 43. Operis imperf. in c. XXXIII. S. Matth inter opera S. Chrysost. circa med.

Ex iis, quæ hactenus dicta sunt, facile quisque intelligit quam male in sui officii munere se gereret confessarius, si eadem fere satisfactionis opera omnibus imponeret, aliquot scilicet preces, quæ deficiente mentis attentione, & pio cordis affectu, ut plerumque contingit, nihil sunt aliud nisi labiorum obsequia; vel ea christianæ religionis officia injungeret, quæ jam divina, vel ecclesiastica lege omnibus præscripta sunt, vel ea bonorum operum genera, quæ cum poenitentis conditione, & statu minime congruunt, ut voluntarias corporis afflictationes infirmis, gravia jejunia operariis, & laboriosas artes exercentibus, peregrinationes mulierculis, vel denique ea præciperet, quæ apta non sunt prævalidas consuetudinum cupiditates coercere, vel gravioribus animi morbis mederi. Is certe & aliis, & sibi ipsi male consuleret, is suam, & aliorum salutem in magnum periculum adduceret.



CAPUT VIII.

De Absolutione.

ARTIC. I.

De recto usu potestatis Clavium.

QUUM Dominus noster Jesus Christus, absoluto per mortem suam humanæ reparationis opere plenitudinem misericordiæ suæ ostendere volens, ad reconciliandos fideles post Baptismum lapsos Sacramentum Poenitentiae instituit, emisso in Discipulos suos oris sui spiritu: *Accipite, inquit, Spiritum Sanctum, quorum remiseritis peccata, remittuntur eis, & quorum retinueritis, retenta sunt* (a); quibus verbis duplicem potestatem novi foederis Sacerdotibus contulit, alteram quidem ad solvenda, alteram vero ad retinenda, seu non dimittenda peccata, quemadmodum ante passionem suam ipsis discipulis dixerat: *Amen dico vobis, quaecumque alligaveritis super terram, erunt ligata & in cælo, & quaecumque solveritis super terram, erunt soluta & in cælo* (b); speciatim autem Apostolorum Principi: *Tibi dabo claves regni cælorum; & quodcumque ligaveris super terram, erit ligatum & in cælis, & quodcumque solveris super terram, erit solutum & in cælis* (c). Et sane utramque potestatem in Sacerdotibus agnoverunt Ecclesiæ Patres, ut animadvertit Concilium Tridentinum; *Claves Sa-*

(a) Jo. XX. 22. 23.

(b) Matth. XVIII. 18.

(c) Matth. XVI. 19.

Sacerdotibus non ad solvendum duntaxat, sed & ad ligandum concessas, etiam antiqui Patres & credunt, & docent (a); meritoque ipsum Concilium anathemate eos configit, qui solvendi tantummodo potestatem Ecclesiæ traditam fuisse contendunt: Si quis dixerit claves Ecclesiæ esse datas tantum ad solvendum, non etiam ad ligandum.... anathema sit (b).

Porro duplex ista potestas nobis data est, ut ea utamur, non temere, & pro arbitrio nostro, sed considerate, circumspecte, & juxta Dei voluntatem ac legem, nec quasi Domini, sed sicut boni dispensatores multiformis gratiæ Dei (c), ne saluberrimum hoc divinæ gratiæ munus in Dei contemptum, & animarum perniciem vitio nostro convertatur. Curandum igitur quam maxime est, ut in tantæ rei administratione fideles inveniamur, quemadmodum monet Apostolus ad Corinthios scribens: *Sic nos existimet homo, ut ministros Christi, & dispensatores mysteriorum Dei. Hic jam queritur inter dispensatores, ut fidelis quis inveniat (d);* quibus verbis innuere videtur inter multos dispensatores perpauca futuros esse, qui fideles appellari mereantur.

Dolebat vehementer, & apud populum suum graviter querebatur clarissimus Carthagenensium Episcopus, & gloriosus Christi Martyr Cyprianus, quod plures Sacerdotes intempestiva, & præpropere erga lapsos clementia reconciliationis gratiam ipsis largiebantur, qui satis certa veræ, & sinceræ poenitentiae argumenta nondum exhibuerant: *Emersit, fratres*

I 2

cha-

(a) *Conc. Trid. Sess. XIV. ca. VIII.*

(b) *Idem cap. XIV. Can. XV.*

(c) *I. Petri IV. 10.* (d) *I. Cor. IV. 1. 2.*

charissimi, novum genus cladis, & quasi parum persecutionis procella sævierit, accessit ad cumulum sub misericordiæ titulo malum fallens, & blanda pernicies. Contra Evangelii vigorem, contra Domini, ac Dei legem temeritate quorundam laxatur incautis communicatio: irrita, & falsa pax, periculosa dantibus, & nihil accipientibus profutura Operiuntur morientium vulnera, & plaga lethalis altis, & profundis visceribus infixæ dissimulato dolore contegitur Quid injuriam beneficium vocant? Quid impietatem vocabulo pietatis appellant? Hoc sunt hujusmodi lapsis, quod grando frugibus; quod turbidum sidus arboribus; quod armentis pestilens vastitas; quod navigiis sæva tempestas (a).

Hos animi sui sensus exposuerat S. Martyr Romano Clero, qui ejus doctrinæ consentiens, ipsius zelum pro animarum salute, & christiænæ disciplinæ custodia ita commendat, corroborat, & confirmat: *Tu tamen, frater, nunquam pro tua caritate desistas lapsorum animos temperare, & errantibus veritatis præstare medicinam, licet animus ægrorum respuere soleat medentium industriam Certi sumus, quod spatium productioris temporis amabunt hoc ipsum, ad fidelem se dilatos esse medicinam (b).*

Agebatur eo tempore de iis, qui tormentorum metu perculli, vel acerbissimis cruciatibus victi semel tantum ore tenus Christum negaverant, vel idolis immolaverant, vel ipsis thus adoleverant; nunc vero de iis agitur, qui licet Christum ore confiteantur, operibus tamen, non semel, sed centies fortasse negarunt, qui

(a) S. Cypr. de lapsis.

(b) Inter opera S. Cypr. Epist. XXX. juxta edit. Parisiens. 1666.

qui non persecutionis furore, aut tormentorum vi compulsi, sed ultro libenterque ex perversitate animi, & prava voluntatis inclinatione divinam legem contempserunt, qui suis cupiditatibus litant, qui suas, aliorumque animas immolarunt dæmoniis; qui in voluptatibus, & libidinibus volutantur, & apta suis vitiis remedia adhibere nolunt, nec vitare eorum irritamenta. An non igitur potiori jure ementita, & falsa habenda est eorum poenitentia? An non magis reprehendenda intempestiva illa indulgentia, qua ipsis tam facile impenditur absolutio, antequam satis probatam fecerint suæ poenitentiae sinceritatem? Et quanta porro hinc existit morum corruptela! quanta vitiorum lues! quanta animarum perniciēs!

Concilium Lateranense II. sub Innocentio II. celebratum anno 1139., in quo mille fere Patres convenerant, Presbyteros monet, ut non patiantur fidelium animas decipi fallaci poenitentiae specie, qua nihil est in Ecclesia magis periculosum & noxium: *Inter cætera unum est quod sanctam maxime perturbat Ecclesiam: falsa scilicet poenitentia. Idcirco Fratres nostros, & Presbyteros admonemus, ne falsis poenitentiis laicorum animas decipi, & in infernum pertrahi patiantur* (a).

S. Gregorius VII. ab imperitia, & negligentia Sacerdotum, qui Sacramenta populo ministrant, inter innumera, quæ in Ecclesiam exundant, mala, falsæ potissimum poenitentiae consuetudinem repetit: *Ex imperitia & negligentia Sacerdotum, quasi ex pestifera radice innumera mala exorta sunt, adeo ut usque ad hæc*

(a) Concil. Later. II. can. XXII. relato in cap. Fratres de poenit. dist. V.

nostra tempora inter cætera, quæ male pullulant vitia, falsæ nihilominus pœnitentiæ consuetudo invaluerit (a).

S. Thomas a Villanova tam grande malum amarissime deplorat his verbis: *Quid Ecclesiam Domini hodie perdit, nisi confessoriorum, & Pastorum blandiens adulatio, deliniciens, demulcensque assentatio? ... Promittunt pacem quibus non est pax, & veniam quibus æterna damnatio parata est. Sic animas mortuas & securas a suis pedibus mittunt, tanto miseres, quanto securiores. Vulnera liniunt, vermen conscientie extinguunt, stimulum peccati auferunt, & securos peccatores ad inferna demittunt; qui si timorem populo incuterent, forsitan illum a vitiis revocassent. Cui comparabimus adulatores istos, aut cui assimilabimus eos (b)?*

Proposito autem exemplo Lazari, qui prius a Christo suscitatus est, deinde Apostolorum opera a vinculis expeditus, docet non antea a Sacerdotibus solvandos esse fideles, quam a Christo per donum veræ poenitentiae a peccatorum sepulcro, in quo jacebant, revocati fuerint. *Non suscitatur a sepulcro medicus, sed Deus; sed quem suscitatur Deus, hunc solvit medicus. Prius ergo vadat, & concubinam a domo pellat, pecuniam alienam restituat, contractus usurarios rumpat, famam proximi læsam, prout potest, resarciat, mercenariorum labores, & pauperum debita solvat; offenso fratri reconcilietur, & veniam petat; & tunc ad confessorium redeat, & absolvatur. Hic rectus est ordo, hic in Lazari suscitatione a Domino servatus est. Hunc ordinem*

(a) S. Gregor. VII. lib. VII. cap. 10.

(b) S. Thom. a Villan. serm. habito ser. 6. post Dom. IV. Quadrag.

nem ne transgrediaris. O medice, cur scelerem solvis? Cur indigno veniam promittis? Cur cui absolutionis beneficium exhibeas, non discernis? Duas tibi claves Dominus dedit, unam discernendi, alteram judicandi, absolvendi scilicet, & ligandi; & tu sine discretionis examine neminem ligas, omnes absolvis. Una tantum clave, neque integra quidem uteris, sed dimidiata. Hinc lamentabiles Jeremiæ voces usurpans: Heu heu, inquit, ventrem meum doleo, ventrem meum doleo (a). In domo Dei horrendum vidi: Pastores Domini sui oves jugulantes, medicos populi sui ægrotos occidentes: judices turpibus blandientes. . . . Cæcos gregem Domini dirigentes. An non horrendum hoc? Hi sunt prophetae mendaces, in quos Dominus per prophetam irvebitur dicens: eo quod deceperint populum meum dicentes: Pax & non est pax: & ipse ædificabat parietem, illi autem liniebant eum luto absque paleis (b).

Denique hujusmodi animarum ductoribus extremi judicii rigorem sic denunciat: *O miseri animarum non curatores, sed interfectores, non consultores, sed deceptores! Quid respondebitis Domino pro grege, quem vestris blanditiis decepistis, vestris consiliis jugulastis?*

S. Carolus agens de neganda, aut differenda indignis absolutione affirmare non dubitat ob sacerdotum in hac re inconsiderantiam, & negligentiam potissimum contingere, ut multi diuturno tempore in peccandi consuetudine perseverent: ut in plerisque artibus, & professionibus innumera corruptela, & gravissima vitia passim vigeant non sine ingenti animarum exitio (c).

I 4

Car.

(a) Jer. IV 19. (b) Ezech. XIII. 10.

(c) S. Carolus Monita ad Confessarios.

Cardinalis Federicus Borromæus, qui S. Caroli vestigia summa cum laude persecutus est, triplici sermone parænetico confessarios infectatur, qui ob inscitiam, inconsiderantiam, vel ignaviam quibuscumque vel indignis præcipitanter ac temere sacramentalem absolutionem largiuntur, & istiusmodi agendi ratione non æternæ animarum salutis, sed terrenis suis utilitatibus student, & quærunt quæ sua sunt, non quæ Jesu Christi. Illustre autem exemplum ipsis proponit S. Raymundi de Pennafort, qui quum potentissimo Regi a confessionibus esset, nullis precibus, & blanditiis adduci potuit, ut ipsi in peccandi occasione voluntario versanti absolutionis beneficium impertiret, & maluit Regem deferere, atque ab insula Baleari majori, in qua apud ipsum degebat, se se proripere, quam a sanctissimo officii sui munere declinare. Quoniam vero nullo sibi concessum erat uti navigio, strato super aquas pallio, ejus ope tractum maris centum sexaginta milliarium ad oram usque Barcinonensem sex horis confecit, & noctu iuum coenobium januis clausis ingressus est, quo quidem prodigio sacerdotalem sancti viri constantiam Deus probavit, ac mirifice commendavit.

Venerabilis Cardinalis Bellarminus sic stilum acuit adversus Sacerdotes, qui nimia facilitate absolvendi a peccatis facilitatem peccandi inducunt, & suas, aliorumque animas miserrime perdunt: *Illi se ministros, & dispensatores non agnoscunt, qui, quasi non essent Domino rationem reddituri, summa facilitate omnibus manum imponunt, & tam contritos, quam non contritos, tam plene, & perfecte confitentes, quam peccata sua quadam confusa generalitate involventes,*
tam

tam satisfacere paratos, quam non paratos, quasi propria potestate, & auctoritate absolvunt. Isti sua imperitia, & superbia corrumpunt populos, & eis veræ pœnitentiæ viam præcludunt. Nec enim esset hodie tanta facilitas peccandi, si non esset etiam tanta facilitas absolvendi. Veniunt homines onusti peccatis, & qui millies in eadem ceciderunt, & veniunt sæpe sine ullo signo doloris, vel pridie, vel ipso die summæ celebritatis; & statim absolvi, & ad sanctorum mysteriorum communionem accedere volunt. Et nos iudices inconsiderati, dispensatores infideles omnibus manum imponimus, omnibus dicimus: Ego te absolvo; vade in pace. Sed vœ vobis, cum Dominus rationem ponet cum servis suis. Servi sumus, dispensatores sumus, non Domini sumus. Causam Dei, non nostram agimus; offensas Dei, non nostras remittimus (a). Ob hanc causam vir piissimus, & doctissimus male admodum cum S. Joanne Chrysostomo ominatur de Sacerdotibus, quorum causa tam multæ animæ pereunt, & tremendam illam ipsius sententiam usurpat: Non temere dico, sed ut affectus sum, ac sentio: non arbitror inter Sacerdotes multos esse, qui salvi fiant, sed multo plures qui pereant. Unius enim animæ perditio tantam habet jacturam, ut nulla ratione possit æstimari.

Piget alios commemorare scriptores pietatis, & doctrinæ laude clarissimos, qui tantum malum deplorant; juvat tamen animadvertere unam eandemque esse eorum omnium sententiam, funestissimas, quæ in populo christiano grassantur, morum corruptelas ab immoderata confessoriorum in erogandis absolutionibus facilitate, atque indulgentia prodire; neminem

au-

(a) *Ven. Card. Bell. Conc. 8. Dom. IV. Advent.*

autem inveniri, qui nimis eorum severitati tantum malum tribuant, quod quidem mirandum non est; nam si qui sint vel rigidioris doctrinæ, vel nimis anxie, & meticulosæ conscientie Sacerdotes, qui ad se accedentes ex-crucient, vel plus justo detineant, caute ab omnibus vitantur, vel cito deferuntur; contra vero plurimi ad eos confluunt, qui confitentium vitiis blandiuntur, qui non explorant præparationem cordis ad sacramentum Poenitentiae suscipiendum; qui non inquirunt in peccandi consuetudines, non in peccatorum occasiones, & causas, vel in peristases, ex quibus pendet eorum gravitas, & species; non in neglectum officiorum, quæ pro sui status ratione cuique incumbunt; audita autem confessione, qualiscumque ea sit, nihil ultra sciscitantur; nec monita salutis confitentibus tribuunt, sed levissima, & plane incongrua poenitentia imposita eos citissime absolutos dimittunt.

Istiusmodi Poenitentiae sacramenti ministri, quos strenuos in vinea Domini operarios ignarum vulgus prædicat, redeuntibus potissimum celebrioribus festis ingenti virorum, aut mulierum confiteri volentium multitudine circumstipati cernuntur; nec mirum; nam & in foro rerum venalium, si quis sit, qui alicujus generis mercem viliori pretio vendat, innumeros ad se trahit emptores, ut animadvertit S. Bernardinus Senensis: *Occurrit in confessione, sicut in mercatoribus vendentibus pannos ejusdem bonitatis, conditionis, & collationis, & unus vendet pannum suum pro minori pretio, quam alter; certe ille mercator habebit majorem concursus, qui vendet minori pretio, quam qui vendet majori; ita hodie accidit in confessione;*

&

..... & sic fit mercatura de pœnitentiis, & sic peccatores decipiuntur, & mittuntur ad inferos (a). Et sane hinc oritur perpetuus itus & reditus a peccato ad confessionem, a confessione ad peccatum; hinc tam rara vitæ, morumque emendatio post innumeras confessiones; hinc incredibilis animarum multitudo in inferorum supplicia pertrahitur, ut discipulæ suæ in visu testata est S. Theresia, adeo ut merito illud Prophetæ usurpare liceat: *Propterea dilatavit infernus animam suam, & aperuit os suum absque ullo termino* (b). Cautè igitur in hujus Sacramenti administratione, eæque omnino servandæ sunt regulæ, quas infra proponimus.

A R T I C. II.

Quibus deneganda, vel differenda sit absolutio.

Quoniam poenitentis contritio ex Tridentini doctrina pars est necessaria, & quasi materia sacramenti Poenitentiae (c), liquet profecto ab hujus sacramenti Ministro iis denegandam esse absolutionem, quos ipse noverit esse contritionis expertes; reus quippe evaderet gravis sacrilegii, si sciens & volens irritam atque inanem absolutionem impenderet, & Sacramentum conficere auderet sine materia divinitus constituta. Quare Rituale Romanum Conciliorum sanctionibus, & Patrum doctrinæ inhærens Sacerdotem monet, *ne absolvat eos, qui*

(a) S. Bernardin. Senen. tom. III. ser. III. post. V. Dom. Quadr. serm. XXXIV. (b) Isa. V. 14.
(c) Concil. Trident. Sess. XIV. ca. 3.

qui talis beneficii sunt incapaces : quales sunt , qui nulla dant signa doloris , qui odia & inimicitias deponere , aut aliena , si possunt , restituere , aut proximam peccandi occasionem deserre , aut alio modo peccata derelinquere , & vitam in melius emendare nolunt : aut qui publicum scandalum dederunt , nisi publice satisfaciant , & scandalum tollant (a) .

Porro nulla exhibent signa doloris , qui audacter , irreverenter , & perfricta fronte , vel immodesto , atque inverecundo corporis ornatu & cultu ad sacrum tribunal accedunt , & magis Pharisei arrogantiam ac superbiam , quam Publicani in templo orantis humilitatem & poenitentiam præ se ferunt ; qui scelera sua imperturbato animo recitant , quasi jocosas , vel adiaphoras fabulas ; qui admissas culpas inter confitendum excusare & extenuare nituntur , vel etiam in alios transferre ; qui aliqua crimina studiose celant , quæ postea Confessarii eorum conscientias excutientis solertia eruuntur ; qui Sacerdotis monita & præcepta impatienter & fastidiosè audiunt , & salutaria poenitentiae opera sibi imposita , licet moderata ac facilia , respuunt ; & renuunt ea implere , quæ ad vitanda peccata , vitamque recte instituendam necessaria sunt . Isti quidem ad recipiendam Sacramenti gratiam censeri non possunt rite comparati , ideoque sine absolutione dimittendi sunt .

Nec sane ulla manet spes veniæ iis , qui odia & inimicitias volunt deponere , quum dixerit Dominus : *Si non dimiseritis hominibus , nec Pater vester dimittet vobis peccata vestra (b) : tum illud*

(a) *Ritual. Rom. de Sacram. Pœnit.*

(b) *Matth. VI. 15.*

illud etiam: *Dimittite, siquid habetis adversus aliquem..... Quod si vos non dimiseritis, nec Pater vester, qui in cælis est, dimittet vobis peccata vestra* (a). Huc quoque spectat parabola de iniquo servo, qui quum magnam a Domino suo affecutus fuisset misericordiam, immitis atque immisericors fuit erga conservum suum, a quo nixus est pecuniam sibi debitam vi extorquere, unde ab irato Domino traditus est tortoribus acriter excrucandus; donec redderet universum debitum, cui quidem narrationi hæc addit Salvator noster: *Sic & Pater meus cælestis faciet vobis, si non remiseritis, unusquisque fratri suo, de cordibus vestris* (b). An vero quispiam censendus erit injurias de corde suo condonasse fratri suo, si ipsi præstare nolit communia & usitata humanitatis officia, & christianæ benevolentiae signa, cujusmodi sunt, data occasione congregari, alloqui, obvium salutare; si paratus non sit opem indigenti ferre, atque implere præcipuum illud Domini nostri pæceptum: *Benefacite his, qui oderunt vos* (c); si contra de secundis ipsius rebus dolore afficiatur, de adversis vero gaudeat; si ipsi facile detrahat, vel obloquentes libenter audiat? Is certe quandiu hunc animum gerit, non potest reconciliari Deo per sacramentum Poenitentiae.

Idem esto judicium de iis, qui aliena, quum possint, restituere nolunt. Non remittitur peccatum, inquit Augustinus, nisi restituatur ablatum, cum restitui potest (d). Quum autem restitutionis necessitas oriatur ex injusta acceptione, ut si rapina,

(a) Marc. XI. 25. 26.

(b) Matth. XVIII. 35.

(c) Matth. V. 44.

(d) S. August. Epist. LIV. ad Maced.

pina, furto, dolo, aut fraude quidquam alteri ablatum fuerit; *ex injusta detentione*, ut si operariorum mercedes retineantur, vel æris alieni solutio plus justo differatur; *ex damno illato*, ut si quis alterius domum incenderit, vel agrum devastaverit; denique *ex contractu*, vel *quasi contractu*; videndum est, quam ex hujusmodi causis restitutionis, aut compensationis legi subjiciatur poenitens, & serio monendus, ut hanc justitiæ partem impleat, vel certe magno studio implere conetur; quod si id præstare nolit, non erit absolvendus.

Equidem inopiam, & rei familiaris angustiam causari solent, qui restitutionis, vel compensationis præceptum implere detrectant. Sed adducendi omnino sunt, ut suis commodis & voluptatibus subtrahant, quod aliis debetur; nempe si nobilis, aut honestæ conditionis sint, ut ab omni luxu & pompa temperent, ut frugali utantur mensa, modestiore apparatu, minori famulitio, & amore justitiæ tam parce vivant, ut alii faciunt suadente avaritia, quin tamen a sua conditione excidant. Si autem sint plebei, aut rustici, impensius insistant laboribus, popinas vitent, lusu abstineant, nec sumptus faciant minime necessarios. Quod autem de reparando damno alienis rebus illato dictum est, de farciendo quoque famæ detrimento intellectum oportet: quod quidem officium sæpe negligitur; nam quo facilius lædatur alterius fama, eo difficilius reparatur.

Anne vero licebit eos absolvere, qui proximam peccandi occasionem, in qua versantur, amoliri nolunt, aut deserere? Proxima peccandi occasio ea est, in qua quis constitutus prudenti judicio censetur peccaturus. Variæ autem

autem, atque inter se diversæ recensentur occasiones proximæ: aliæ enim *per se*, atque *ex genere suo*, spectata potissimum humanæ naturæ imbecillitate & corruptione, aptæ sunt homines in peccatum inducere, ut turpia atque obscœna conspiceret, vel cum hominibus vitio aliquo corruptis amicitiam & consuetudinem jungere, vel cum impudica muliere familiariter agere: aliæ vero hujusmodi sunt *per accidens*, ut ajunt scholæ, per accessionem scilicet alterius causæ, quæ facit, ut vix, aut ne vix quidem peccatum vitari possit, ut quædam officii munera, honesta quidem suapte natura, innoxia, tum vero etiam sanctissima, ut militis, medici, negociatoris, judicis, parochi, confessorii, quæ aliquibus esse possunt proximæ peccandi occasiones ob eorum inscitiam atque imperitiam, vel peculiarem animi infirmitatem, & vehementes cupiditates, quibus non valent obsistere. Rursus occasiones proximæ vel *voluntariæ* sunt, quæ sine gravissimo periculo aut damno vitari possunt; vel *involuntariæ*, ac *necessariæ* necessitate sive *physica*, ut si quis in carcere, vel in triremi vinctus detineatur cum flagitioso, a quo ad peccandum adducitur; sive *moralis*, a qua quis difficillime, nec sine gravissimo periculo aut damno se expedire potest, ut si puella paterna in domo habeat impurum amatorem, a quo sollicitatur ad turpia, vel si quis in peccatum adducatur ejus muneris officiique causa, quod nequit sine ingenti jactura ac damno dimittere.

Sane ab odio & detestatione peccari, ideoque a vera poenitentia longe abest, qui statim, quum possit, recedere non vult a proxima peccandi occasione cum peccato ipso morali quodam

dam nexu conjuncta, imo vero perstat in voluntate peccandi; nam ex duobus inter se colligatis atque connexis qui unum vult, aliud quoque velit necesse est, ideoque absolutione donari non potest.

Sed etsi poenitens polliceatur a proxima, in qua voluntario versatur, occasione se recessurum esse, hæc vero jugiter ac vehementer ad peccatum impellat, ut si apud se concubinam habeat, non antea absolvendus est, quam illam reipsa dimiserit; si vero agatur de aliis occasionibus non ita valide urgentibus, poenitens autem ab ea se recessurum spondeat, poterit prudens Sacerdos eum absolvere, dum alias veræ poenitentiae notas in eo deprehendat; si autem hujusmodi promissa alias violaverit, differenda ei est absolutio extra mortis periculum, donec emendationem suam probatam fecerit. Ita S. Carolus: *Pœnitentem in aliqua ex his occasionibus & similibus involutum, si urgens sit illa occasio, ut qui concubinam in sua potestate habeat, non debet sine dubio confessarius absolvere, nisi hanc occasionem antea sustulerit; pro aliis vero occasionibus, quales sunt asidua alearum ludo vacatio, aspectus minus pudici, periculosa confabulationes &c. non absolvatur pœnitens, nisi eas dimittere polliceatur. Quod si jam alias pollicitus sit, nec emendatus fuerit, absolutio tandiu differatur, donec aliqua appareat emendatio (a).*

Monet præterea, ut caute incedat confessarius circa quasdam actiones, aut consuetudines, quæ nihil habent necessitatis aut utilitatis, humanos autem animos facile inclinant ad vitia, & sæpe ad mortalia peccata pertrahunt, ut choreis interesse

(ad.

(a) S. Carolus Monita ad Confess.

(adde etiam scenicis spectaculis), cum blasphemis, & rixosis hominibus versari sæpius, populas frequentare, indulgere otio, & id genus alia, quæ consuetudinem adferunt peccandi mortaliter, nam absolutionem non debet impertiri, quin his omnibus renunciet pœnitens, spondeatque ab iis abstinere diligenter. Si tamen confessarius prudenter judicet se posse fidem adhibere pœnitenti promittenti eorum fugam, semel iterumque poterit absolutionem indulgere, ea tamen semper lege, ut si in iis diutius immoretur, eam postea differat, donec certis & evidentibus indiciis constet illum ab his occasionibus esse segregatum (a).

Si autem quisquam devinctus inveniat occasione proxima physice necessaria, quam scilicet nullo modo removeere aut effugere potest, non est absolvendus, tamet si appareat contritus, nisi forte mors immineat, donec sublatum fuerit periculum proximum peccandi, atque ea occasio proxima evaserit remota. Eum tamen monere oportet, ac magnopere hortari, ut jugi oratione, sensuum custodia, cupiditatum cohibitione, carnis mortificatione, frequenti confessionis usu perniciosæ occasionis vim eludere atque enervare nitatur. Et certe ad hujusmodi conatus eliciendos plures mirifice compellit absolutionis prorogatio, ac facit ut e vitis emergant, in quibus misere computrescerent.

Eadem curationis ratio iis abhibenda est, qui in aliqua peccandi occasione per se aut per accidens proxima morali quadam necessitate detinentur, quum sine gravissimo periculo, aut damno nequeant ab ea recedere. Si autem pœnitens præscripta remedia ex animo acceptet,

K

ac

(a) S. Car. ib.

ac sufficientia poenitentiae indicia edat, absolvendus erit. Si vero nullo remediorum usu constanti licet ac diuturno prohiberi possit, quominus praevalida occasionis vi in peccata ut antea impellatur, sine absolutione dimittendus erit, donec occasionem ipsam dimiserit, quidquid inde temporalis damni ac periculi sit obventurum, ut docet S. Carolus: *Si vero Confessarius absolutionem differre non possit, quin poenitentem exponat gravi infamiae periculo, tum si contritum certis quibusdam notis videat, aut ita mente affectum, ut ad omnia remedia paratus sit, quae ad illius emendationem necessaria judicaverit prudens Sacerdos tunc debet eum absolvere. Quod si mediis ad emendationem adhibitis adhuc peccat, ut antea; tunc per negationem absolutionis cogendus erit ad deferendam illam occasionem (a).* Quod quidem Dominus Servator noster faciendum esse praecipit illis verbis: *Si oculus tuus dexter scandalizat te, erue eum, & projice abs te & si dextra manus tua scandalizat te, abscinde eam, & projice abs te (b).*

Inter occasiones proximas nulla sane perniciosior est inveterata peccandi consuetudine, nam istiusmodi occasio vitari, & sine ingenti ac diuturno conatu removeri non potest, quum ipsi animo tenaciter adhereat; tanta vero est vis & potestas, qua ad peccatum impellit ob eas causas, quas superius enumeravimus c. VI. art. II., ut moralem inducat peccandi necessitatem. Sacerdotis officium est pravam confidentis consuetudinem investigare, & sciscitari quandiu in ea perstiterit, & quos conatus ediderit, ut se se ab ipsa expediret: an, & quoties

(a) S. Car. *ibid.*

(b) Matth. V. 29. 30.

ties labente eo tempore exomologesim fecerit, & ad sacram synaxim accesserit. Tum poenitens Confessario hac de re interroganti veritatem aperire debet; damnata enim est ab Innocentio XI. propositio hæc 58. *Non tenemur Confessario interroganti fateri peccati alicujus consuetudinem*. Oportet autem ut Sacerdos caute se gerat cum poenitentibus, quos noverit prava aliqua consuetudine implicatos, nec antea ipsis absolutionem impertiat, quam veræ contritionis, & emendationis sufficientia argumenta exhibuerint.

Solent quidem confitentes testari peccatorum suorum ex animo se poenitere, & vitam suam in melius emendare velle; nec sane censendum est Christi ministro eos mentiri velle, & Omnipotentis iram in se provocare; sed falluntur ipsi, & se ipsos decipiunt, dum quemlibet poenarum metum pro sincera detestatione peccati accipiunt, quamlibet nutantem, & conditionatam voluntatem, quæ vulgo *velleitas* appellari solet; pro plena atque absoluta; quodlibet imperfectum & inchoatum boni desiderium pro sincero ac firmo emendandæ vitæ proposito; ideoque eorum dictis non est in hac re fides adhibenda.

Sed neque gemitus, suspiria, & lacrymæ sufficientia indicia sunt veræ poenitentiae; sæpe enim prodeunt ex molli ac debili animi natura, ut contingit in mulieribus; vel ex consideratione temporalium malorum atque ærumnarum, quibus peccatores suis ipsis criminibus se innectunt; ut fur, aut homicida, qui poenis per leges sancitis obnoxium se fecit; ut puella, quæ, quum pudorem abjecerit, dedecus atque ignominiam sibi conscivit; ut ii, qui lu-

do, crapula, aut alio libidinum genere in egestatem, morbos, dolores, summamque miseriam se ipsos conjecerunt.

Quandoque etiam istiusmodi doloris signa oriuntur ex interiori lucta inter carnem & spiritum, inter rationem & concupiscentiam, in quo conflictu caro spiritui prævalet, concupiscentia rationi. Sic Augustinus, dum adhuc teneretur suarum cupiditatum vinculis, & prava consuetudine miserabiliter premeretur, de se ipso querebatur, adversum se ferebatur vehementi indignatione, ut idem ipse testatur in suis confessionibus: *Suspirabam ligatus non ferro alieno, sed mea ferrea voluntate* (a); *Et dimisi habenas lacrymis, Et proruperunt flumina oculorum meorum.... Sentiebam enim me ab iis iniquitatibus teneri, Et jactabam voces miserabiles* (b). Hæc porro, quæ in se ipso expertus est Augustinus, antequam abdicatis mundi illecebris, & sensuum oblectamentis ad Deum toto corde se se converteret, pii quidem motus sunt a divina gratia, quæ nos ad poenitentiam vocat, in cordibus nostris excitati, non tamen cenferi possunt veræ poenitentiae argumenta.

Putant nonnulli sufficiens veræ poenitentiae indicium haberi, quum quis a peccatis, quibus assuetus erat, non modico temporis spatio se se continuerit. Videndum tamen, utrum id fecerit sincero emendandæ vitæ consilio, an potius ut absolutionem paschali potissimum tempore surripiat in eadem ipsa peccata post absolutionem prolapsurus. Videndum etiam, an aliquandiu peccare destiterit, propterea quod de-

(a) S. August. Conf. lib. VIII. cap. V. 1.

(b) Idem lib. VII. cap. XII. 1.

defuerit peccandi occasio, vel potestas; nam sæpe fures a latrociniiis temperant, quia nulla se exhibet occasio impune furandi; ebriosi a vino, quia, quum careant pecunia, nequeunt cauponas frequentare; impudici a fornicationibus atque adulteriis, quia gravi aliquo morbo conflictantur.

Verum quid refert, ut quis ab eo se abstinere malo, quod perpetrare non potest? An forte ob id melior censendus erit, quum in eo adhuc vigeat mali desiderium tanto vehementius, quanto difficilius expleri potest? Is profecto laudatur, *qui potuit transgredi, & non est transgressus, facere mala, & non fecit* (a), maxime vero si graves pertulerit tentationes, eisque fortiter obstiterit oratione, rerum æternarum meditatione, sensuum custodia, & christiana mortificatione munitus, veluti galea salutis, & lorica justitiæ, & scuto fidei, ut possit extinguere tela nequissimi ignea (b).

Definiri nequit in universum quomodo probanda sit ejus conversio, qui in aliqua peccandi consuetudine diu versatus est, antequam sacramentali absolutione donetur. Accurate enim perpendendum est, quandiu vigerit funesta illa consuetudo & quam crebri fuerint in peccatum lapsus; quo tempore coeperit cavere a peccatis; quas internas expertus fuerit luctas, quam vehementes tentationes, & quam valide ipsis obstiterit; quam caute vitaverit peccandi pericula; quo animi fervore, qua assiduitate & constantia orationi, æternarum rerum meditationi, sensuum mortificationi, aliisque christianæ pietatis ac misericordiæ officiis operam dederit. Horum omnium habenda est ratio,

ut

(a) *Eccli. XXXI. 10.* (b) *Ephes. VI. 16.*

ut prudens de vera poenitentis conversione feratur iudicium, nec plus æquo ei differatur, aut festinetur absolutio.

Si autem contingat, ut is post impetratam absolutionem, tametsi in bonis operibus supra memoratis se se exercere non prætermiserit, ob fortuitam aliquam & minime quæsitam occasionem, vel ob vehementem tentationem, quæ vix reliquerit seriæ considerationi locum, vel non nisi post durum certamen victus semel aut iterum peccaverit, adhuc absolvi poterit, ejus enim lapsus humanæ potius infirmitati, quam voluntatis nequitie ac perversitati tribuendum est; quandoquidem vera poenitentia, & ipsius Sacramenti gratia concupiscentiam non destruit, nec funestissimas pravæ consuetudinis vires omnino extinguit, nec bonam voluntatem inexpugnabilem efficit. Meritoque propterea Tridentina Synodus anathema ei dicit, *qui hominem semel justificatum dixerit amplius peccare non posse, neque gratiam amittere atque ideo eum, qui labitur & peccat, nunquam vere fuisse justificatum* (a). Magnopere autem hujusmodi lapsum hortari oportet, ut majores conatus exerat, impensiusque insistat orationi, aliisque bonis operibus, quæ validiora divinæ gratiæ auxilia nobis conciliant.

Quid vero de iis statuendum putabimus, qui perpetua vicissitudine a confessione ad peccata, a peccatis ad confessionem in duas veluti partes claudicant, ut loquitur Propheta (b), nunc Deo litantes, nunc idolo Baal, diabolo scilicet, mundo, & suis concupiscentiis? Quanta-cumque sit humani animi mobilitas & inconstan-

(a) *Conc. Trid. Sess. VI. Can. XXIII.*

(b) *211. Reg. XVIII. 21.*

stantia, neminem certe invenire erit, qui nunc sinceræ amicitiae foedus cum alio ineat, mox vero per gravem injuriam illud abrumpat; nunc ira atque odio in alium exardescat, mox vero cum eo in gratiam redeat, idque non semel faciat, sed frequentissime. Quis igitur adduci potest ut credat veram & sinceram esse eorum poenitentiam, qui redeuntibus quibusdam præcipuis festivitatibus exomologesim faciunt, sed postera die, vel cum primum aliqua exsurgit tentatio, in eadem ipsa relabuntur mortifera peccata, quæ in confessione aperuerunt, nec ullam præ se ferunt vitæ emendationem? Qui fieri potest ut is, qui toto corde adhæsit Deo per poenitentiam, qui peccatum malorum omnium maximum summo odio abominatus est, firmiterque statuit omnia potius perferre mala, quam in ipsum relabi, qui insuper Sacramenti gratia roboratus constantior effectus est in proposito, tam cito, tam frequenter, tam facile a Deo recedat, in peccatum corruat, & sine certamine sponte se dedat diabolo? Hujusmodi specie tenus poenitentes a Sancto Isidoro Hispalensi irrisores appellantur: *Irrisor est, non poenitens, qui adhuc agit, quod poenitet* (a).

Horum ergo poenitentia diuturniori experimento probanda est, antequam de ejus sinceritate judicium feratur, atque interea differenda est absolutio, nisi forte mortis periculum, vel insignis poenitentis fervor aliud suadeat. Quum autem prudenti judicio digni censeri poterunt, qui absolutionis gratia donentur, monendi omnino erunt, ut de præterito sacramentorum abusu atque contemptu doleant, ite-

(a) S. Isidor. Hispal. lib. II. Sent. cap. XVI.

iterentque præteritas confessiones, quæ vel sacrilegæ, vel certe irritæ atque inanes fuerunt, deficiente nimirum vera cordis contritione, & sincero ac firmo emendandæ vitæ proposito.

Quin etiam sacramentalis absolutio proroganda est languidis & tepidis, qui quum semel aut bis in hebdomadam confiteantur, veniales tantum noxas, in quas consulto, & deliberato animo labi solent, ad sacrum tribunal semper adferunt, nec sincerum emendationis studium præ se ferunt. Sane quum pars præcipua Sacramenti Poenitentiae sit intima cordis contritio cum sincero & efficaci proposito vitandi peccata, consequens est ut Sacramentum ipsum irritum faciat, qui hujusmodi caret proposito; eo autem caruisse convincitur, qui iisdem fere venialibus peccatis se se perpetuo commaculat, v. gr., voluntaria evagatione mentis inter orandum, otiositate, atque inertia, immoderato usu cibi aut potus, nimio corporis cultu atque ornatu, indignatione, iracundia, impatientia, dictariis, obtreptionibus, irrisionibus, quæ charitatem lædunt. Et is quidem, dum in hoc miserando statu jacet, nec conatur assurgere, haudquaquam comparatus videtur ad Sacramenti gratiam suscipiendam.

Nec satis huic malo obviam iri putandum est, si poenitens grave aliquod anteactæ vitæ peccatum, quod potestari clavium alias subjecerit, rursus in confessione aperiat, atque ex animo detestetur; oportet enim ut poenitens firmiter statuatur vitam suam in melius emendare, & debitam satisfactionem pro patratissimis criminibus Deo exhibere. Anne vero hocce animi propositum habere potest serium ac firmum, qui efficacem non gerit voluntatem majores

jores exerendi conatus ad eas noxas vitandas, in quas consulto & deliberate labi solet quotidie; qui potius paratus est novis offensis divinam Majestatem lædere, quam ipsi pro præteritis satisfacere? Præterea si ad sacramentum Poenitentiae, tum vero etiam ad sacram Synaxin rite comparatus accederet, gratiam quoque utriusque Sacramenti acciperet, qua firmatus & roboratus non ita facile in quotidianas laberetur noxas, & in via christianæ perfectionis alacrius progrediretur. Huic igitur absolutio proroganda est, quoadusque mores suos emendare impensius conetur.

Quod quidem interdum fieri expedit etiam cum poenitente, qui bene præparato animo censetur esse ad Sacramenti gratiam recipiendam, ut hoc pacto in proposito magis confirmetur, & fervidiori christianæ virtutis studio incendatur, ut ex communi Doctorum sententia docet sapientissimus Cardinalis De Lugo. *Quum ergo, inquit ille, Confessarius judicat expedire dilationem absolutionis ad hoc ut poenitens reddatur magis cautus, & confirmetur in proposito non peccandi, nec ita facile postea relabatur, potest certe, & debet aliquando, uti medicus, hoc remedium poenitenti adhibere, nec potest agrotus rationabiliter conqueri adversus medicum, cui se in hoc Sacramento curandum tradidit. Neque in hoc debemus recedere a communi sententia, cui ad stipulatur experientia multorum poenitentium debilium, qui hoc remedio adhibito, brevi tempore solent curari (a). Difficultas esse potest, an possit esse causa rationabilis aliquando ad differendam absolutionem absque consensu poeniten-*

L

(a) Card. De Lugo de Sacram. Poenit. disp. XLV. Sect. X. num. 171. edit. Lugd. 1644.

sentis, licet ipse aliunde credatur probabiliter esse nunc dispositus; in quo procul dubio videtur vera communis sententia affirmans, cujus ratio desumitur ex fundamento contrario; nam licet pœnitens legitime dispositus, confessione facta, habeat jus ad sententiam & ad absolutionem, non tamen habet jus ad hoc, ut statim proferatur sententia; potest enim iudex arbitrari, quomodo, & quando debeat utilius proferri sententia (a).

Docet præterea Rituale Romanum absolvendos non esse, qui publicum scandalum dederunt, nisi publice satisfaciant, & scandalum tollant. Definitur scandalum a S. Thoma dictum, vel factum minus rectum præbens alteri occasionem ruinae (b). Publici autem scandali rei sunt, qui voce aut scripto christianam pietatem irrident aut contemnunt; qui falsa atque impia evulgant dogmata adversus fidei aut morum doctrinam pugnantia; qui amatorias fabulas, vel pictas tabulas edunt impuros affectus excitare aptas; qui novas invehunt morum corruptelas; qui alios ad turpia alliciunt, ut lenones & meretrices, aliæque mulieres, quæ indecoro, inverecondo, & fere meretricio ornatu & cultu delectantur; qui opem præstant criminosis hominibus, & peccandi commoda atque adjumenta subministrant, ut caupones & tabernarii, qui aleatores, ebriosos, impudicos, festorum dierum profanatores, tum vero etiam fures recipiunt, & res furtivas recondunt. His accensendi sunt quotquot palam atque in oculis omnium vitam agunt christiano homine indignam, & pravis morum exemplis eo plus nocet, quo magis aliis nobilitate, opibus, aut di-

(a) *Idem ibid. num. 168. 169.*

(b) *S. Thom. 2. secunda quæst. XLIII. art. I.*

gnitatibus antecellunt. Hi omnes, antequam absolutione donentur, compellendi sunt publicæ offensionis occasionem e medio tollere, tum vero etiam conari, ut spiritualia damna aliis, illata publicis veræ poenitentiae atque emendationis argumentis reparare conentur, quanquam id operis, quam maxime arduum ac difficile est; agitur enim de lue perniciosissima, quæ cito in infinitum diffunditur, de incendio a parva scintilla excitato, quod brevi temporis spatio ita excrescit, ut nulla arte atque industria restingui possit, aut prohiberi, ne in immensum propagetur. Porro quod de publico scandalo amovendo ac farciendo dictum est, privato etiam scandalo aptari potest.

Præcipit etiam Rituale Romanum, ut *si Confessarius pro personarum qualitate cognoverit poenitentem ignorare christianæ fidei rudimenta, si tempus suppetat, eum breviter instruat de articulis fidei, & aliis ad salutem cognitu necessariis*. Si autem id præstari nequeat, consequens est, ut commodiori tempore vel ab ipso confessario, vel ab aliis poenitens erudiat, quo fieri possit particeps sacramenti Poenitentiae; *Fides enim humanæ salutis initium est, fundamentum, & radix omnis justificationis*, ut loquuntur Tridentini Concilii Patres (a). Et sane, quum Deo reconciliari nequeat peccator sine detestatione peccati, hæc vero necessario pendeat a veritatibus revelatis, quæ veræ poenitentiae rationes & causas nobis exhibent, manifestum est hominem fidei expertem Deo reconciliari non posse. Verum qui fieri potest ut christianæ fidei veritates credat, qui eas poenitus ignorat? Igitur absolutionis gratia donari

L 2

non

(a) Conc. Trid. Sess. VI. c. VIII.

non potest, qui in hac ignoratione versatur, ut definitum est ab Innocentio XI. per damnationem hujus propositionis, quæ in ordine est 64. *Absolutionis capax est homo, quantumvis laboret ignorantia mysteriorum fidei, & etiam si per negligentiam etiam culpabilem nesciat mysterium SS. Trinitatis, & Incarnationis Domini Nostri Jesu Christi.*

Sed & ii, qui præcipua quidem christianæ fidei mysteria tenent & credunt, quorum fides explicita omnino necessaria est ad salutem, reliqua autem dogmata, quæ in symbolo fidei continentur, vel Dei & Ecclesiæ præcepta, & communia christiani hominis officia, aut proprii status peculiaria per culpabilem desidiam atque ignaviam ignorant (quod quidem ex ipsa eorum confessione, adhibitis potissimum opportunis interrogationibus, facile dignoscitur), absolvendi non sunt, nisi perniciosissimam ignorationem suam ex animo detestentur ac deplorent, firmiterque statuunt & polliceantur in excipiendis catechesibus se assiduos fore, & sedulam christianæ doctrinæ operam duros. Qui autem semel atque iterum moniti non curant ignorantiae suæ tenebras disjicere, sine absolutione dimittendi sunt; neque enim salutis viam inire volunt, qui eam agnoscere negligunt, qui nolunt intelligere, ut bene agant (a), *qui dixerunt Deo: recede a nobis, & scientiam viarum tuarum nolumus* (b).

Non absimili ratione agendum esse docet S. Carolus cum familiarum rectoribus, qui filios & filias, famulos & ancillas christianæ doctrinæ capita addiscere non curant; si enim sæpius a Parocho vel Confessario moniti id offi-

(a) *Psal. XXXV. 4.*

(b) *Job. XXI. 14.*

officii neglexerint, proroganda ipsis est absolutio, donec sinceræ emendationis argumenta congruo temporis spatio exhibuerint (a).

Quoniam vero sine cognitione divinorum mysteriorum, quorum fides omnino necessaria est ad salutem, fieri non potest, ut quis per sacramentum Pœnitentiæ justificationis gratiam assequatur, liquet profecto inutiles atque inanes esse eorum confessiones, qui hujusmodi mysteria ignorant. Quapropter quum satis edocti fuerint, curandum est, ut generali peccatorum suorum confessione præteritas, si quas fecerint, exomologeses instaurent. Eadem autem cautione ac diligentia eorum saluti consulendum est, qui Dei & Ecclesiæ præcepta, & communia christiani hominis, vel peculiaris sui status munerisque officia perdiscere noluerunt, aut per ignaviam neglexerunt; nullo enim loco habendæ sunt eorum confessiones, qui lacrymabili hoc culpabilis ignorantiae vitio longe foecundissimo laborarunt.

Quæ hæcenus diximus de cautione, & circumspeditione in dispensatione sacramentalis absolutionis omnino adhibenda, quamquam evangelicæ doctrinæ, sanctorum Ecclesiæ Patrum, & Doctorum præceptionibus, summorum Pontificum, & Conciliorum decretis, tum etiam Ritualis Romani regulis omnino cohæreant, & Sacramenti ipsius dignitati, animarumque saluti quam maxime consentaneæ sint, dura tamen, & in praxi periculosa, & noxia aliquibus videntur. Ajunt enim: si iis omnibus deneganda, aut protrahenda sit absolutio, quorum poenitentia ob causas superius memoratas falsa omnino, aut valde suspecta habetur,

L 3

pe-

(a) S. Carol. Monita ad Confess.

Periculum est, ne plurimi ex iis, qui sine absolutione dimittuntur, indignatione commoti, vel desperatione percussi æternæ salutis curam abjiciant, nec amplius ad sacramentum Poenitentiae accedant. Timendum quoque, ne severioris judicii formidine confessionem sacramentalem veluti animarum carnificinam fideles averfentur, & confessarios in suis sedibus otiosos relinquant. Præstat igitur peccatores ad poenitentiam validioribus cohortationibus excitare, & sacramentalem absolutionem ipsis elargiri, modo se contritos esse testentur, & sincere vel in novitate vitæ ambulare.

Sed futilia omnino sunt hujusmodi objecta, & nullo negotio diluuntur. Certe si Confessarius cum poenitente ad suos pedes provoluto asperius agat, si eum duriter increpet, & durius etiam a se repellat, abibit ille perterritus, aut indignatus, nunquam rediturus. Sed non ita plane cum peccatoribus se gessit Dominus Salvator noster; tanta enim benignitate, & clementia peccatores excipere consuevit, tam humaniter, & familiariter cum illis agere, ut hoc ipsum illi succenserent rigidi Pharisei, & superbi legis Doctores. Idcirco bonus Christi minister blande, & comiter confitentem peccatorem suscipit; tenerrimo commiserationis affectu eum complectitur, mortifera ejus vulnera detegit, eumque hortatur, ut serio consideret, quanta, & quam horrenda mala sibi consciverit peccando; pessimam, & funestissimam, quæ peccatoribus imminet, mortem; tremendum Dei judicium, ejusque æternam maledictionem; acerbissimos, & nunquam finituros in inferis cruciatus; sævissimos etiam per hanc vitam conscientiae morsus, & justissimos

mos futurorum timores; cum contra timentibus Deum nihil sit in hac vita, vel in futura metuendum, & inter hujus sæculi ærumnas maximo ipsis solatio sit testimonium bonæ conscientiae, & spes æternæ retributionis, quæ ipsos in coelis manet.

Si autem sacerdos prudenti judicio existimat haud satis sinceram esse confitentis poenitentiam, nec satis firmum veræ emendationis propositum, quod facile ex ipsius confessione, & antea actæ vitæ ratione colligere potest, non sine moeroris significatione ei denunciat haudquam sibi licere absolutionis gratiam ipsi impertiri, quandoquidem non est in Ecclesia potestas eos absolvendi, qui vere poenitentes non sunt, nec ipse Summus Pontifex hac pollet auctoritate.

Si vero quispiam ex his nomine tenus poenitentibus conqueratur dicens: hæc ipsa peccata apud alios confessarios centies in confessione aperui, nec unquam sine absolutione dimissus sum; reponit prudens Christi minister: atqui ex hoc ipso videre potes, fili mi, quam inanes, & infructuosæ fuerint confessiones, quas nulla vitæ emendatio subsecuta est; quam merito propterea censendæ sint destitutæ vera poenitentia. Subinde vero peramanter, enixeque eum obsecrat, ut orationi, æternarum rerum meditationi, aliisque christianæ pietatis & misericordiæ operibus sedulo insistat; ejus animum in spem veniæ erigit, & certum tempus ad redeundum ipsi constituit eadem charitatis effusione ipsum excepturus.

Ita plane illecti peccatores, & bono Christi ministro, veluti parenti suo spirituali, quadam necessitudine devincti, ad ipsum confidenter redeunt,

deunt, ut tandem veræ poenitentiae argumenta exhibentes reconciliationis sacramentum accipiant; & qui antea vix semel in annum, redeunte nimirum Paschali tempore, peccata sua apud sacerdotem confitebantur, emendati potest, & ad bonam frugem perducti, quovis mense, vel quavis hebdomada exomologesim faciunt. Non tam multæ profecto erunt inanes, aut sacrilegæ confessiones, sed multo plures fructuosæ, & salutares, nec otiosi in suis sedibus manebunt confessarii; nunquam enim deerunt veri poenitentes, qui pro salute animarum suarum eorum ministerium requirant.

Hæc porro agendi ratio servanda omnino est cum peccatoribus vitiis corruptis, & funestissima peccandi consuetudine irretitis; nec sane sufficit validis cohortationibus ad poenitentiam eos excitare, & lacrymas, suspiria, gemitus, & largas emendationis pollicitationes ab ipsis elicere, ut statim digni habeantur, qui sacramentali donentur absolutione.

Equidem Petrus, accepto Spiritu Sancto, e coenaculo prodiens unico ad populum sermone tria millia hominum ad Christum convertit (a), omnesque Apostoli ubique terrarum innumeros alios prædicationis verbo ad poenitentiam adduxerunt, qui statim Baptismi aquis regenerati, & per impositionem manuum Spiritu Sancto repleti fortissimi evadebant christiani, invictoquo animo inter sævissima tormenta, & supplicia Christum confitebantur. Sed hæc fuerunt divinæ gratiæ miracula, & multo quidem grandiora ceteris signis, atque portentis, quibus Deus voluit Ecclesiam suam in terris constabilire. Elapso autem Apostolorum ævo raro

ad.

(a) *Act. II.*

admodum apparuerunt prodigia hæc subitæ conversionis. In exordio enim christiana religio, ut nova plantatio, erat miraculis irriganda, ut animadvertit Magnus Gregorius; quum autem profundas radices egit & in imensum crevit, irrigatio cessavit.

Idcirco Ecclesiæ Spiritus Sancti lumine collustrata decrevit, ut qui ex infidelitate ad christianam religionem convertebantur, non antea Baptismi aquis abluerentur, quam tres catechumenorum gradus emensi fidem suam duorum, vel trium annorum spatio probassent. Qui autem post Baptismum lapsi essent, non donarentur pace, seu absolutione, nisi multo longiori tempore poenitentiae suæ sinceritatem testatam fecissent. Non igitur putandum est brevi sermone peccatorem adduci posse ad veram conversionem, vitæque novitatem, ad quam ut loquitur Tridentinum Concilium, non pervenitur, nisi *magnis fletibus, & laboribus* (a); nec fidendum momentaneis fletibus, & suspiriis, quæ, ut repentina quædam aeris meteo-
ra, cito transeunt, atque evanescunt, nisi alia suppetant veræ poenitentiae signa, atque indicia.

Alia quoque adversus solidam doctrinam toto hoc capite expositam objectari solent incommoda, absurda, ac pericula, quæ ex denegata absolutione aliquando oriri possunt. Sed nulla fingi potest justa causa, cur Christi minister sacramenti sanctitatem violet, & facultate sibi tradita abutatur, ei, quem indignum novit, absolutionem impertiendo. Dominus noster Jesus Christus sacramentorum omnium institutor certant, & propriam cuique sacra-
mento

(a) *Conc. Trid. Sess. XIV. C. II.*

mento materiam constituit, quæ a nobis præmitti, aut variari non potest citra grande sacrilegii piaculum; quapropter in Baptismate infantis, quaecumque sit ejus vitæ periculum, non licet adhibere vinum, vel alterius generis liquorem præter aquam, nec unquam licet sacram operari in aqua tantum, vel pane hordeaceo. Quum igitur ad sacramenti Poenitentiae materiam contritio necessario pertineat, ut docet Tridentinum Concilium, sacrilegii reus efficitur sacerdos, si illud administret, cum prudenti judicio existimare non potest veram adesse contritionem. Jam vero, quum sacrilegium per se, atque ex genere suo actio prava sit, legique naturali adversetur, nunquam illud perpetrare licet, sicuti nefas est semper, mendacio uti, aut perjurio, tametsi de propria, vel alterius, vel totius humani generis fama, salute, ac vita ageretur. Nunquam igitur licet sacramentum administrare, quum deesse creditur contritio, vel ne desit prudenter timetur, proptereaquod sufficientia ejus indicia desiderantur. Si quid autem mali timendum sit, ut confidentis ignominia, vel aliorum offensio, facile averti poterit prudenti aliquo consilio, quod ingeniosa sacerdotis charitas suppeditabit.

Ab hac certa, atque inconcussa regula excipitur casus ingruentis mortis, ut si quis mori proximus dubia tantum, atque incerta exhibeat contritionis indicia; tunc enim potest, ac debet sacerdos sacramentalem absolutionem ipsi impertiri, quum animarum saluti per incerta ac dubia remedia consulendum sit, si certa non suppetant; nam charitas religioni præferenda est, quotiescumque utriusque virtutis officiis satisfieri nequit. Nec ulla tunc infertur injuria

ria divini Institutoris majestati; quum enim Christus Dominus in hominum salutem sacramentum Poenitentiae instituerit, vult sane, ut periclitanti morientis hominis saluti magis prospiciatur, quam dignitati, & sanctitati ipsius sacramenti. Quod quidem locum habet duntaxat in sacramentis Baptismi, & Poenitentiae, quae necessaria omnino sunt necessitate, ut ajunt, medii, sive homini nondum regenerato, sive homini post Baptismum lapsio, non autem in aliis sacramentis, in quibus semper nefas est materiam incertam ac dubiam adhibere.

Sic igitur cautos diligentesque in tantae rei administratione nos exhibeamus, ut fideles inveniamur divinatorum mysteriorum dispensatores; nec timeamus eorum querimonias, qui jus sibi ad sacramentalem absolutionem acquisitum putant, simul atque in confessione peccata sua utcumque aperuerunt, eamque in aliud tempus differri ægre ferunt. *Quis enim mortuus, inquit S. Cyprianus, vivificari non properet? Quis non ad salutem suam venire festinet? Sed Præpositorum est præceptum tenere, Et vel properantes, vel ignorantes instruere, ne qui ovium pastores esse debent, lanii fiant. Ea enim concedere, quae in perniciem vertant, decipere est; nec erigitur sic lapsus, sed per Dei offensam magis impellitur ad ruinam (a).*

Profecto qui pii, ac prudentis Sacerdotis absolutionem protrahere volentis judicio acquiescunt, & ejus interea saluberrimis monitis parent, christianae pietatis operibus incumbendo, habent postea, unde latentur, quum se a servitute peccati ereptos, & in libertatem filiorum Dei revocatos senserint. Non ita plane qui ad alios con-

(a) S. Cypr. Ep. X. juxta edit. Paris.

convolant imperitos Sacerdotes, aut plus iusto indulgentes, qui præpropera absolutione venenum pro medicina propinant, ut ait Clerus Romanus ad S. Cyprianum scribens: *Certi sumus quod spatio productioris temporis, impetu isto consenscente, amabunt hoc ipsum, ad fidelem se dilatos esse medicinam, si tamen desint, qui illos arment ad periculum proprium, Et in perversum instruentes pro salutaribus dilationum remediis, exitiosa deposcant illis properata communionis (idest reconciliationis) venena (a).* Huc etiam spectat quod habet Tertullianus de eo, qui se curandum tradidit experientissimo medico, dumque inurit, aut secatur, ingemiscit, & vehementes clamores edit, atque ululatus, postea vero accepta, redditaque salute, ejus peritiam laudat, ejus manus in se non fœvas, sed pias fuisse fateitur, & larga mercede cumulat (b).

Caveamus tamen, ne dum mollem indulgentiam effugere volumus, quæ cupiditatibus blanditur, & vitia fovet, in rigidam severitatem impingamus, quæ peccatores a sacramento reconciliationis avertat, & in desperationem suæ salutis conjiciat. Hæc duo extrema ex æquo vitanda sunt, & missis præconceptis opinionibus, seposito omni partium studio, quod ignorantiam fovet, in errorem inducit, ac sæpe etiam sanctissimæ charitatis vincula abruptit, media inter utrumque via incedendum est, quam nobis monstrarunt sapientissimi Doctores, qui moralis Theologiæ præcepta ante seculum XVI. scriptis illustrarunt, nimirum antequam effrænata opinandi licentia, & sophistica disputandi

ra.

(a) Ep. XXX. Inter opera S. Cypr. ed. Paris. ut sup.

(b) Tertull. de bono martyrii c. V.

ratio in theologicas scholas invehetur, ex qua tam multa prodierunt horrenda opinionum portentosa a Summis Pontificibus Innocent. XI., Alexandro VII., & VIII., tum etiam a Benedicto XIV. damnata, ac profligata. Evolvamus scripta S. Thomæ Aquinatis Theologorum facile Principis, Sancti Bonaventuræ, S. Raymundi de Pennafort, S. Antonini Florentinorum Episcopi, S. Bernardini Senensis, Henrici Cardinalis Hostiensis, Sylvestri a Priorio. Quanta porro in ipsis cernitur doctrinæ soliditas, quanta sententiarum harmonia, atque consensus! Nihil invenire est insolens, atque absurdum; nihil, quod christianæ professionis sanctitati adversetur, nihil, quod stoicam atrocitatem redoleat. Nec mirum, nam solidis semper, & firmis nituntur principiis, & nihil pronunciant, nihil statuunt, quod non ostendant cum Scripturarum oraculis, cum sanctorum Patrum doctrina, cum summorum Pontificum, & Conciliorum decretis, tum etiam cum incorrupta ratione apprimè cohærere. Horum igitur vestigiis insistamus, eamque optimam esse censeamus viam, quam ipsi nobis tritam, & tutam reliquerunt.



A P P E N D I X .

*De visitatione & spirituali cura
Infirmorum.*

Sollicita ægrotantium cura pars quidem est haud sane postrema pastoralis muneris atque officii, sed aliis quoque Sacerdotibus demandata est, atque iis potissimum, qui facultatem audiendi fidelium confessiones a Præsule suo acceperunt; oportet enim ut in juvandis infirmis vicariam operam suam præstent Parochis, qui sæpe gravissimis aliis distenti curis, vel multis suæ plebis infirmis plus nimio gravati nequeunt omnibus præsto esse.

Ut autem salutares sint infirmis hujusmodi visitationes, Sacerdos ad ægrum invisendum accersitus, si tempus suppetit, ad orationem confugiat, & divinam operam enixe imploret, qua communitus ad pios affectus infirmum excitare valeat, eumque adducere, ut animæ suæ salutem pro virili parte propiciat. Rem quoque apprimè utilem faciet, ut monet S. Carolus, si de ægri (sibi ignoti) statu genereque morbi, adversaque valetudine perquirat; ejus item mores, vitam, actiones, negotiaque: ut sciat salubria dare consilia, opportunaque adhibere remedia, omni que sancta consolatione juvare (a). Tum ad ipsum accedens blande leniterque alloquatur, horteturque ut omnem spem suam in Deo ponat, & sibi persuasum habeat corporis ægrotudines paternas esse visitationes, quibus misericors Deus noster, & amantissimus Pater ad
emen.

(a) S. Carol. Act. Parte IV. de Visit. & cura Infirm.

emendandam præteritæ vitæ rationem, vel in via christianæ virtutis alacrius progrediendum nos provocat.

Propinquis deinde & familiaribus secedere jussis, cum infirmo agat de æternæ salutis negotio, eumque peramanter hortetur, ut per sacramentum Poenitentiae reconcilietur Deo; sic enim corporis salutem a Deo facilius impetrabit, vel certe levissime perferet infirmitatis incommoda christiana acquiescentia Divinæ voluntati, atque æternæ mercedis spe mirifice recreatus. Nec saluberrimas hac de re Ecclesiæ leges commemorare prætermittat, nempe decreta Œcumenici Concilii Lateranensis IV., & S. Pii V., aliorumque Pontificum Constitutiones, quibus cavetur, *ne medici ultra tertiam vicem ægrotos visitent, nisi prius ipsis certo constet illos Confessionis Sacramento rite expiatis fuisse* (a). Ægri deinde confessionem audiat, etiam si velit totius vitæ peccata in confessione aperire (quod quidem ut faciat magnopere hortandus est), eumque benigne adjuvet, ut recogitare valeat omnes annos suos in amaritudine animæ suæ.

Levis poenitentia imponenda est infirmo, neque enim gravem & laboriosam ferre posset, sed pro peccatorum gravitate & numero congruam aliam poenitentiam indicere oportet ab ipso implendam, si convaluerit (b). Si vero æger periculose decumbat, *rationes poenitentiae justæ eliget* (Sacerdos), inquit S. Carolus, *quæ possint præstari a jacente, veluti magnam elemosynam pro facultatum modo; suadebit etiam, ut morbi*

(a) *Ritual. Roman. De Visitation. & cura infirmorum.*

(b) *Rit. Rom. de Sacram. Pœn. in fine.*

morbi afflictiones pœnitentiæ loco libenter accipiat, Dominoque pro peccatis suis offerat (a).

Post hæc infirmum non deserat, sed frequenter inviset. Si autem ingravescat morbus, eum moneat, ut ne dæmonis astu, ut loquitur S. Carolus, neque medicorum pollicitationibus, nec propinquorum, aut amicorum, domesticorumve blandis cohortationibus se ullo modo decipi sinat, quominus in ea, quæ sibi salutaria sunt, incumbat (b); nempe ut qua par est sollicitudine sancta Sacramenta, dum sana mente est, integrisque sensibus, religiose suscipiat citra fallacem illam & perniciosam procrastinationem, quæ plurimos ad æterna supplicia perducit (c). Si vero æger se difficilem præbeat, vel id præstare omnino renuat; ejus rei causam prudens Sacerdos perquirat, aptisque rationibus, & cohortationibus ejus animum flectere studeat, tum suis aliorumque precibus validiora divinæ gratiæ auxilia ipsi imploret.

Curet etiam ut, si ab infirmo condendum sit testamentum, id mature faciat, antequam rationis, sensuumque viribus destituatur, alioquin ejus testamentum postrema quidem ipsius voluntas appellabitur, non tamen suæ voluntati, sed potius solerti aliorum cupiditati respondebit. Eam insuper moneat ut, dum disponit domui suæ, animæ quoque suæ saluti prospiciat, præcipue vero ut res alienas, aut male partas, si quas habet, restituat, illata damna sarciat, justitiæ simul, charitatisque legibus satisfaciat, vel certe, si tempus non suppetat, a suis hæredibus id fieri mandet. In hoc autem offi-

(a) S. Carol. de Visît. & cura infr. cap. de conf.

(b) Ibi. Cap. Cohortat., & monita ad agratum.

(c) Rit. Rom. De Visît. &c.

officii munere obeundo omnis avaritiæ nota fugiatur (a), quam quidem sibi ipsi inureret Christi Minister, si blandis suasionibus hæreditates, aut donationes pro se, aut suis a morientibus aucuparetur. Huic malo occurrere voluit Valentinianus Augustus per legem insertam Theodosiano Codici (b), qua cavetur, ne virgines Deo sacras, vel senes, anusque infirmas sine liberis decedentes clerici, aut monachi decipiant, ut hæreditates ac donationes furentur, quæ propinquis potius relinquendæ essent. Meminit hujus legis S. Ambrosius Epist. XVIII. ad Valentinianum juniorem his verbis: *Nobis privata successionis emolumenta recentibus Legibus denegantur: Et nemo conquiretur*. Ejus quoque meminit S. Hieronymus agens de vita Clericorum & Sacerdotum; nec legem ipsam improbant sancti isti Ecclesiæ Patres & Doctores, sed eorum avaritiam deplo rant ac detestantur, qui ejus ferendæ ac promulgandæ occasionem non sine ingenti Ecclesiastici ordinis probro exhibuerunt.

Si autem infirmus liberos suos, aut propinquos pauperes fraudare velit hæreditate, ut ex bonis suis Ecclesiam ditet, eum a proposito dimoveat illud Augustini usurpans: *Quicumque vult, exheredato filio, heredem facere Ecclesiam, quærat alterum, non Augustinum, immo Deo propitio neminem inveniet* (c). Si vero condere velit sacerdotium, aut beneficium ecclesiasticum jure patronatus familiæ suæ, ab eaque descendentibus reservato, ejus voluntati fortiter obsistat, nam qui id faciunt, nihil sibi laudis

M

ac

(a) *Ritual. Rom. ibid.*

(b) *Cod. Theod. lib. XVI. tit. III.*

(c) *S. August. Serm. XXXV. alias XL. de diversis cap. IV.*

ac meriti apud Deum comparant, neque enim Dei gloriæ, & Ecclesiæ utilitati consulere volunt, sed suorum commodis, curando ut ea bona, in quibus beneficium constitutum est, distrahi non possint, sed perpetuo apud eos maneant. Et hæc porro beneficia vera Ecclesiæ calamitas appellari possunt, nam innumeras lites parere solent, & in Ecclesia ipsa ineptos & vitiis corruptos ministros multiplicant, qui in destructionem potius, quam in ædificationem assumpti videntur.

Peculiari studio subveniendum est infirmis pauperibus, qui rerum omnium inopia & morbi acerbitate miserabilem in modum afflicti, curationem difficillimam experiuntur, quorum vice commotus Christi minister aliquid, si potest, erogabit de suo, tum eleemosynas sive a piis locis, sive a ditioribus conquiret ad eorum inopiam sublevandam, nec prætermittet vicinos rogare, ut sollicitam eis curam impendant. His autem paternæ charitatis officiis dejectus infirmi animus erigetur, & Sacerdotis, quem ita benevolum & providum experitur, hortamenta & monita libentius excipiet, eisque promptius obtemperabit.

Ingruente jam morte vehementioribus tentationibus decumbentem aggreditur diabolus sciens quia modicum nocendi tempus habet, oportetque propterea, ut adversus tela nequissimi ignea armatura Dei muniatur, lorica scilicet justitiæ, & scuto fidei, & galea salutis, & gladio spiritus, ut loquitur Apostolus (a). Sacerdos igitur periclitantem non deserat, sed pios affectus in ejus animo cingere nitatur; fidei potissimum, spei, perfectæ charitatis, & contri-

(a) *Ephes. VI.*

tritionis, tum etiam christianæ patientiæ, & acquiescentiæ divinæ voluntati. Ita plane a natura comparatus est homo, ut dolores, cruciatus, & mortem vehementer aversetur, ac refugiat. Moneatur ergo infirmus, ut ob naturales hujusmodi reluctantis carnis motus non perturbetur, nec animum despondeat, quandiu spiritus divinæ voluntati cohæret, eique subjicitur. Dominus Jesus Christus, qui propter nostram salutem cum natura nostra ejus quoque infirmitates assumere dignatus est, internam hanc luctam persentire voluit, dum Patrem oraret in horto Getsemani, de eaque certiores nos fieri voluit per Evangelistas suos in solatium fervorum suorum, qui talia patiuntur. Crudelis & ignominiosæ mortis horrore perculsus sic Patrem oravit: *Pater mi, si possibile est, transeat a me calix iste, veruntamen non sicut ego volo, sed sicut tu* (a). Petat ergo infirmus, si placet, leniri dolores suos, arceri mortem, integram sibi salutem restitui, dum statim addat: *Veruntamen non mea voluntas, sed tua fiat* (b).

Curandum quoque, ut æger per intervalla mentem suam, & cor ad Deum elevet brevi aliqua prece his, aliisque Scripturarum verbis concepta: *Deus propitius esto mihi peccatori... Domine, si vis, potes me mundare.... Deus, in adjutorium meum intende: Domine, ad adjuvandum me festina... Sana animam meam, quia peccavi tibi... Adjutor meus esto, ne derelinquas me, neque despicias me Deus salutaris meus... Tuus sum ego, salvum me fac... Operi manuum tuarum porriges dexteram.... In te, Domine, speravi, non confundar in æternum... In manus*
M 2 *tuas,*

(a) Matth. XXVI. 39. (b) Luc. XXII. 42.

tuas, Domine, commendo spiritum meum. Jue-
rit etiam dulcissimum Jesu Nomen frequen-
ter invocare, ejusque acerbissimam passionem
& mortem ex Evangelio commemorare. Hæc
autem identidem suggerenda sunt, non elata
& sonora voce, quæ morientis aures molestif-
sime obtundit, sed humili ac remissa, nam
auditus organa, quo magis vi morbi langue-
scunt, eo facilius quolibet vel tenui aeris vibra-
tione commoventur. Nec sane multis sermo-
nibus opus est, quibus prostrata ejus mens
obruatur, sed multa & fervida ad Deum pre-
ce, qua in extremo illo agone periculi pleno
validiora divinæ gratiæ auxilia ipsi imploren-
tur. Oret ergo Sacerdos cum adstantibus, tum
etiam populum sacri æris sonitu ad orandum
invitari curet, ut multorum apud Deum pre-
cibus morienti subveniat.

Si forte quispiam repentina vi morbi, vel
lethali vulnere, vel alio quovis inopinato casu
in proximum mortis periculum conjiciatur,
quum primum id noverit Sacerdos, celerrime
accurrat, eique opituletur in extrema illa vitæ
periodo, a qua pendet æternitas; nam *si ce-
ciderit lignum ad Austrum, aut ad Aquilonem,
in quocumque loco ceciderit, ibi erit* (a). In eo
autem vitæ discrimine, si desit confessarius ap-
probatus, quilibet Sacerdos, tametsi nulla pol-
leat sive ordinaria, sive delegata jurisdictione,
periclitantis confessionem excipere potest ac de-
bet, & salutarem absolutionem, si sufficientia
exhibeat poenitentiae signa, ipsi impertiri a
quibusvis criminibus ac censuris summorum Sa-
cerdotum, vel ipsius Sanctæ Sedis judicio re-
servatis; nulla enim reservatio locum habet
in

(a) *Eccles. XI. 3.*

in mortis articulo, ut docet Tridentina Synodus his verbis: *Pie admodum, ne hac ipsa occasione aliquis pereat, in eadem Ecclesia Dei custoditum semper fuit, ut nulla sit reservatio in articulo mortis; atque ideo omnes Sacerdotes quilibet pœnitentes a quibuscumque peccatis, & censuris absolvere possunt (a).* Verum qui in illis temporis angustiis a censuris reservatis absolvi-
tur, monendus est, ut juxta Ritualis Romani præscriptum, si periculum evaserit, Superiori, a quo alias esset absolvendus, quum primum poterit se sistat, quicquid debet, præstaturus (b); si enim id negligeret, in easdem censuras rursus incideret, ut sancitum est cap. *Eos qui de Sent. excom. in Sexto* his verbis: *Si cessante postea periculo, vel impedimento hujusmodi, se illi, a quo, his cessantibus, absolvi debebant, quam cito commode poterunt, contempserint præsentare, mandatum ipsius super illis, pro quibus excommunicati fuerant, humiliter accepturi & satisfacturi, prout justitia suadebit; decernimus, ne sic censura illudant Ecclesiastica, in eandem sententiam recidere ipso jure.*

Meminerint vero Sacerdotes per saluberrimam Constitutionem a Benedicto XIV. P. M. editam Kal. Junii 1741., cujus initium est: *Sacramentum Pœnitentiæ, districte prohiberi, ne quis extra casum extremae necessitatis, nimirum in ipsius mortis articulo, & deficiente tunc quocumque alio Sacerdote, etiam simplici, sive non approbato, qui Confessarii munus obire possit, confessionem sacramentalem complicitis, seu participis in peccato turpi atque inhonesto contra sextum Decalogi præceptum commissio excipere audeat;*
tuna

(a) Conc. Trid. Sess. XIV. cap. VII.

(b) Rit. Rom. de Sacram. Pœnit

tum in Sacerdotem, qui *secus facere ausus fuerit*, inflictam esse *majoris excommunicationis pœnam*, a qua, nisi Summi Pontificis autoritate, absolvi non possit. Sic porro sapientissimus Pontifex plectendum duxit Sacerdotem, qui suæ impudicitiae participi in extrema vitæ periodo sacramentum Poenitentiae temere administret; noluit tamen in eo rerum statu necessariam jurisdictionis potestatem ipsi subtrahere, ne reconciliationis beneficio moriens frustretur, ut fuse exposuit in alia Constitutione edita die 8. febr. an. 1745., quæ ab his verbis incipit: *Apostolici muneris*. Plura alia videre est in hac ipsâ Constitutione notatu digna; confidimus autem in Domino ex venerabili nostræ Diœcesis Clero neminem unquam futurum esse iis pœnis obnoxium, quibus communis sunt memoratæ Constitutiones.

Curandum quidem quam maxime est, ut integra peccatorum confessio a moribundis eliciatur cum perfecta cordis contritione conjuncta; verum si quis vi morbi oppressus inchoatam confessionem perficere non valeat, vel si loquelæ usum ante Sacerdotis adventum amiserit, signa tamen doloris & poenitentiae coram eo exhibeat, vel saltem adstantes fidem faciant ejusmodi signa eum edidisse, aut sacramentalis confessionis desiderium significasse, absolutione donandus erit, ut docet Rituale Romanum his verbis: *Quod si inter confitendum, vel etiam antequam incipiat confiteri, vox & loquela ægrum deficiat, nutibus & signis conetur, quoad ejus fieri poterit, peccata pœnitentis cognoscere, quibus utcumque vel in genere, vel in specie cognitis, vel etiam si confitendi desiderium, sive per se, sive per alios ostenderit,*
ab-

absolvendus est. Quæ quidem cohærent cum antiqua Ecclesiæ praxi, ut liquet ex Concilio Carthaginensi IV. Can. 76., ex Arausicano I. Can. 12., & ex Epistola Sancti Leonis Papæ relata in Can. Multiplex de poenitentia distin. I., ubi legimus: Quod si ægritudine aliqua ita fuerint aggravati, ut quod paulo ante poscebant, sub præsentia Sacerdotis significare non valeant, testimonia eis fidelium circumstantium prodesse debebunt, ut simul & poenitentia, & reconciliationis beneficium consequantur.

Quinimmo dubia quoque poenitentia signa, aut probabili judicio præsumpta, veluti si quis christianam vitam duxerit, & Sacramenta frequenter suscipere consueverit, & post peccatum poenitentia agendæ tempus habuerit, complures non infimæ notæ doctores sufficere existimant, ut prudens Sacerdos sacramentalem absolutionem sub conditione impertiat. Præstat enim, inquiunt, anceps adhibere remedium, quam nullum; & in extremo agone periclitanti dubia ope subveniendum est, si certa afferri nequeat. Nos quidem in hac re nihil certi statui posse putamus, donec ab Ecclesia quicquam definitum fuerit. Omnes autem Sacerdotes rogamus, atque obsecramus in Domino, ut in juvandis infirmis & morti proximis operam suam strenue naviterque impendant; sic enim fideles invenientur dispensatores mysteriorum Dei in salutem animarum, & veniet super eos benedictio perituri (a).

AD

(a) Job. XXIX. 13.

A D S A C E R D O T E S

C O H O R T A T I O.

PRæcipuas sacerdotalis officii partes in administratione sacramenti Poenitentiae breviter expendimus, venerabiles Christi Ministri. Superest nunc, ut charitatem vestram ad sedulam atque assiduam tanti mysteriorum dispensationem excitemus, qua nihil est in Ecclesia utilius, atque præstantius ad componendos fidelium mores, ad christianam pietatem fovendam, ad peccatores in viam salutis, & vitae revocandos.

Plurimum quidem valet ad hunc finem assequendum divini verbi prædicatio. Verum quid agimus, quum in frequenti concione sermonem habemus ad populum? Semen verbi Dei in terram projicimus, ut loquitur divinus Præceptor (a). Pars autem hujus seminis fecus viam cadit, & transeuntium pedibus conculcatur, vel ab avibus coeli rapitur; pars supra petram, & quum germinare coeperit, radices non figit, sed arescit; pars inter spinas, & simul atque naturam assurgit, ab ipsis suffocatur; reliqua autem pars decidit in terram bonam, nempe in corda non diabolicis incurfionibus aperta, ac pervia, non dura, atque arida, non terrenis curis, sollicitudinibus, ac voluptatibus occupata, sed bene præparata, ac subacta, velut in terram humentem, & mollitam, ad Dei verbum ita recipiendum, ac retinendum, ut firmas radices agat, & fructum afferat centesimum, sexagesimum, vel saltem trigessimum. Contra verò quum sacramentalis poenitentiae

mi-

(a) *Luc. VIII.*

ministerium gerimus, non in incertum semen divini verbi spargimus, sed in confitentium corda salutaria monita, & paterna hortamenta inserimus, & quasi plantando defigimus; nec sane isti cogitant, cui aptius nostra hæc verba quadrent, ut sæpe faciunt, qui conciones audiunt, quum probe sciant sibi tantum dicta esse; & sibi videantur Deum ipsum se alloquentem audire, vel certe virum Dei sibi dicentem: *Tu es ille vir* (a).

Accedit quod ad concionem plerumque itur sine peculiari animi præparatione; non ita vero ad Sacramentum Poenitentiae suscipiendum; nam & illi ipsi, qui omnem peccandi voluntatem ab animo non expulerunt, aliqua tamen oratione spiritum veræ poenitentiae a Deo implorarunt, aliquod imperfectum, & inchoatum boni desiderium afferunt, fervidisque propterea exhortationibus adduci possunt, ut toto corde ad Deum convertantur, suæque conversionis haud dubia argumenta exhibentes digni evadant, qui sacramentalis absolutionis gratia donentur.

Plures quoque utilitates ex boni Sacerdotis charitate, & solertia percipiunt confitentes: nimirum amoliendis animi morbis, & vitiis apta remedia; adversus diaboli tentationes valida munimenta, ac præsidia; in rebus dubiis certa consilia; in ærumnis solatium; in moeroribus consolationem; in conscientiae anxietatibus, ac scrupulis securitatem, & tranquillitatem. Id quoque emolumentum oritur ex ipsa confessionis necessitate, ut notat Catechismus Romanus, nempe quod confitendi verecundia delinquendi cupiditati, & licentiae tanquam frænos injicit,

N

& ini-

(a) II. Reg. XII. 7.

& improbitatem coercet (a). Facit enim, ut homines caveant, non modo ab externis, & manifestis peccatis, quæ in aliorum oculos incurrunt, verum etiam ab internis, atque occultis, quæ viam sternunt ad quævis scelera, ac flagitia.

Quanta autem consolatione, ac lætitia perfunditur poenitens, qui sacerdotali potestate absolutus dimittitur! Quum enim cor nostrum sit nobis ipsis imperscrutabile, de sua quisque intima poenitentia incertus pender, dubius, atque anxius, & quamquam sibi videatur sincere, atque ex animo poenitens, haud satis suo acquiescit iudicio, sed audita voce Sacerdotis peccata sua legitime condonantis, ob fidem, quæ Sacramenti virtuti habenda est, in fiduciam suæ reconciliationis erigitur, perinde ac si ab ipso Christo Domino sibi dictum esset: *Confide, fili, remittuntur tibi peccata tua* (b). Hinc vero fit, ut hilari animo in via iustitiæ alacriter progrediatur, & dicere possit cum Regio Psalter: *Viam mandatorum tuorum cucurri, quum dilatasti cor meum* (c).

Nec tantum in Christi plebem, sed & in ipsos Sacerdotes ex sacrosancto hoc ministerio insignia quædam, & præclara profluunt emolumenta. Certe sacerdotalis dignitas nos compellit, ut quoniam tanto supra omnem populum erecti sumus intervallo, vitæ quoque sanctimonia, & virtutum omnium exemplis præfulgeamus; eo vel maxime quod si tantisper ab officio deflectimus, omnium oculi in nos convertuntur, quemadmodum & in solem omnes respiciunt, quum deficit, ejusque defectionem,

am.

(a) Cat. Rom. de Sac. Pœn. p. II. c. v. n. 37.

(b) Matth. IX. 2. (c) Ps. CXVIII. 32.

amplitudinem, ac periodum accurate metiuntur. Quid vero, si Sacerdos, qui confessiones fidelium excipit, vitam ageret reprehensione dignam; si illis animi morbis, quorum curationem suscipere audet, vel fortasse etiam gravioribus ipse laboraret, & vitam carnalem duceret, dum videri vult spiritualis vitæ magister? An non publicæ exprobrationi, atque execrationi se se objiceret? An non improborum hominum irrisiones, & ludibria in se provocaret? Ipsa ergo officii, quo fungimur, præcellentia, & sanctitas ad vitam pie, sancteque instituendam nos cogit.

Adde sis, quod multa ad id præsidia, atque adjumenta nobis suppeditat; quandoquidem ab otiositate nos avocet, quæ vitiorum omnium mater est, ac magistra; a seculi curis, ac negociis, a sensuum voluptatibus, a mundi oblectamentis nos separat, ac bonis semper operibus intentos detinet, si, uti par est, orationi, ac rerum æternarum meditationi insistamus; si optima de morum doctrina commentaria evolvamus; si libros etiam asceticos perlegamus; neque enim aliter tam multa, quæ in confessionibus fidelium occurrunt, implexa, ac dubia evolvere, ac dirimere possumus, vel in promptu habere salutaria monita, & pie sancteque vivendi præcepta poenitentium animis inferenda.

Quid quod in iis ipsis, qui in medio Babylonis habitant, nempe inter hujus seculi tumultus, & corruptelas versantur, complures ad nos accedunt puræ, atque intemeratæ conscientiæ, qui carnem suam crucifigunt cum vitiis, & concupiscentiis, qui humiles corde sunt inter honores; qui pauperes spiritu inter

vitias, & in omnibus misericordiæ operibus, quam maxime assidui; qui rerum omnium inopiam, dolores, morbos, molestias, injurias solaspe freti æternorum bonorum patientissime ferunt? Hi quidem nos pudore, & verecundia suffundunt, docentque exemplo suo, quales nos esse oporteat, qui ministri Christi sumus, & dispensatores mysteriorum Dei.

Quin etiam ex eorum confessionibus, qui ingenti peccatorum pondere gravati sunt, plura discimus nobis ipsis quam maxime profutura. Discimus enim, quanta sit naturæ nostræ corruptio, atque in malum proclivitas, quam facili, & quam præcipiti lapsu in profundum vitiorum barathrum ruamus; tum etiam quam arduum, & laboriosum opus sit illinc evadere, & superas in auras remeare. Discimus quam immenso intervallo a recto salutis tramite progrediendo recedamus, si ab eo tantisper defleamus, & quam difficile sit eo redire, unde discessum est. Discimus excelsas quoque cedros Libani flante vehementi tentationis vento corruisse; hinc vero intelligimus, quanto opere oporteat, ut vigilemus in orationibus, ut sensus nostros caute custodiamus; ut cupiditates nostras assidua christianæ mortificationis exercitatione coerceamus; ut pravis animi motibus, simul atque excitantur, fortiter obsistamus; ut nobis ipsis diffidentes cum timore, & tremore salutem nostram operemur.

Tum denique illud emolumentum ex fidelium confessionibus percipimus, quod facile intelligimus, quænam vitia in populo nobis credito vigeant, quæ sint eorum causæ, nempe si a pravis tantum animi cupiditatibus, vel etiam ab aliqua exteriori illecebra, ab aliqua morum cor-

corruptela in populum invec̃ta proficiscantur. Sic vero dominici gregis conditio agnoscitur, ac pervideri potest, qua potissimum ratione ejus incolumirati, ac saluti prospiciendum sit, quo spectat illud Spiritus Sancti monitum: *Diligenter agnosce vultum pecoris tui, tuosque greges considera* (a).

Porro sacrosancti hujus mysterii, ex quo tam multa in Ecclesiam universam profluunt bona, vobis singulis credita est dispensatio, Venerabiles Sacerdotes, per impositionem manuum nostrarum, & per ea verba: *Accipe Spiritum Sanctum, quorum remisseris peccata, remittuntur eis, & quorum retinueris, retenta sunt* (b). Huic potestati, quæ cum ipso Sacerdotii Ordine ex Christi institutione conjuncta est, ideoque *potestas ordinis* dicitur, altera accedat oportet, quæ jurisdictionis potestas appellari solet, & hanc etiam cuique Sacerdoti, qui se ad tanti ministerii opus idoneum probaverit, libentissime Episcopus impertitur. Quam multi vero ex Sacerdotibus hac potestate dignos se exhibere negligunt; quam multi etiam potestatem quidem ipsam accipiunt, sed ejus usum effugiant, nec adduci possunt, ut fidelium confessiones excipiant! O lacrymabilem ignaviam! O periculosum muneris, officiique neglectum!

Apostolus Paulus, qui prædicandi Evangelii munus a Christo acceperat, testatur se necessitate compellente evangelizare, quandoquidem divinam maledictionem sibi conscisceret, si Evangelii prædicationem missam, ac neglectam faceret. *Si evangelizavero, non est mihi gloria; necessitas enim mihi incumbit: Væ enim mihi est,*

N 3

si non

(a) Prov. XXVII. 23.

(b) Pontif. Rom. de ord. Presb.

si non evangelizavero (a). Idem Apostolus Timotheum monet, ut, quam accepit, sacerdotii gratiam, & potestatem otiosam, & consopitanti manere non patiatur, sed eam excitet, adhibeatque in salutem animarum. *Admoneo te, ut resuscites gratiam Dei, quæ est in te per impositionem manuum mearum* (b). Anne vero putabit Sacerdos impunem se abire posse, si ob desidiam, atque ignaviam traditam sibi potestatem dimittendi peccata otiosam relinquat, nec per eam nitatur mortuas Deo animas ad vitam gratiæ revocare? Cogitate inutilem illum servum, de quo loquitur Dominus apud Matthæum (c). Is creditum sibi a Domino talentum, ut ex eo negotiationem faceret, non in suos usus convertit, non luxu, crapulis, aut libidinibus absumpsit, sed ut tutius illud servaret, & revertenti Domino integrum redderet, in terra alte defossam abdidit, nec conatus est quidpiam lucri ex eo percipere; verumtamen tremendam illam damnationem subiit: *Inutilem servum ejicite in tenebras exteriores* (d).

Videte, quæso, quam multi cujusque ætatis, status, & conditionis fideles, non modo in magnis Ecclesiæ celebritatibus, sed singulis quoque festis, imo vero & profestis diebus ad sedes confessionales confluant exomologesimæ facturi. Quum augeatur in dies christiani populi frequentia ad catecheses, ad evangelicæ doctrinæ explicationem, ad paræneticos sermones, ad pias exercitationes, quæ tam sæpe in parochialibus ecclesiis, aliisque oratoriis instituuntur, auctum quoque iri oportet confitentium

(a) I. Cor. IX. 16. (b) II. Tim. I. 6.

(c) Matth. XXV. 24. & seq. (d) Ib. v. 30.

tium numerum; scilicet divini verbi dispensatio viam sternit ad poenitentiam, & opus veræ conversionis, atque emendationis inchoat, quod divina afflante gratia per ministros Sacramenti Poenitentiae perficitur. Strenui animarum rectores, eorumque vicarii, atque administri, quamquam tam multis pro populo sibi credito distenti sint officiis, & curis, ad multas horas quibuscumque Dominicis & festis diebus fidelium confessiones excipiunt, & pro animarum salute laborant usque ad deliquium. Id quoque faciunt plures alii, qui choro addicti sunt psallentium Domino, qui etiam in exponendis scripturarum oraculis, & practicae Theologiae præceptis, aut in verbo exhortationis, & doctrinae assiduam operam ponunt, nec se propterea de laborioso hoc ministerio exemptos putant. Vestrum igitur est, Sacerdotes, qui ad hoc officii munus assumpti estis, quam potestis, opem ferre fratribus vestris laborum pondere oppressis, ac pene exanimatis. *Unusquisque tenetur uti gratia sibi data, quum fuerit opportunum*, inquit S. Thomas (a). Jam vero ut gratia, qua donati estis, sedulo naviterque utamini, non tam opportunitas postulat, quam necessitas.

Mementote filiorum Gad, & Ruben, qui de suis tantum rebus, & commodis solliciti, dum universus populus trajecturus erat Jordannem ad debellandas gentes, quæ Israelis hæreditatem obtinebant, a Moyse postularunt, ut sibi liceret in regionibus Galaad uberrimis cum innumeris suis ovibus, ac jumentis manere, suamque in ipsis sedem figere. Iniqua hac petitione vehementer commotus optimus Israe-

N 4

lis

(a) S.Th. in IV. Sent. dist. XIII. a 1. & 111.

lis dux, & legislator Moyſes ita eos increpavit: *Nunquid fratres veſtri ibunt ad pugnam, & vos hic ſedebitis?* (a). Tum divinam indignationem iſſis denunciavit, & tremenda illa flagella, quibus Patres eorum ob patrata crimina caſi in deſerto perierunt. His autem ſermonibus percuſſi viri illi promptos ſe, & paratos exhibuerunt ad perferendos omnes belli labores: ad omnia pericula obeunda, ad pugnandum adverſus Iſraelis hoſtes in prima acie, donec, iſſis deletis, hæreditatem ſuam, nempe eorum regiones filii Iſrael poſſiderent. Nos autem iſſi armati, & accincti pergemus ad prælium ante filios Iſrael, donec introducamus eos ad loca ſua Non revertemur in domos noſtras, uſque dum poſſideant filii Iſrael hæreditatem ſuam (b); cujus quidem promiſſi fidem pleniffime eos abſolviſſe ſacræ literæ teſtantur (c). Minaces illæ voces, quibus ſanctus legislator illorum virorum ignaviam exprobravit, vos quoque ad pugnandum excitent, Sacerdotes Domini, ad pugnandum, inquam, *non adverſus carnem, & ſanguinem*, ut loquitur Apoſtolus (d), *ſed adverſus principes, & poteſtates, adverſus mundi rectores tenebrarum harum*, ut ex eorum poteſtate eripiat ſe animas, quæ indignæ ſervitutis jugo premuntur, eaſque perducatis ad æternam hæreditatem.

Moveant quoque animos veſtros tot ruricolæ, qui ſingulis diebus feſtis e locis valde diſſitis ad eccleſiam convenientes tam ſæpe abeunt triſtes, propterea quod deficiente ſacerdotum copia non potuerint peccatorum ſuorum exomologefim facere. Ad oram probaticæ piſci-

(a) Num. XXXII. 6.

(b) Ib. 17. 18.

(c) Joſue XXII. 2. 3.

(d) Eph. VI. 12.

fcinæ jacebat multitudo magna languentium, cæcorum, claudorum, aridorum expectantium aquæ motum (a); in his languidus ille inveterata laborans infirmitate, qui interrogatus a Domino, an vellet sanus fieri, respondit: *hominem non habeo, ut quum turbata fuerit aqua, mittat me in piscinam* (b); idest nihil magis exopto, quam sanitatem: sed neminem habeo, qui meas vires doleat, neminem, qui mihi opem ferat, & mergat me in stagnum, quum in descensu Angeli commovetur aqua. O quam multi inter nos querulas has voces usurpare possunt: *Hominem non habeo!* quandoquidem quum spiritualibus morbis multo gravioribus, & forte etiam inveteratis contabescences ad salutarem piscinam veniunt, nempe ad Sacramentum Pœnitentiæ, neminem inveniunt, a quo juventur, neminem, qui animarum suarum curationem misericorditer suscipiat. Quam multi insuper pietati dediti spiritualem quærunt ducem, a quo in viam spiritualis vitæ tuto dirigantur, ne veluti errantes oves in incertum vagentur non invenientes pascua! Et isti etiam lacrymabiles illas voces congeminant: *hominem non habeo, hominem non habeo!*

Agite ergo, Christi ministri, adeste opem vestram implorantibus; & misericorditer ipsis subvenite. Ne putetis hoc pietatis officium a vobis prætermitti posse, propterea quod nullius Ecclesiæ spirituale regimen geritis, nullis ecclesiasticis bonis donati estis; nec dicatis cum otiosis illis operariis in foro stantibus: *nemo nos conduxit* (c). Conduxit vos Dominus Jesus Christus; quando vero conduxit? Quando sempiterni sui Sacerdotii ministros vos fecit. Qua
au-

(a) Jo. V. 3.

(b) Ib. 7.

(c) Matth. XX. 7.

autem mercede vos conduxit? Ea sane, quæ nulla amplior excogitari potest, nempe illa ipsa mercede, quam Abrahæ pollicitus est, quum dixit: *Ego . . . merces tua magna nimis* (a).

Non ignoramus profecto complures esse Sacerdotes, pios alioqui, & sufficienti doctrina, prudentiaque præditos, qui ab hujus ministerii opere arcentur, non ignavia, & socordia, sed metu. Verentur enim, ne hujus officii partes minus accurate, ac fideliter impleant, dumque aliorum vulnera curare volunt, mortiferum aliquod vulnus sibi ipsis inferant. Utilis sane, ac laudabilis est hujusmodi timor, dum facit, ut nostræ infirmitatis conscii divinam opem enixe imploremus, tum vero etiam sacræ ethices præcepta assidua optimorum librorum lectione, & crebris cum viris doctis consultationibus recolamus. Anne vero probari potest timor, qui nos ab officio removeret? Quid fingi potest magis absonum, atque absurdum, quam ut quis injunctum sibi officii munus deferat, ne aliquando erret in ipso munere obeundo, & graviores, ac certam subire velit culpam, ut levioris, atque incertæ noxæ periculum declinet? Eja quam possumus diligentiam in tanto opere adhibeamus, & fiduciam nostram constituamus in Deo, qui mentes nostras sapientiæ suæ lumine collustrabit. *Siquis autem vestrum* (inquit Jacobus Apostolus) *indiget sapientia, postulet a Deo, qui dat omnibus affluenter, & non improperat, & dabitur ei; postulet autem in fide nihil hæsitans* (b). Si autem, quod nostræ infirmitatis est, in aliquo deficimus, humili corde ab eo petamus veniam, qui *cognovit figmentum nostrum* (c), & lapsus ipsi nos doceant

ma-

(a) Gen. XV. 1. (b) Jac. I. 5. 6. (c) Ps. CII. 14.

magis caute incedere, & divinæ gratiæ auxilia fervidiori prece obtestari.

Alio quoque metu ab hujus ministerii opere plures absterrentur; timent scilicet, ne exceptæ foeminarum confessiones turpes rerum imagines in mente excitent; timent, ne prævios affectus ex corde eliciant; timent, ne spiritalis cum mulieribus, aut puellis necessitudo in carnalem sensim degeneret, quem quidem in scopulum illisi summi quoque viri, teste Augustino, miserrime perierunt. Sed primum quidem hæc pericula facile vitare possunt marium tantummodò confessiones audiendo in iis sedibus, ad quas non confluunt foeminae, quas quidem ut plurimum vacuas esse multi queruntur. Deinde quum ad audiendas mulierum confessiones accesserint, si non temere id faciant, sed officii causa; si rectum sibi finem constituent, nempe divinæ gloriæ, & animarum salutis provehendæ; si Dei opem enixe implorent; si caute vitent inutiles sermones, & ineptas interrogationes, omnemque impudentem, & obscœnam descriptionem prohibeant, non erit certe, cur offendicula, aut miserandos lapsus magnopere pertimescant. Adest nobis Deus, & per Angelos suos nos custodit, & regit, quandiu in viis nostris ambulamus: in viis, inquit Augustinus, non in præcipitiis; in viis nostris, non in viis aliènis; scriptum est enim: *Angelis suis mandavit de te, ut custodiant te in omibus viis tuis. In manibus portabunt te, ne forte offendas ad lapidem pedem tuum* (a). Anne vero deferendos nos esse putabimus, dum ambulamus in viis nostris; nec tantum in viis nostris, verum etiam in viis Domini, nempe in

(a) Ps. XC. 11. 12.

in ministeriis, Deo iubente, susceptis? Petrus Apostolus, iubente Domino, e navi prosiit, irato mari se se commisit, & super commotos fluctus impavidus ambulavit; cumque validiori turbine perterritus coepisset mergi, ad Dominam clamans vivida illa prece: *Domine, salvum me fac* (a), illico ejus dextera comprehensus, atque erectus periculum evasit. Ita & nos, siquando in administratione sacramentalis poenitentiae vehementi aliquo tentationis vento corripiamur, ad Deum cito confugiamus, qui validissimo gratiae suae auxilio quasi extenta dextera sua nos comprehendet, atque eriget, ne demergamur.

Pulso igitur inani timore, viriliter agite, Venerabiles Sacerdotes, & strenuam huic ministerio operam date, ex quo tam multa in christianum populum, atque in vosmetipsos emolumenta proficiscuntur. Charitas Christi urgeat vos; in promovenda fratrum vestrorum salute estote adjutores Dei, & amplissima erit merces operi vestro. Dum in optimarum disciplinarum studium incumbitis; dum humanas, divinasque literas alios docetis; dum christianae religionis misteria, ac praecepta explicatis populo; dum in concionibus Dei verbum annunciat, periculum est, ne hominum laudes, & plausus aucupantes spe aeternae mercedis excidatis, atque ex iis sitis, de quibus dicit Dominus: *receperunt mercedem suam* (b), quoniam opera sua faciunt, ut videantur ab hominibus, eorumque existimationem sibi concilient. Erunt fortasse, qui terrenae retributionis gratia sacrosanctum Missae sacrificium offerant Deo, vel divinas laudes in choro conc-

(a) *Matth. XIV. 30.*(b) *Matth. VI. 2. 5.*

cinant, vel alias sacerdotales functiones obeant, & hi quoque *receperunt mercedem suam*.

Sed nil tale timendum est in ministerio sacramentalis Poenitentiae; quod enim in confessionalis sede pro salute animarum agimus, in conspectu solius Dei agimus, non in conspectu hominum. Nullam ab hominibus laudem expectamus, nullam mercedem, nisi forte dicteria, & vellicationes, quibus a filiis hujus seculi carpi solent Sacerdotes, qui divina mysteria non temere effundunt, sed fideliter dispensant. Deus igitur, qui videt in abscondito, reddet nobis, ideoque illud Apostoli usurpare possumus: *Scio cui credidi, & certus sum, quia potens est depositum meum servare in illum diem* (a). Dominus noster Jesus Christus illis se devinctum, atque obstrictum profitebitur, qui esurientes aluerint, aliisque misericordiae officiis consuluerint incolumitati corporum moriturorum, eosque participes faciet sempiterni regni, quod ipsis paratum est ab origine mundi. Quam ampla igitur mercede, & quanta in coelis gloria vos cumulabit, Venerabiles Sacerdotes, si opera industriaque vestra immortales animas pretio sui sanguinis redemptas a perditionis via ad christianae vitae semitam perduxeritis?

Quid quod ii omnes, qui a funestissima peccati morte ad vitam gratiae per ministerium nostrum revocati fuerint, fervidissimas preces vicissim fundent pro salute animarum nostrarum. Quum Jonathas Saulis Regis filius post res in bello fortiter gestas, post debellatos Israelis hostes, ob violatum paternum edictum morte plectendus esset, conclamavit universus po-

(a) II. Tim. I. 12.

populus: *Ergo ne Jonathas morietur, qui fecit salutem hanc magnam in Israel? ... Vivit Dominus, si ceciderit capillus de capite ejus in terram* (a). Ita plane quotquot, nobis adjuvantibus, salvi facti fuerint, stabunt pro nobis in die mala, & clamabunt ad Dominum, ut peccatorum nostrorum veniam nobis largiatur, & vitæ æternæ gaudia retribuat per Jesum Christum Dominum nostrum, qui est benedictus in secula. Amen.

(a) *Reg. I. C. XIV. 45.*

F I N I S

MG 2011528

30



